

# 知非集目次

## 卷首

年譜 凡一編

## 卷一

序論 凡十八篇

整頓商會議案演說詞

絲綢衣繡葛裘業研究書

江蘇籌辦巴拿馬賽會出品協會報告書總說

中國赴美巴拿馬萬國博覽會感言

埠巴拿馬萬國博覽會中國各省出品得獎

表

發起武進推廣國貨團說明書

武進市董事會第一屆報告書總說

清道論要

抵制日貨敬為國民進一說

消弭金禍說

論武進交通與商業關係

武進自治今昔觀

地方消費損害商業論

節消費以興公益說

籌賑芻言

論縣署改建大門守法事

武進塘市經常溶河南商權書

敬告各市鄉

武進縣商會報告書序

## 卷二

函牘 凡七篇

二九

二六

二五

二二

一九

一一

八

一

三三

三六

三八

四一

四二

四三

四六

四八

四九

五四

五四

五六

丹徒縣人民呈江蘇省議會請議減賦案

五八

前武進縣商會會長惲心耘先生事畧

八三

馬春帆先生傳

八四

武進市公益事務所修理街道啓

六六

余幼舫中將別傳

八六

武進縣商會爲滬甯鐵路行車愆時致沿線各

商會函

六九

南通廣生榨油廠參觀記

八八

武進縣商會市公所呈軍民兩署請拆月城文

七一

創建縣商會圖書館記

九〇

興城遊記

九一

致江蘇省教育會保留四庫全書函

七三

頌詞

凡二篇

致江蘇財政廳李耆卿廳長裁釐認稅函

七四

謝氏新居落成頌詞

九三

致江蘇陳陶怡省長函

七六

祭文

凡一篇

志傳

凡五篇

祭馬春帆先生文

九五

先府君朝議公墓志

七七

箴訓

凡二篇

繼室張組完女士事畧

七九

于氏家訓

九六

格言箴

九七

五律

卷三

詩 凡八十首

五絕

西湖鏡清樓題壁

九八

壬子春暮道出丹陽

癸丑夏蘇城晚眺

題杭縣徐君仲可銜杯春笑圖

挽昭容嚴勇可君集杜句

九九

挽莊費守枚夫人集句

集句挽蔣菊生先生

一〇〇

挽李貞節母汪太恭人集杜詩

集杜工部詩挽史雪齡君

一〇一

挽貞節母費嚴太君集杜少陵句

一〇二

庚申歲暮述懷

一〇三

遼河北岸春日早起

營口晚歸

營口泛舟卽事

五排

壽太倉洪母楊太君七秩

一〇四

五古

夜宿營口

挽吳應銓先生

賀邢江張仁輔君五十再舉子

一〇五

七絕

初夏句容道中口占

一〇六

和莊百俞君四十初度詩

奉題包素人君斷腸詩後

一〇七

喜聯

一一七

會稽盛竹書先生周甲壽詩

壽聯

一一八

史節母楊太夫人八十壽詩

挽聯

一一九

七古

易林集聯

一二〇

先嚴命題五十肖像

一〇八

常州俗語聯

一二五

題慕劬室圖照

卷五

筆記

山海關

鎮海陳樵峯封翁朱夫人八秩雙壽詩

延爽齋筆記 凡三十四則

一〇九

智水仁山

一三八

詞 凡一首

先嚴五十小照命題 減字木蘭花

鼻煙壺

一三九

卷四

五等菜

聯語 凡三百六十二聯

明太祖遺聞

一四〇

題贈

一一〇

李秀成墨蹟



昭慶寺香樟

一四一

平翰

一五二

張文襄軼事

榮備能詩

一五三

多妻制

一四三

載穆都統

一五四

婚姻制

一四四

鮑忠壯遇胡文忠

一五五

飲食笑柄

一四五

程忠烈破東西墩

一五六

尙書韻文

一四五

王文勤經駢

一五七

梅花嶺

蔣果敏晚學

落星石

一四六

寒山寺

一五八

記事册格言

一四七

松隱庵

楹聯無作法

一四八

乘輿濟人坐於塗炭

一五九

曾文正聯語

一四八

江南春色塞外風沙

賭害

一四九

李忠武三河之戰

一六〇

圓光

一四九

馮勇毅諒山之捷

一六一

陳國瑞

一五一

茄

一六二

# 知非集卷首

武進子定一瑾懷

## 瑾懷年譜

年譜。身後之作也。古人往矣。後人思之。則追考其生平。而序次其事。實其於生前爲之。以示人者。蓋未之前聞。然予之爲此。正自有說。百年已半。死不爲夭。予若卽死。自茲以往。作身後論也可。予不卽死。昔之所爲。作前生觀也可。破除成例。請自予始。知予者。其以予言爲何如。

光緒二年丙子一歲。

六月二十四日未時生。

六年庚辰五歲。

正月。始入李氏蒙館課字。

十三年丁亥十二歲。

九月。始作試帖詩。

題爲晴天養片雲。

十四年戊子十三歲。

五月。始作八股文。

題爲君子務本。

十六年庚寅十五歲。

十月。丁祖考厚甫公憂。

十七年辛卯十六歲。

正月。受業於孟蓴蓀夫子。

二月。始應書院文課。

西郊書院試題。湯之盤銘曰一節。試列

第五。

十八年壬辰十七歲。

正月。娶元配唐孺人。

二月始應縣試

首場題。忠信子曰聖人。當時所謂搭截題也。

閏六月。始應學院試。

九月。長子樸生。

二十一年乙未。二十歲。

九月。丁祖妣浦太宜人憂。

二十二年丙申。二十一歲。

正月。從學於張筱圃夫子。

二十三年丁酉。二十二歲。

三月。先考子雲公命題五十肖像詩詞。

像為携琴采芝圖。命題詩詞各一。倩錢

丈頌育范丈景初書之。

二十七年辛丑。二十六歲。

六月十八日。元配唐孺人卒。

同日。學院試案發。入府庠第四。

十月。續娶張組完女士為繼室。

二十八年壬寅。二十七歲。

八月。應江南鄉試。

試策論。

九月。丁先考子雲公憂。

三十年甲辰。二十九歲。

二月。次子德孺生。

產於上海婦孺醫院。

三月。丁先妣黃太恭人憂。

七月。設閱書講報社。

與莊君百俞劉君志揚各出書數十部。

賃屋於城西鐵市巷設社。是為武進圖

書館始基。

三十一年乙巳三十歲。

四月。設布業半日學校。

校設布業公所。來學者均布業學生。是爲武進有半日學校之始。

三十二年丙午三十一歲。

十月。三子劍儒生。

十二月。選任武進縣商會坐辦。

三十三年丁未三十二歲。

十一月。商會會所落成。

會所在城中雙桂坊。

三十四年戊申三十三歲。

四月。始遊浙江西湖。

十二月。武進圖書館落成。

宣統元年己酉三十四歲。

正月。卒業於武進法政講習所。

三月。當選江蘇諮議局議員。

五月。選任蘇屬自治籌辦處參議。

十月。任江蘇諮議局請願國會代表。

與方君惟一吳君拔其同時推任代表。

並與直隸等十五省代表孫君伯蘭等。

自滬歷鄂豫會集於京師。請開國會。

二年庚戌三十五歲。

二月。聯合江蘇各商會。與各省商會同時繼

續請願國會。

分赴松滬蘇錫寧揚鎮各商會。聯合公

推沈縵雲君代表入京。

四月。省派籌備武進城鎮鄉地方自治參議。

五月。省派調查常鎮兩屬自治事宜。

三年辛亥。三十六歲。

正月。四子震儒生。

五月。舉任武進城自治公所總董。

九月。丈量武進城區道路橋梁竣事。

是爲修築及放寬道路始基。

六月。商會新築路告成。

路在小北門外。爲通行滬寧車站而設。

十月。長子樸授室。

十一月。委任財政司籌備蘇屬貨物稅主任。

以四十日成立貨物稅十三總所。是爲

蘇屬釐金改辦貨物稅之始。

民國元年壬子。三十七歲。

九月。任丹徒縣知事。

十一月。編印丹徒縣公報及十八市鄉地圖

初稿。

十二月。四子震儒殤

二年癸丑。三十八歲。

二月。始事提倡蠶桑。

於徒邑公署後圃及大堂前院植桑二

千三百餘株。並於署中育蠶。爲勸導始

基。

三月。丹徒城廂市濬河事務所成立。

以洋商碼頭年租費移交商會管理。爲

經常濬河之用。

七月。揚鎮軍交關。赴象山砲台勸止發砲。

同行者。胡君健春。李君皋裕。

十月。辭丹徒縣知事職。

十二月委任巴拿馬賽會江蘇籌辦出品協會主任幹事。

三年甲寅三十九歲。

正月孫男孟寅生。

四月派赴日本攷察大正博覽會。

六月長女靜芳生。

是月江蘇出品協會展覽會開幕。

會場在上海市陸家浜中國圖書公

司舊址。六十縣出品均集。並附設廣西

黑龍江二省出品協會。

十月出品放洋。運赴美國。

十二月報告書成。

四年乙卯四十歲。

四月任商務印書館出版部長。

五年丙辰四十一歲。

五月任武進縣商會會長。

六月規定武進市修治道路辦法。並開始修治道路。

全市道路一萬三千餘丈。規定修築石路。並由市公所年任補助。以青果巷爲開始修治。

七月巴拿馬萬國博覽會給獎揭曉。中國各省以江蘇爲最優。

吾國出品與會者。直奉吉黑魯晉豫滇蘇浙皖贛鄂湘蜀閩粵黔桂十九省。獎分大獎章名譽獎章金牌銀牌銅牌獎詞六等。大獎章五十五。江蘇得十三。爲最多數。六等獎。共計一千零五十三。江

蘇得一百九十九。亦爲最多數。

八月。建築商品陳列所。

九月。武進市董事會報告書成作總說。

六年丁巳。四十二歲。

二月。編製武進縣商會報告書目次。

至甲子十一月始由范君慎初按日彙

編。今已成書待印。

三月。開始編印通俗教育書。

以辦事餘暇。選題編說定稿。付繕繪並

印。歷歲餘。得一百二十種。

七月。編製商務印書館出版圖書統計表。

八月。商務印書館中國造紙彩印名畫法成。

由出版部會同印刷所試驗。三閱月而

告成。奉農商部按改良品獎勵。

七年戊午。四十三歲。

五月。美國贈到名譽證書。並頒五等嘉禾章。

七月。任商務印書館營業部長。

八年己未。四十四歲。

二月。繼室張組完女士卒。

六月。組完女士哀輓錄出版。

哀輓錄五萬餘言。附刊傷逝編七千言。

七月。納同邑某氏婢爲妾。

十一月。辭商務印書館職。任常州紡織公司

籌備事。

九年庚申。四十五歲。

四月。次女素馨生。

八月。購置四部叢刊於圖書館。

九月。赴南通大生紗廠實習。

十年辛酉。四十六歲。

二月。再任武進縣商會會長。

是月。出妾仍歸於某氏。

三月。續娶文錫珍女士爲繼室。

九月。常州紗廠開始紡紗。

十一年壬戌。四十七歲。

七月。三女秀芳生。

八月。常州紗廠停辦。

九月。個人破產。

十二年癸亥。四十八歲。

二月。著武進塘市經常澆河商權書。

五月。奉頒四等嘉禾章。

十月。購募常州先哲遺書及四庫全書總目

於圖書館。

先哲遺書正續編。爲盛氏所捐入。四庫

全書總目。同治七年廣東局版。係購入。

十一月。任上海寶成第一第二紗廠副經理。

十二月。編印兩廠章程。

十三年甲子。四十九歲。

正月。作家訓十要十戒。

四月。任北票煤鑛公司籌備營業運輸事宜。

十四年乙丑。五十歲。

閏四月。營口分廠成立。

八月。次子德孺授室。

十月。五子貫儒生。

十一月。知非集成。



# 知非集卷一

武進于定一謹懷

序論

整頓商會議案演說詞

宣元九月江蘇諮議局一屆會期作

(一) 規定商會之事務

(甲) 設商品陳列所

(乙) 籌辦共進會

(丙) 編制商業統計

自中外通商。始知世界有商戰。優勝劣敗。固天演之公理也。東西各國之保護商人。民法而外。有特定之商法。遠適異國。有領事公使爲之護持。出口貨則輕其稅率。而又有鞏固之金融機關。以資其輪轉。其培植商智。商業有專門之學堂。商學有特別之博士。卽商業會議所。亦有完

全之規約。以視我國商人。航海有禁。關卡阻擾。裁判無法。保護無力。相去天淵。商人又薄於自待。終日營營於微末。無進取之可言。於是積因成果。一遇外人勢力之競爭。而捉襟肘見。困難情形。遂以畢露。夫教育爲現時急務。吾人皆知注意。而於商業則或忽視之。殊不思商業爲國家之命脈。其負擔之重。如國家歲入。及地方要舉。強半取給於商人。商業興衰。關係絕大。然欲謀挽救。亦豈易言。自商部奏定各省舉辦商會。數載以來。我蘇省各屬設立商會者甚多。已設立者當爲之謀進步。未設立者當敦促其成立。此則開通商智。振興商業之發軔也。

農工商部曾向各商會徵集物品。設勸工陳列所於京師。不戒而毀於火。今聞復謀創設。中央

之陳列所。因爲各省先導計。然僅有一中央陳列所。果足爲廿二行省工商之觀感否。則知商品陳列所之設立。曷可以緩。

農工商部會奏定爵賞章程。顧何以頒行數年。應者絕少。蓋商智未開。實業無由振興。且此項章程。商人知之者鮮。卽或知之。其能躡等而幸邀獎勵乎。事不從細微處入手。根本上攷求。雖有重賞。亦屬虛懸。實業萌芽。必發始於民間。行遠自邇。登高自卑。則知共進會之組織。又曷可以緩。

一地方之商業。其源流變遷。盛衰消長。必有要點。在尋繹而探討之。始恍然於其所由來。然後足以謀挽救。曩曾著武陽土布改良說。雖布業狃於積習。未能實行。然未嘗不確知其故。心折

吾言。又嘗廁身常州商會三載。以閱歷訪求參攷所得。欲就武陽商業之源流變遷。編輯成書。以供商界之研究。使商人不至數典忘祖。而愛重其事業之心思。油然而生。惜尙未及着手。爲憾。今若責成各商會編制統計。則調查所及。庶於華洋銷貨之比較。金融根本之缺失。生計之盈虧。現時之狀況。得以漸悉焉。

## (二) 組織商業研究所

(甲) 研究關於商業之法令

(乙) 講求土貨改良之方法

(丙) 研究各業盛衰之理由

(丁) 關於商業必要之科學設補習科

今日者。土貨銳減。洋貨日增。利源外溢。難以億兆計。不亟講求土貨之改良。循是以往。有同歸

於盡而已。則誠大可懼。大可悲。夫商智之閉塞。其原因甚複雜。然今日商界之主人翁。固即此多數閉塞之商人。而足以爲商人之樞紐者。舍商會又莫屬。教育普及。尙猶有待。即普及矣。豈能待後之學者習商業。而始謀挽救。則惟有屬望於今日之商人。望其挽救。不得不與以挽救之智識也。且以今日無智識之商人。處無法律保護之時代。其情勢危迫。何可勝言。試觀華商與洋商訟。每受不平之判決。痛切剝膚。茫然莫知其所以。彼若以洋商所享之強權。出於天授。我而屈抑。亦天職使然。此誠吾人所不忍言。卽以今日之政府。頒發一命令。暮頒一章程。其關係於商業者。如度量權衡之畫一。紙幣之限制。又如牙稅之率增九倍。鹽斤之驟加數文。印花

爲通行稅則。而本省復有官紙之專賣。釐金爲黑闇稅則。舉世各國之所無。若者爲利。若者爲害。商人莫辨其適從。亦惟有瞠目結舌以相對耳。不特此也。銅元充斥。終日受其害者。孰有如商人之見聞真切哉。彼雖疾首痛心。日思挽救。亦僅以減折及爭改洋碼。爲苟安旦夕。祇顧一身之計。而不知請求畫定幣制。改鑄良幣。易除劣幣。爲一勞永逸清源正本之圖。吾人對於此一般之商人。將以待其自悟歟。抑有以啓發之而使之進於知覺歟。抑吾又見今日之商會。終日紛紜於追收債務。清理糾葛之舉。外此若無所事事焉。夫秉公理論。從衆公斷。固本於部定章程。以今日審判未成。致令商會侵奪權限。爲商事之裁判。而又絕不知法律爲何物。其流弊

曷可究詰。卽是以觀。則知商業研究所之組織。實今日商會必要之圖也。

### (三) 商會經費按年預算決算。

國家之財政。必有預算決算。宣告於人民。始爲之負荷其經濟。地方自治亦然。此文明之公理也。以商會之經費。既取之於商人。當必有昭示其信用者。乃觀經費充裕之商會。類多任意揮霍。竭蹶之商會。又患無從措籌。事前無預算。則其所收入。莫肯仔肩。事後無決算。則其所支出。無從徵信。僅有年終之報銷。或併報銷而無之。商會之與商人。既未能誠信相孚。於是待舉之百端。因以廢止。則知預算決算之關係。非細故也。

### (四) 明定期限。令各廳州縣之未設商會者一律

### 組織成立。

上所云者。爲各屬已成立商會者言之。江蘇夙號開通。乃徵之各屬。尙有并商會而無之者。南洋勸業會。博覽會之始基也。吾人非以此會爲當務之急哉。勸業會開幕於明年。各屬當先開物產會及出品協會。官民絡繹。筆舌紛馳。奔走相勸告。聞已設商會之地。覺着手尙易。未設商會之地。尤難集合。以勸業會之盛舉。發起於江蘇。而江蘇尙有未設商會之廳州縣。何其名實之不相侔也。則惟有限期設立之一法耳。

### 絲綢衣繡葛裘業之研究書

民元二月作

民國成立。百度維新。然改革之始。有因崇尙變更。影響及於工商業者。關係頗大。其惟絲綢冠

服葛裘刺繡諸業乎。熱心志士起而維持之。於是有剪髮不易服會。有中華國貨維持會。剪髮不易服會之目的。祇維持原有之衣服。不使變更。限制一時。意主消極。國貨維持會。以研究新出品。進求發達。藉杜漏卮。意主積極。吾常組織商業研究會。範圍甚廣。固不限於一端。而就今日之工商業。亟當挽救者。則以上所云之諸業爲最。惟是研究之道。當以學問爲根柢。以經驗爲輔導。僕不敏。不足以語此。姑就見聞所及。述之。爲業此者研究之助。

諸業當一方注意於吾國之趨向。一方注意於外國之好尚也。論吾國之趨向。以言冠。則當攷求漢族冠制。及外國之冠制。以言服。則當研究今日衣服之繁重冗長。不宜於動作。遑論前代

之深衣大帶。而外國衣服。則極簡便不特此也。外國衣服。男子尙樸。吾國則尙華。吾國之男子衣服。顏色之不一。難以屈指計。然徵之於古。孔子贊美夏禹。謂惡衣服而致美乎黻冕。吾人當知惡衣服爲美德。惡蓋非垢污之謂。謂儉樸也。吾人衣美麗顏色之服。致不能任意動作。及至稍舊。則又垢污刺目。自視亦覺甚無謂矣。世界文明國之男子衣服。最簡樸者。莫美利堅若。卽各國女子衣服。雖較男子爲華美。然亦非若吾國之深紅濃綠。觸目生厭也。吾民國既改爲共和。今日雖未定冠服之制。然既與美國同爲共和之國。而又睦誼最親。則他日冠服之簡樸。當略同於美國。殊可斷言。吾常服固一時無變更。但顏色質料。決當漸趨於純樸。一祛奇異複雜。

之迹象。禮服更無論矣。吾人注意及此。則知吾國之趨向。與外國之好尚。當漸入於從同之途。業此者。庶於冠服之質料。及其輔佐裝飾諸品。去取較有標準。而不致茫無適從。疊遭損失。歟。茲將見聞所及。與諸業有關係者。雜述如左。

絲。江浙所產最良。銷流於外國甚廣。即黃絲灰絲（均野蠶繭所繅成）銷路亦日增。

野蠶。即柞蠶。創始於河南山東。推行於閩、廣、川、陝、雲、貴及東三省。柞之名。各地不同。或名櫟。名橡。名柘。名柵。名青柵。柳葉可飼野蠶。幹埋濕土。則生木耳。取出燒之成栗炭。樹汁凝膏爲椽皮。果之壳名椽碗。染元青緞最佳。其實可磨粉供食。全樹無一棄材。而種植之地。則又寒煖燥濕。罄無不宜也。

清宣統元年。調查我國蠶絲。輸出於歐美者。上海九百萬斤。廣東五六百萬斤。總計一千四百五十萬斤。比於日本之總輸出。約多二百五十萬斤。此其明證。惟是日本意大利。皆取法於我國。而絲市之發達。我國轉日形見絀。試述義國賽會（一千九百十年即清宣統二年）二事證之。

日本陳賽最好之蠶種。其繭小而厚。中段稍凹。群皆稱美。其實即吾國之所謂蓮心繭也。然此次吾國所陳賽者。轉無此種之繭。

義人某。至中國辦事處。問蠶之起黑點病治法。謂此病研究已久。然未得良法。中國爲育蠶之祖。當有法以治之。乃告之曰。此次未來。專門家。故無以答。其人詫曰。然則有陳賽之蠶絲否。答曰。有之。其人甚以爲異。以爲既有

陳賽何以無專門家至也。不得已。囑其詢於日本人。日本人亦不能答。惟寫許多著名育蠶之人名。令就問焉。此次義國蠶絲之陳賽者。非常精妙。爲各國冠。近更加意攷求。其進步未可限量。

欲謀挽救。當以改良蠶桑爲第一義。然育蠶種桑者。皆鄉曲愚民。必藉絲繭業商。有以勸導啓發之。庶有希望。湖州育蠶試驗所頗著成效。近更有人發明烘繭箱。及仿製日本式繅車。作蠶則安徽亦設講習所。已獲效果。所望業絲繭者。就近調查速事仿行耳。

綢 我國綢產甲於全球。河南山東盛澤鎮江所產之曲綢、府綢、白紡、京綢等。專銷出口洋莊。曲綢以河南南陽府屬拐河鎮、賒旗鎮、鎮平

縣、石佛寺等處。爲最著名。且最多。始因染練不精。故所出之品。性甚硬而色微黃。且幅面甚狹。織絲又粗劣。人以其不適觀。甚不樂購。用當地銷數固微。出境更少。清光緒十八年。上海久成綢號。首先倡銷洋莊。自向產地購辦。陸運至漢。復由漢輪運至滬。與洋商訂價試銷。是爲曲綢出口之起點。然歷七載之久。未能廣銷。至光緒二十四年。久成在產地自設機房。雇用上等機工。精選野絲。疊次改良。織造。銷路漸增。迨光緒三十年。復攷察西人之俗尚。以爲改良之標準。凡綢身之長短。幅面之濶狹。分量之輕重。無一非投其所好。於是暢行於西洋各埠。銷數年盛一年。至今每歲出口價值。已達三百數十萬之鉅矣。

山東灰絲綢。現最銷流於美國。每磅售美金一元八角。紐約總絲店。稱中國所售灰絲。價居各國灰絲入口價銀三分之二。意口兩國居三分之一。查烟台絲業公所。近年售灰絲出口價值。總數爲六百萬兩左右。其每疋之價。上者值每金十四五元。次者亦十二三元。其餘通行於南北各省埠者。以杭蘇兩處綢產爲著名而最多。香港以四大八紡。暹羅以五二加長中紡。皆爲銷路大宗。漳絨初盛於美國。今且盛行於歐洲。然外人之留意仿造。潛心攷求。實可驚畏。試述二事證之。

去歲南洋勸業會之舉。以漳絨織機示人。且雇工匠在會場中。將織法盡行宣布。以致其中底蘊遂爲外人所得。西人具有機織之學。

故一見即能。今已織成大套窗簾椅墊出售。意大利法國均有之矣。

義國賽會場。有仿造之山東綢。驟視之與華綢無異。而定價甚廉。且發售者。印有中國招牌。華人之觀會者。甚以爲異。謂萬不能有此廉價也。後乃察知義人以中國絲爲經。而以義絲爲緯者。

審是。則吾國綢業。當研究染織之科學以謀進步。庶足與外人爭衡耳。

裘 西國服飾。男子尙樸。冬月用黑。夏月用白。均用呢絨。吾國習慣。冬月向着絲棉羊皮。若如西式之衣。純用單夾呢絨。不耐寒冷者。必居多數。予意皮貨銷路。仍當回復。且獺皮青獾。向爲出口大宗。而貂鼠狐等細毛各皮。此後銷路當



益形暢達。蓋常服本一時無變更。而外罩大衣。又必爲趨時好尚之服。其衣裏及領袖皆藉此等細毛爲之。近嘗見極有聲譽之志士。雖易西裝。而以深蝦青色之素雲縐爲外罩大衣。其裏則附以灰色鼠之背脊皮。其明証也。

葛 廣東揭陽縣（昔爲潮州府屬）向產夏布。近有林千夫者。先在日本東京染織學校習染織。又入神戶德國柏林顏料廠試驗場練習染法。又入西京山下織物工場練習織法。歸後創辦織布廠。以改良揭陽夏布爲主。並仿造東洋各種棉布。其所織花夏布。曾於清宣統二年南洋勸業會獎優等。潮嘉出品會獎最優等。無錫縣亦創有織花黃草夏布。此等新發明之麻織物。異日必能暢銷於中外。亟宜攷求仿效。以闢

利源。

葛與刺繡 廣東原有繡花夏布。盛銷於歐美各國。其淡藍葱白及純白色之精細夏布。或以淡藍及白絲線相間繡翎毛花卉。亦有專用白絲線繡花者。製成婦女衣料。每件可售美金二十元。又有用此等藍白夏布製成西人餐室中桌布。以承餐具盤碗之用者。或繡龍鳳團。或繡團花。每幅或十二花團。或六花團。所繡之花。亦用藍白絲線。或間以組織疏花。惟大小尺寸。皆依其桌枱之度。其價值。小者每幅自美金五元至十元。大者自十元至二十元。獲利極優。

繡 中國刺繡。由來已久。惟鍼法雖知變換。而畫稿素昧講求。南洋勸業會審查刺繡品。既畢。有某省出品醒獅圖一幅。列獎二等。不服。欲列

一等爭之甚烈。審查官某君宣示審查標準。某君固精於繡學。謂吾國繡品。祇有列三等。而無一二等者。今此品列二等。已從優厚。反復演述。理由甚足。遂定議。予爲審查評議員。親聞其論。茲述其審查標準如下。

針法自成一家。確有新理發明。有功繡術者。爲一等。

兼精中東繡法。能整能散。虛實兼到。造詣精能者。爲二等。

照第二項能精擅一門者。爲三等。

針法純熟。色隨絲轉。意致靈動。能得畫理者。爲四等。

針法雖工。而配色用筆描染者。章法雖拙。而

針法確有功夫者。均爲五等。

據此以觀。繡術正未易言。然近如余女士沈壽之繡品。中外稱賞。無錫於刺繡一項。亦設專門學校。吾常聞秀習刺繡者。向不乏人。並有業繡品之商店。若能講求進步。於地方生計。亦大有裨益也。

西國婦女所稱小圈粒繡品。即廣東所稱打子粒。北京所謂之打仔刺繡。昔多用於補服眼鏡扇等袋是也。其象物雖不如絨線刺繡之宛肖。惟西人以其手工繁難巧妙而奇之。西人凡於用機織者價賤。用手繡者價貴。緣西人手工每日須二三元金錢之故。打仔繡宜於龍鱗花菓山石等物。其餘當以絨線刺繡間之。若禽獸用打仔繡。花卉又當以絨線繡間之。以取能象物爲主。若用洋金線排繡者。其價最低。

吾國繡品。以繡工雖精而稿無畫理。故致遭輕視於西國者。試述其事。

此次義大利都朗賽會場。（宣統二年即一千九百十年）日本陳列之繡貨。質料頗劣。惟繡上則活潑生動。而價值稍廉。陳列所之裝飾品。又極美觀。西人競購之。有母女二人。至吾國陳列所。其女曰。此中國貨也。母曰。否。女曰。是也。試觀其上之招牌。母遂引女去。曰。中國貨皆不足觀也。審其原因。蓋更有二端。一以廣告之不良。一以裝飾之不精也。

刺繡與衣服 西國婦女禮服。茶會看戲赴宴。各有其式。須詳加調查。始能仿製。惟西人男女衣服。均有外褂。（卽外罩大衣。西人稱爲長大襖）我國旗裝女衣。與西女外褂絕似。所不

同者。西女外褂。當胸開正襟。袖長勿過手腕。袖闊勿逾四寸。蓋有皮或絲之掌套。故衫則有領。領之後身較前畧高。邊鑲以緞。中繡以花。其形式爲窄袖寬胸細腰撒脚是也。

美國富家婦女衣服。每歲更新。卽尋常女子。其服飾亦年月百變。同一茶會跳舞。女子數百人。衣服鮮有同樣者。蓋其女服。摩仿法京巴黎而小變。每衣服一襲。自帽及肩披。以至上衣下裳。各有特別新製。彼稍同樣式者。女傭粗服耳。日人揣知其故。每以輕薄之綢緞。繡成衣料。售之獲利甚厚。我國緞最美麗。寧綢次之。若製西國女服。宜用輕薄之料。近時夏間。西女有用我國雪青及白紡綢爲上衣下裳者。但非繡花式樣。又有灰絲綢製成女衣。間以疏花組織。以原

色灰絲絨線繡花於衣上者。在上海每件售華銀五十兩左右。在美國可售美金八九十元。以其組織繡花工緻。夏月可以澣濯也。美人盛稱灰絲綢之形色。極合夏衣之用。故近年以此綢製爲男女夏衣者日多。

西國婦女。以黑色爲喪服。深紅爲流血。深黃爲病色。三者皆遭忌諱。以白爲吉服。新婚及年少者衣之。若粉紅、粉黃、粉綠、出爐銀色、竹粉青、雪青、葱白、藍湖水、淡藍、諸色。均以帶幾分淡白之色爲貴。卽年老婦女所用者。亦取白雁、翠藍、玉藍、等淡嫩之色爲宜。

西國婦女。於刺繡之花樣。喜淡雅疎秀。又喜所繡之花與衣之質地相配。多以同衣色之絲絨線繡之。如粉紅地衣服。繡牡丹玫瑰等花。其花

瓣忌深紅。葉忌深綠。禽蝶等物。亦與其衣色相配。若忽紅忽綠。五綵相雜。則非所喜。此等刺繡。須由學堂女藝師工繪畫者。先描花本。並著色之濃淡。然後以絲絨線配准顏色繡之。廣東有三藍大花邊。其法用淺藍絨線中分三色。西婦每購之以鑲衣服。若機器花邊。則以非手工而賤視之。

### 江蘇籌辦巴拿馬賽會出品協會

報告書總說 民三十二年作

赴賽美國博覽會之舉。自二年六月設籌備事務局於京師。七月農商部電知各省設立出品協會。本省俟軍事粗定。始克於十二月開始籌辦。至本年六月而開會展覽。九月而包裝竣事。預備放洋。爲時雖促。然以六十縣之出品完全

彙集更益之以三十一官廳。計三萬七千餘件。其間合格賽品至一萬六千餘件之多。省與各縣用款至十二萬餘元之巨。上下一心。通力合作。不可謂非本省實業行政中之盛事已。

吾國赴賽外國博覽會。如一九〇四年之聖路易。一九一〇年之比利時。一九一一年之義大利。本年之日本大正博覽會。均無預備機關。亦無大宗出品。與此次之設立專局。完全籌備者不同。至內國賽會。如己酉之武漢獎進會。直隸展覽會。庚戌之京師出品會。南洋勸業會。江浙之漁業賽會。非不蔚然可觀。一時稱盛。特事過境遷。無所依據。後事者追溯及之。爲之低徊不置焉。要皆爲吾國賽會及赴賽歷史之沿革也。此次美國博覽會。爲開鑿巴拿馬運河告成之

慶典。美政府之宣言。此會不啻爲中美博覽會。蓋以中美兩國居太平洋東西岸。而此河爲太平大西兩洋捷徑。五洲實業交通。愈益接近。尤於中美有重大密切之關係。其於吾國勘定館址樹立國旗時。鳴砲致敬。待以大使之禮。則以中美感情素厚。故茲之與賽。所以尊國體。睦邦交。兼以引起人民企業之興味。發展海外之貿易。此則政府之主旨也。

江蘇天產饒富。交通便捷。商業縮全國之樞機。教育負先進之虛譽。祇以頻年多故。遂使生計日艱。有不乘此時機以蘄昭蘇者乎。且南洋勸業會。本省獨得地利。人民之觀摩漸漬者多。時逾五稔。其進境若何。亦得一驗其優劣。賽會爲改進實業之總因。物質文明。由比較競爭而進。

協會之舉。上以副政府提倡之盛心。下以啓實業前途之端緒。又況江蘇首當太平洋衝要。尤宜聞風興起。早日圖維。此則本省出品協會之主旨也。

至其成績之可言者。則以建樹改良之基礎。歷練賽會之人材。如實業行政會議。所以貫通精神。共謀進行之標準。派委各縣調查。所以搜求物產。兼悉組織之情形。至於實業團之參觀。事務員之攷察。所以資借鑑於鄰邦。評議部之共同評議。審查員之協助審查。所以爲實地之研究。又如省與縣之各職員及各出品機關。奔走勤動。殫精竭慮於一載之中。亦莫不有助長學識。增加經驗之效益。以爲異日地方品評共進之階梯。固不徒以一時之表彰文明程序。推廣

國貨外銷已也。

出品協會之責任。固在於事務所。然非各方協助進行。不能得圓滿之效果。一曰財政。本省值經濟萬窘之時。協會需款。未嘗一日或缺。則以前之爲今。財政部張次長壽齡。掌江蘇財政時。後之爲今。財政廳蔣廳長懋熙之協助也。一曰教育出品。本會教育出品之豐多。甲於各門。則以昔之爲前。教育司江司長謙。今之爲教育科盧科長殿虎之協助也。本會內部之助力。悉惟實業科是賴。則以昔之爲前。實業司第一科劉科長桐羅。科長運經。今之爲實業科高科長繼宗。而金科員其照。則尤始終其事者也。至於名譽經理。或以學識。或以經驗。熱誠協贊。及農工商學各界盡力協助。各縣分會與出品官廳。則

皆爲斯會告成一大原因也。

以簡短之時期。彙集繁多之出品。固足以觀企業之殷情文化之競進。然其手續闕畧。亦因之而益見。如目錄書標籤之時有缺少也。說明書之率多苟簡也。裝飾之不能完美。包裝之不盡堅實也。又或一出品者之商號或姓名。標籤所載與目錄書異。目錄書所載又與送品清冊異。一出品之價目。或爲價值價格之倒置。本爲賣品。或並價目而無之。本會則爲之補救匡正。其困難有非可言喻者。則以賽會之舉。地方既無經常之預備。夙昔又無稽攷之典章。此本會所以於籌備時有編纂報告之建議。而於結束後以編纂報告爲要舉也。

報告書中所紀述者。如辦理之規章。經歷之事

實。以及調查評議之記載。攷察參觀之報告。各門出品之圖說。各項容器之寫真。類皆次第編列。俾此中得失。近足爲一般社會參攷之資。遠亦爲實業前途壤流之助。此則本書之微意也。

中國赴美巴拿馬萬國博覽會感

言 民四七月作

民國四年七月。江蘇籌辦巴拿馬賽會出品協會報告書刊印甫竣。適值美國會場審查評獎揭曉之時。吾國與賽出品。成績頗優。得大獎章。以次至千餘名之多。中外報章所騰載。公私函電所報告。類皆信而有徵。得此榮譽。誠足爲吾國實業前途賀。鄙人因喜生疑。因疑生懼。不禁有言。敬告我同胞。

斯會爲慶祝巴拿馬運河工成而設。美之通牒。

在民國元年二月。其時國基始奠。未暇問津。至二年六月。始設籌備事務局於京師。七月。農商部電知各省。江蘇軍事粗定。於十二月。始行籌辦協會。各省亦同時着手。距美政府通牒時。幾經兩載矣。三年六七月間。各省協會先後開幕展覽。其後審查檢選包裝。時日甚促。全國賽品。於十二月放洋。鄙人承乏江蘇協會。凡諸手續。皆所親歷。以爲期急迫。故雖竭力辦理。昕夕不遑。而缺點良多。固無庸諱飾爲也。以吾國實業程度之幼稚。與歐美諸先進國較。敢云奢望。矧以預備之匆遽若是。乃與賽結果。所得甚豐。則誠有喜出望外者。

雖然有果必有因。吾人當思今日所得之良果。其原因究何在。蓋由於國內之組合者半。由於

國外之機遇者亦半。所謂由於國內之組合。厥因有三。吾國參與各國賽會。向無專一之預備機關。此次則中央有專局。各省有協會。以今較昔。徵集出品。手續備而範圍廣。其因一。國體改革。民氣刷新。各省之推廣教育。始亦不遺餘力。獨至提倡實業。苦無憑藉之端。值此賽會舉行。皆有踴躍奔赴之觀念。其因二。清末南洋勸業會。官民聯絡。稍有基礎。今仍利用此法。隔閡較少。其因三。所謂由於國外之機遇。亦有三。因歐戰忽起。各國咸盡力於軍事。赴賽之舉。不能注以全神。其因一。此次審查以出品數量。定審查員多寡之標準。（會章評獎第四條。評獎會會員。各國人俱得派充。會員全額六成。須由美國人承充外。其餘四成。查照各類賽品數目多寡。



重要程途。按類勻擬。吾國出品較多。得占優勢。入選賽品。以江蘇爲最多。計一萬六千餘件。包裝三百四十餘箱。次則浙江二百十餘箱。他如直隸等百箱以上者約十餘省。其因二。美之於我。舉國上下持親睦主義。求中美商業上之聯絡。蓋已十年。當然厚我。出於情不自覺。日本自日俄戰後。在我國之貿易驟增。一千九百十三年。輸入中國貨物。值華銀一億一千九百三十餘萬兩。列強無與倫比。美國輸入貨物。僅值銀三千五百二十餘萬兩。美欲挽東方商業之衰落。其求親於我也固宜。其因三。綜上三因。則知吾國與賽之得占優勝。其能信爲實力使然歟。

抑更有言者。此次出品分類。爲教育。美術。社會

經濟。文藝。製造工藝。機械。轉運。農業。牲畜。園藝。採礦。冶金。在太平洋洋界內新發現物。及航海等十二門。吾國出品。以製造工藝爲大宗。如絲織品。陶磁器。漆器。諸種。視日本之羽二重。七寶燒。陶磁器。繡品。爲何若。如絲。則視日本義大利爲何若。其可以多產之數量爭勝者。惟農業門之茶麻米麥大豆棉花藥材皮毛等。以今日之萬國博覽會。顧能以原料品爭勝乎。不煩言而可解也。苟爲無本。澗可立待。此則鄙人所由因喜生疑。因疑生懼也。

今爲同胞進言之。實業之倡導。必其體用兼賅。乃可實獲效益。以學校培植人材爲體。以社會聯合促進爲用。今日者國恥毋忘。人咸知奮。民窮財匱。困極思蘇。政府方有生計委員會之組

織國貨展覽會之預備。人民亦有國貨維持會之提倡。不可謂非實業前途之曙光。惟是賽會之舉。以法定程序言。必以地方為起點。進至於縣。於省。於全國。毋若昔日之謀教育。以京師大

學為發軔。地方賽會。又必有經常之預備。而品評。而獎進。而改良。毋若從前之科舉然。隔數年而循例一行之。同胞勉旃。慎勿沾沾自喜於赴美賽品得獎之優且多也。

附巴拿馬萬國博覽會中國各省出品得獎表

按照農商部專冊錄製

省別	獎名		計
	直隸	奉天	
吉林	八	一	五
黑龍江	一	一	二
山東	四	一	五
山西	一	二	三
河南	一	一	二
雲南	一	一	二
江蘇	一	三	四
浙江	六	一	七
安徽	一	四	五
江西	一	二	三
湖北	二	一	三
湖南	一	二	三
四川	一	二	三
福建	二	二	四
廣東	一	二	三
貴州	一	一	二
廣西	一	一	二
計	五五	二九	八四
名譽獎章	八	一	九
金牌	二	三	五
銀牌	二	六	八
銅牌	一	四	五
獎詞	一〇	五	一五
計	九	三	一二

## 發起武進推廣國貨團說明書

民四十一年一月作

吾國地大物博。而工業不興。日用所需。供不應求。遂使外貨憑陵。國計民生。現象日呈艱窘。推究其原。固由於科學之不昌。稅則之不良。運輸之不便。金融之不充。提倡之不力。設施而補救之。非可一蹴驟幾。是必圖之以漸。比年以來。朝野上下。亦既稍稍知其故而漸謀挽救矣。自南洋勸業會舉行。實業思想。遂以萌芽。至各省因與賽美國巴拿馬博覽會而舉辦出品協會。並組織考察實業團。當日本開大正博覽會時。江浙復有實業團之參觀。滬上國貨維持會。又於菲律賓賽會。爲實驗國貨銷售之舉。於是海外貿易之觀念。漸植基礎。近以外侮紛乘。激於國

恥。政府方開國貨展覽會。而國貨維持會勸用國貨會等。亦皆竭誠奮迅。協助進行。此固吾國實業前途之生機也。惟是勸業之道。必基於日省月試。不有經常方法。其必一曝十寒。此一義也。行遠自邇。登高自卑。不有起點。其何能積累而擴張之。此又一義也。吾國幅員之廣。物產之豐。以吾人觀察所及。製作工業。雖尙少出奇制勝。然亦既日就月將。苟其羅列枚舉。互相爲用。安見不足供吾人日用之所需。其毋乃搜採之方不廣。汲引之力未盡歟。不揣固陋。謹爲吾國國貨謀實行介紹之舉。冀路藍縷。請自隗始。定一江蘇武進人也。近歲不常居鄉里。乃猶承商界之推挹。忝廁於商會領袖之列。爰與錢君以振。史君成。劉君敦勤。盧君正衡。李君嘉穀等。以

此意相商確。發起武進推廣國貨團。錢君等贊成之。各工商業皆願踴躍從事。遂議決於本年陰歷十月一日開成立會。覺斯舉之利。有足多者。以推廣爲獎勵。使製作國貨之工商。咸思奮勉。其利一。練習結合團體之性質。養成共同貿易之習慣。其利二。商會爲工商業所組合。其經費亦卽各工商所擔負。爲補助與介紹。藉以盡商會之天職。其利三。猶不止此。將以一縣之國貨。介紹於全國。一千數百縣。售品固國貨。贈品亦國貨。贈品之國貨。與售品之國貨。絕不犯複。則是雙方推廣也。其始售品之國貨。僅十餘業。品類僅百餘種。隨時繼續加入之。是始以推廣少數之國貨。而繼及於多數之國貨也。售品之國貨。暫以本縣爲限。贈品之國貨。則各省各縣

均擇用之。是因推廣本縣之國貨。而及於各省各縣之國貨也。武進首創舉行。各省各縣繼之。今之以甲縣國貨爲售品。乙縣國貨爲贈品。後此則相互爲之。是則國貨之互相推廣。以及於全國也。迨各省各縣皆舉行之。更聯合而成一大團。或數大團。以謀推廣於國外。是又推廣中之推廣也。至此而朝野上下。或能注意於稅法之改良。以保護之。運輸之便益。以利導之。金融之活潑。以鞏固之。科學之發皇。以灌輸之。更設經常法令。規定品評獎進。研究改良。諸會以培植而激勵之。而吾國實業之振興。詎有不臻於國利民福之境哉。希望如是。所願貢其一得之愚於邦人君子。其盍聞風興起乎。附列簡章如左。

## 武進推廣國貨團簡章

一本團以推廣國貨爲宗旨。由武進縣商會發起。集合本縣工商業組織之。定名武進推廣國貨團。

一本團暫以本縣所製國貨爲範圍。俟各縣成立同一之團體時。再議聯合推廣。

一本團職員。設名譽幹事及幹事員。名譽幹事由商會會員公推任之。幹事員由本團各工商業任之。每業每店各一員。幹事長一員。由幹事員公推任之。

一本團定期於民國四年陰歷十月一日。在城內雙桂坊圖書館公園內開成立會。會期暫定一星期。發售本團所製國貨。每日時間。自上午九時至下午五時。

一下屆開會銷售國貨。應在何省何縣。以幹事員及名譽幹事過半數之協議定之。並由武進縣商會咨請開會所在地之商會贊助提倡之。

一本團置備贈品。以酬購用本團各貨之盛意。不論購用一項及各項國貨。但係價滿五角者。卽得有贈品。

一贈品共分四種。購用國貨價滿三元者贈甲種券。一元者贈乙種券。五角者贈丙種券。購價在五元以上者。得有特種贈品。

一購用國貨滿小銀圓一角者。卽得贈品分券一紙。積有五紙。可取丙等之贈品。

一本團分設售品處贈品處於圖書館公園內。以便購品者當時憑券至贈品處換取贈品。

一贈品券於會期內未經換取贈品。得於閉會後三日內。至雙桂坊武進縣商會換取之。

一贈品之價植。由本團各商店以售品之多寡派任之。其廣告及會場裝飾等費。由武進縣商會補助之。

### 武進市董事會第一屆報告書總

說 民五九月作

吾國自治之制。由來已久。州里鄉遂。自治與官治無二途。漢以下。嗇夫亭長等職。相沿至隋。皆名爲官。唐宋之里正保正。則淪於役。三代之法。漸變而愈漓。明清復有紳董學董鄉董圖董之設。民承其事。官總其成。其地位在官與役之間。特規模狹隘。準則靡常。權限之張弛。範圍之大小。恆視乎其人之勢力而定。其強者。可以把持

官府之威權。其弱者。則徒仰承官吏之鼻息。由前之說。以無明定章程故。由後之說。則以政尙尙制故。用是舉國上下。但有人治之觀念。而無法治之精神。然固不可謂非自治之嚆矢也。海禁既開。西力東漸。清之季年。外侮紛乘。政府慨於積弱之不振。默察列強之趨勢。亦既稍稍明其故。光緒三十四年八月。爰有九年籌備憲政綱要之發布。十二月。頒布城鎮鄉地方自治章程。其時。疆吏之明達者。知視爲要舉而奉行。之。有識之士。皆延頸企踵。以期憲政之速成。宣統元年。資政院及各省諮議局相繼成立。而蘇省亦於斯時。依據章程。籌備自治。惟以江督駐寧。蘇撫駐蘇。向爲兩省會。遂分設自治籌辦處於寧蘇。以司道主其事。分科籌備。仍受成於督

撫地方士紳以自治前途關係於地方利害最爲切近。公舉總協理顧問參議等職以分其事權而促其進取。而蘇籌辦處則本市第一次議長孟森卽爲顧問之一。第二次總董于定一卽爲參議之一。又以城鎮鄉規定自治員額必據人口爲準。而調查戶口。非各縣設有籌備機關無從辦理。本邑城鎮鄉籌備自治公所。遂於宣統元年六月初一日成立。以惲祖祁爲所長。惲用康莊殿華副之。其時武進陽湖設官同城而治。識者謂自治有兩監督。遇事以駢枝而牽掣。至不利於進行。方議裁併。然以積重難返。不易實行。當時之設兩副所長者。實由於此。本所總董于定一錢以振亦皆爲所中參議。於此時期以清釐款產調查戶口。畫分區域。並設立法政

講習所。以造就適當人材。爲注重之預備。凡此數端。皆爲自治最要之前提。行之期年。始有端緒。於是依據章程實行選舉。而城議事會遂於宣統二年六月二十日成立。七月三十日。董事會相繼成立。議董兩會既經成立。嗣後議決執行。雖皆依據章程。制定規約。惟是組織伊始。規模粗備。困難猶多。有未可遽言進行者。如區域之爭端未息。經費之預算未定。甚至信用未孚。謠啄紛乘。皆足爲進行之阻力。本所自正式自治成立。至非法停止時。議長凡兩易。總董凡三易。其間任期長短。以議長論。孟森較短。史藩較長。以總董論。史成較短。于定一次之。錢以振較長。其間辦理情形。約可分爲規畫調查實行等三時期。茲就

其大要說明之。

第一時期。所謂規畫時期者。如制定規約。委任區董。設置分事務所。聘定辦事職員。分畫學區。設置學務耑員。而編釘戶口門牌。解決區域爭議。則又爲結束籌備未了之手續。凡此皆爲規畫時期之大畧也。

第二時期。所謂調查時期者。如調查私塾。爲改良之預備。設立小學教員講習所。爲擴充教育之預備。接辦市區各小學。爲統籌全局之預備。創設閱報社。設立宣講所。爲通俗教育之預備。接辦清道路燈。爲整頓清潔事項之預備。清查荒地。爲從事墾植之預備。丈量街道。爲整理路政之預備。凡此皆爲調查時期之大畧也。

惟於此時期。復經一次之停頓。爲時歷四月之

久者。則以辛亥九月。宣告光復。事前以地方防務而停頓。事後以軍事俶擾而停頓。迨民國元年三月。大局漸臻鞏固。始有進行之望。經此改革。地方人士咸覺耳目一新。於是而人於第三時期矣。

第三時期。所謂實行時期者。於第一第二時期所規畫調查各端。次第實行之。亦既無煩縷述矣。茲之所述。則舉其原有事業而改良擴充之。如續辦法政講習所。如民房改建之照章讓地。如建築公園。如疏濬城河。如路燈改設電燈。更以一百餘處之路燈。增至三百餘處。原有小學校十二所。次第增設六所。更爲整理統一其經費。使劑於均平。原有圖書館藏書四千二百六十七種。按月添購新書。加至五千九百七十三



種。原有市區款產。年額收入四百餘元。整頓清理。加增至年收三萬一千五百餘元。舉其從前所未有而創設者。如關於交通事項。則設置電話百餘處。關於牖啓民智事項。則創設日報館。關於衛生事項。則創設臨時醫院。其他如小菜場之擇定地址。勸業場之修整房屋。沿城荒地之墾種桑麻。全區街道之改築石路。或以縣市爭議而阻滯。或以經濟不繼而停頓。致不能無待於將來。凡此皆爲實行時期之大略也。

自治之根據。前之爲城鎮鄉地方自治章程。後之爲本省暫行市鄉制自治之事業。即章制所列之第五條一至八項。一學務。二衛生。三工程。四農工商務。五善舉。六公共營業。七因辦理本條各款籌集款項等事。八其他因地方習慣向

歸紳董辦理之各事等是。而本市以時閱三載。議會經四屆之選舉。總董經三次之變。更用款至六萬二千六百餘元。其所建設。僅如上之所述。按之章制規定事項。不及十之三四。又況其所設施。半皆爲昔所已有。第就所有者。踵行而整理之。然而當事者朝夕從事。盡力以赴。猶覺竭蹶不遑。則以事經創始。固由於當局之材力未充。亦由於居民之助力寡薄也。百年之郅治。非一旦之所期。惟進行無間。乃始有積銖累寸之觀。豈期甫具萌芽。即經摧折。竟發生三年二月停辦自治之變劇耶。良用深慨。今者共和復活。自治之絕而復續。當然在指顧間。然已往之成績。存亡若何。初立之基礎。變易若何。則俟來者之搜求整理。其難其慎。恐不讓於規畫調

查時期。是則異日之一經回念。必且槎觸無已。而現時固尙難語此也。

是編之主旨。蓋於往者溯其源。於來者闡其徑。其程功之所至若何。事實之關係若何。措施之得失若何。雖云不備。亦見大端。小之供里乘之搜探。大之備後事之參稽。革路藍縷。請自隗始。則此編之所由作也。至總說一章。又爲全編之綱要。使閱者一經展卷。卽瞭然於編中之大較云爾。

清道論要

民七七月作

吾邑清道。創辦於前清光緒三十年。定一爲最初發起人。迄今已十有五載。絕無成效可觀者。其故維何。清道之責。爲人所共有。不當專責之自治機關。蓋直接。在清道夫與管理員。間接在

居民。而介於二者之間爲警察。欲求清道之效。果必先明公私之界限。道路爲公有。室家爲私有。公私界限。絕對不可混淆。試問吾居民能確守此界限否。警察能維持此界限否。如曰不能。雖有勤苦之清道夫。明察之管理員。清道終無完全之望。

建築房屋。侵佔道路之風。今已漸絕。吾人當歸功於放闊街道之成案。至於清道。誠有不忍言者。吾人久處穢濁之地。習焉不察。試一遊外人居留地。即覺吾邑道路之臭穢污濁爲不可耐。而猶漠然無動於中者。必非人情也。

抑更有言者。阻礙交通與污穢道路。尤有密切之關係。試觀尿管糞窖之遍設。排門檻杙之橫陳。無一街道無之。他如水果攤也。糕糰桌也。豆

腐盤也。麻糕桶也。酒飯館之菜檯。雞鴨店之竹籠。漆匠店之牌匾。嫁裝店之木器。無一不排列於道路。其甚者。石作之石。樹行之樹。既綿亙於陸地。而竹行之竹。木行之木。卽縱橫於河干。酒飯館之汙水。豆腐店之泔水。既傾倒於街衢。而青坊之洗濯。輪船之煤灰。亦充積於水道。居民既不知道路與室家有公私界限之分。警察亦昧於糾正而熟視無覩。從無有申明違警罰法以相維持者。而獨惡夫清道夫與管理員之不能盡職。雖日日聒噪。吾決其無絲毫效果之可言也。

吾今與自治機關約

速建小菜場。

設合法之公廁。

挑清積存垃圾。

添砌垃圾窩或多設垃圾桶。

多設清道夫。

責成管理員逐日具報告書。

添請名譽監察員。

責成各區董兼任查察。

吾又與督率清道夫之管理員約。

冬日積雪。春日久雨。路有積泥。必令鏟盡。

夏秋路旁生草。必令拔除。

夏日瓜皮必令拾去。

夏秋之交。圾垃中有蝦蟹壳魚腸等。必令隨時挑清。

時挑清。

陽溝有泥必鏟淨。有水必掃去。陰溝不通者

必通之。

冰後蓋溝板破損缺少。必報告修理易換。

井旁米泔及洗衣水菜葉與根泥。必分別掃除。

每日垃圾窩或垃圾桶必清除。

船運垃圾。必使達堆積處。慎防私傾入河。

### 吾又與居民約。

坑廁移置室家之內。

勿養蹠街豬。

勿將鷄鴨在路旁宰殺及豢養。

勿傾倒藥渣於道上。

勿在路旁洗衣及曬晾。

排門檻板勿陳列於門外。

勿在門外工作。

各攤勿列於門限之外。

各項污水勿傾入街溝。

各項貨物勿陳設於門外。

勿在路便溺。

### 吾又與警察約。

依違警罰法左列各條。先行張貼示諭。並於日報登載公告。一月後執行之。

第四十一條四項。未經官署准許於路旁河

岸等處開設店棚者。處五日以下之拘留。

或五元以下之罰金。

第四十二條四項。於道路橫列車馬。或堆積

木石薪炭。及其他物品妨礙行人者。二

項。於路旁羅列商品玩具及食物等類。不

聽禁止者。八項。將冰雪塵芥瓦礫穢物

等類。投棄道路者。十項。受官署之督促。

不洒掃街道者。處五元以下之罰金。

第四十六條二項。於人烟稠密之處。開設糞廠者。三項。於人烟稠密之處。曬晾或煎熬一切發生穢氣物品不聽禁止者。處十五日以下之拘留。或十五元以下之罰金。

第四十九條二項。裝置糞土穢物行過街道。不加覆蓋。或任意停留者。五項。於道路或公共處所便溺者。處五元以下之罰金。

至於水道。則水上警察雖未設立。無專責之可言。然商會與市公所當共同維持之。

吾人人也。外人亦人也。人不能自治。然後他人得而代治之。願吾居民吾市公所吾警察深思

之母誦清道一事爲細故也。

### 抵制日貨敬爲國民進一說

民八五月作

抵制日貨。舉國一致。進行甚烈。同胞愛國之忱。甚可敬也。挽救國權。其道不一。至不得已而出於斷絕國際貿易之途。則誠吾國民之不幸。然抵制而有效固佳。如其無效。又將奈何。吾人研究及此。不能不求更進之說。其說維何。曰。當爲積極之抵制。不僅爲消極之抵制。當爲永久之抵制。不僅爲一時之抵制。當爲治本之抵制。不僅爲治標之抵制。請試言之。吾國今日。所患在無代用品。年復一年。國貨日減。外貨日增。歐戰以來。西貨日減。日貨日增。厥有數因。一由於工價低廉。二由於運輸近便。三由於稅則輕減。四

由於調查精密。凡此四者。或爲人事。或爲地利之關係。歐美皆遜於日本。卽非歐戰。已覺日貨日增。西貨日減。閱近十年海關貿易冊。當自知之。今日尤甚。雖然。亦知日本果何道以致此乎。蓋具有三要義。甲爲注意於西貨之銷於吾國者。出品以代銷。乙爲注意於吾國向有是貨者。出品以代銷。丙爲注意於吾國向無是貨者。出品以謀銷。合多數之學問家。資本家。企業家。竭其心思才力。窮年不已。而又加以政府之倡導。保護。不遺餘力。三十年來。始克臻此。吾國民倘不亟求代用品。則是消極之抵制。而非積極之抵制。一時之抵制。而非永久之抵制。治標之抵制。而非治本之抵制也。說者謂今日抵制日貨。提倡國貨。二者並進。安得謂非亟求代用品。則

應之曰。試觀吾國之貨品。果能完全代用乎。亦惟以西貨爲後盾而已。抵制美貨。爲十餘年前事。吾國之代用品。進步何若。抵制日貨。爲數年前事。吾國之代用品。進步又何若。吾人今日。但就原有之國貨。調查而介紹之。則知未足以盡其責也。吾所謂積極之抵制。永久之抵制。治本之抵制。不責之政府。而望之於全國一千八百數十縣之市鄉機關及農商教育會。實行勸業政策。日本之勸業也。先之以町村。繼之以數町村之聯合。繼之以郡縣。又繼之以數郡縣之聯合。更繼之以道。然後進而爲內國博覽會。更進而爲萬國博覽會。歐美各國。何莫不然。日省月試。所以勸工。行遠自邇。登高自卑。吾國古訓。何獨不然。吾所望於今日章程。雖亡機關猶在之

市鄉。實行地方物品獎進競進共進改良研究品評展覽諸會。一市鄉而年舉行數次或十數次以上。或爲一物品之舉行。或爲數物品之舉行。或爲全部物品之舉行。其程序爲調查徵集。檢選研究審查評議報告獎勵介紹諸事。而農商教育會。或以學識。或以勞力。或以經濟輔助之。舉行斯會。但取乎精神。無藉乎形式。所費甚微。而收效甚大。使原有製品。日見其改良。固有原料。日進於製造。彼出品之家。既得物質之進步。名譽之獎勵。貿易之推廣。寧有不人人圖奮之理。昔日用日貨。今日用西貨。異日即用國貨。行之期年而無效果者。吾不信也。否則今日與甲國爭。抵制甲貨。異日與乙國爭。抵制乙貨。設與甲乙國同爭。又將若何。願國人思之。

### 消弭金禍說

民八九月作

金價之賤。爲近數十年所未有。其在閉關時代。金銀漲落。影響甚微。今則關係於國際間之金融甚大。歐美用金。吾國則以銀爲本位。然以銀元折合生銀。則銀元實爲本位之主位也。紙幣充斥之省。銀元以缺少而昂貴。今則以金賤而益昂。卽其他各省。亦受金賤之禍。其禍維何。吾國以金爲飾之陋習。至此乃大爲僨張。試觀各地方之銀樓金店。無一非其門如市。凡傭販力穡之民。莫不以數元汗血之資。爲購置金飾之舉。就武進一邑而論。舉市購置金飾之款。每日自萬元以至二三萬元。金價愈賤。購者愈多。以吾邑八十萬人計。其中半爲孩童及學生。及儉樸之士女。不染此習。其餘四十萬人。或以半數

已有金飾不再購置。則購置金飾者。當有二十萬人。每人以五元計。則已將一百萬之銀元。棄擲於無用之地。金自外來。以全國一千八百數十縣平均。每縣以十餘萬元計。則已喪失二萬萬銀元之活動矣。其間尤以農民受困爲甚。每一農民。少此數元之活動資本。其後必至典質俱窮。而商貨之流通亦窒。農困於野。商困於市。其爲狀何堪設想。所藉以獲利者。惟銀樓與典商而已。而用金之國。既以金易得吾國之銀元。轉移於在華之銀行。吾國人日惟仰其鼻息而困頓愈甚。經此損害。寧復有昭蘇之望。其爲禍之烈。乃不可勝言。吾願有識之士。與夫地方團體。速謀消弭之策。其策維何。一方推廣銀行儲蓄。一方勸阻購置金飾。使有用之銀元。不致利

源外溢。而於小民則養成其儲蓄性。且加增其生產力。一舉數利。盍亟起圖之。

### 論武進交通與商業之關係

民九八月作

吾邑地居滬寧中心點。陸路交通。東則滬杭。西則津浦。兩路皆有直接之關係。水路交通。西北由長江以達運河。南則由南運河以達宜興。深陽金壇。東南則由太湖以通杭紹。此爲吾邑水陸交通之大概也。

吾邑商業。以木豆布米麥繭紙棉紗糖雜貨綢緞洋布煤油爲大宗。木紙棉紗糖雜貨綢緞洋布煤油皆爲輸入品。繭爲輸出品。豆餅豆油色布（兼北方之愛國布南方之寧條布而言）白布及米麥爲輸出輸入相互品。以上各品。其銷



售金額。皆年在百萬元以上。溯其來源。木豆米麥來自長江上游。綢緞則蘇杭寧鎮。糖雜貨洋布煤油。來自上海。棉紗來自錫蘇滬。紙則來自浙紹。數其去路。繭則售於滬。他物則大宗售於江南之徒陽壇溧宜興句容。及江北與皖南各縣。近則由津浦路以售於魯省。此爲吾邑商業之大概也。

欲求發展商業。必先利用交通。而物產工藝金融貨棧。皆爲需要之圖。但不屬於本題範圍。又當別論。茲就商業上之交通論。一曰鐵路。二曰航路。三曰其他道路。

以言鐵路。吾邑除常州車站外。西爲奔牛。東爲戚墅堰橫林。奔牛則木豆米麥。常有自長江轉入小河以達於奔牛車站起運者。戚墅堰橫林。

則起運蠶繭外。米麥亦爲常年大宗。除此數站外。問有如丹徒縣屬之渣澤。應設新站處否。如江寧縣屬之孤樹村（今名棲霞山）擴爲大站否。聞無錫縣屬之石塘灣車站。本不在滬寧工程規定中。孟里孫氏知交通於地方有絕大關係。請求設立。至今利賴之。此於鐵路應注意研究者。

以言航路。吾邑運河。通江幹道。自丹徒越河口。歷丹陽以達於吾邑。餘如孟瀆溧港等河。均爲通江枝路。問有應聯合徒陽爲經常疏濬之規畫否。問有應將通江枝路改闢幹河之計畫否。通宜溧諸邑者。爲南河咽喉之地。常患阻塞。問有應自定西延政諸鄉。別闢途徑。以通漏湖。而避其阻塞否。此於航路應注意研究者。

以言其他道路。錫人有築澄錫馬路數十里之議。徒人有築瓜揚馬路三十里之議。徐海間有修築昔年驛路。以便淮揚徐海交通之議。問吾邑有無依據。修治道路條例。謀兩縣以上之交通。如由南鄉築路。以通宜興之張渚蜀山。圖天產商貨彙通之利益否。問有應於市鄉彼此往來孔道。謀放闊修築之便利否。此應於其他道路注意研究者。

### 武進自治今昔觀

民九十二月作

吾邑自治。市鄉自清宣統元年開始籌備。迄今十有二年。縣則始於民國元年。屈指亦將十載。民國四年。縣市鄉自治制先後取消。縣則歸納於縣行政署。市鄉則猶有重佐在。吾欲一覘地方今昔文化之進退。程度之高下。事業之盛衰。

舍圖書記載。其將何據。乃徵之於昔。邑乘雖在。覺與現時情狀渺不相關。而又無年鑑可供參證。然則吾將何所取資乎。縣既無機關存在。自治行政。悉屬之官。無論官之賢否。以非生長吾邑之人。欲其代謀吾邑自治。此固情理所必無。事實所難強。更何所用其較短絜長。無已。姑就市鄉一較今昔乎。吾邑三十六市鄉。戶口較多。事業較繁。經營較早。當以城廂市爲最。考其成績。有足資參證者。一爲市區測繪地圖。印行於民國二年。一爲市董事會報告書。印行於民國五年。求之其他市鄉。并此尙付闕如。故得此一圖一書。當視爲麟角鳳毛之可珍矣。自治事宜。不外暫行市鄉制第五條一至八項。如學務、衛生、工程、農工商務、善舉、公共營業及因辦理本

條各款籌集款項等事。其他因地方習慣。向歸紳董辦理之各事。今就市區全圖觀。此數年中。有無積極變遷之要點否。就報告書各項論。有無增進擴張之成績否。以言學務。昔無而今有者。市立職業學校、青年社、及所辦義務學校、常州紡織公司補習學校、勸學所設立之通俗教育館。昔有而今無者。市立宣講所、私立滌氛蒙養院、市立法政講習所。他如各校之精神程度。其爲進退優劣。則非吾所敢斷言也。以言衛生。則昔無而今有者。第二公園、武進醫院、及原有之清道。其爲進退優劣。則又非吾所敢斷言也。以言工程。原有道路。五載以來。修築至四千餘丈。擴充新築馬路六百餘丈。添闢新西門。以利交通。此皆爲差強人意之舉。足令市區地圖生

色者。然而改良街道。各戶之讓進。屢受打擊。且闔市工商所視爲交通命脈之運河。日就淤塞。而疏濬無期也。以言農工商務。昔無而今有者。銀行則有常州商業、富華儲蓄工廠。則有常州、大綸、廣新等紡織公司。恆豐麪粉公司。近且有小北門外增設絲廠之議。實業前途。不可謂無希望。然一較南通無錫。相去猶難道里計。且商品陳列所。又爲昔有而今無也。凡所論列。舉其大者。挂漏知所不免。當否更難自信。冀吾邑人之自省與共勉焉。

地方消費損害商業說

民十二月作

吾邑去歲各商業獲利者少。虧折者多。考其狀況。則爲銷貨不旺。帳款滯收。問其何以致此。則皆莫明其故。吾邑各業大宗貨帳往來。不外蘇

皖浙三省。時局之關係歟。無重大之兵禍也。年歲之關係歟。無荒歉之徵象也。究其真因。在於地方消費。舉其事項。其大者。曰煙。曰賭。曰娼。而衣服之奢。飲食之侈。婚嫁慶弔之鋪張揚厲。亦爲推波助瀾者也。與煙賭娼互相表裏者。演劇。攤簧。迎神。賽會。凡此皆煙賭娼之媒介。各鄉鎮爲尤甚。而訴訟紛紜。似不在消費之列。實亦消費之甚者也。今日者。輪軌交通。習俗所囿。不脛而走。觀於蘇皖浙一百九十五縣。（三省共計之數）三千數百市鄉。（平均每縣以二十市鄉計）消費之風。幾於大同。蒙此消費之損害。以農民爲大多數。而各業所賴以銷貨放帳者。則在於大多數之農民。農民之收入有限。消費之損害無窮。經濟既失其常度。結果乃中於商

業。夫此三省之農民。去歲收入不爲不豐。春之繭。夏之麥。秋冬之豆米。歲既非歉。價亦不菲。在歲豐猶若此。設凶歲當若何。言念及此。不寒而栗。能無急謀挽救乎。挽救維何。勿徒仰賴官廳之禁令嚴密。而尤希望士夫之切實化除。父老昆弟。幸毋視爲迂談。

#### 節消費以興公益論 民十二月作

天下事。由儉入奢。易。由奢返儉。難。不易之定理也。儉與奢。刻異。積財不用。如獲石田。天道忌盈。多藏厚亡。此爲嗇刻者說法。而非儉之謂也。苟其自奉甚薄。舉凡飲食衣服起居力守樸約。務實黜華。是爲得儉之體。而又於社會公益盡其身心之能力以圖維。出其正當之財產以幹濟。是謂廣儉之用。孔子之美夏禹。如菲飲食惡衣

服卑宮室數語。蓋美其得儉之體。廣儉之用也。今者社會消費之風。大有江河日下之勢。欲救其弊。吾人亟當振起節儉之精神以赴之。予前論地方消費損害商業。此僅在商言商。蓋既云地方消費。則無人不蒙其害。力戒消費。猶爲消極。以積極言。曷若節消費之資爲地方興公益乎。今試就吾邑應時勢所需要者三事。一曰交通。蘇社方有委託各縣調查省道縣市鄉水陸道里之舉。宜乘此詳確調查。規畫舉辦。水路交通如運河。歷丹陽以通丹徒入江。小河通江。與泰興口岸對峙。餘如澡港德勝。皆爲江水來源。亟與放關加深。經常尤須疏濬。白蕩寬濶。經周數里。使與運河接通。不特輪船往來。便利無阻。且可聚泊貨船。陸路交通。如北鄉脚接江陰。南

鄉毗連宜興。均應開築縣道。又如西塘懷德橋。成可築環城馬路。自原有馬路以達常州紗廠。經過大綸廣新兩廠。轉至恆豐麵粉廠。而與車站循迴脚接。天禧橋爲小南門西瀛里大街青果巷各市場衝要。改建平橋藉免阻礙。凡此交通要舉。水利則農田交通兩俱利賴。陸路則鄰縣市鄉。互謀發展。所望於節消費以興公益者一也。二曰植棉。吾邑爲宜棉之區。在昔西北各鄉。棉本土產大宗。故溯吾邑物產。必曰棉布糧食。自滬上機紗銷行以來。吾邑織布。舍手工紗而用機工紗。棉既僅供彈絮捲花之用。植棉者遂改種豆米雜糧。近以內地紗廠漸興。棉價遂增。植棉雖稍回復。猶未及昔時之盛也。然在昔盛時。如通江伊東伊西沿江各沙洲。植棉亦尙

不多今則吾邑已有常州大綸廣新紡紗廠三所以三萬錠之紗機年約需子棉七八萬石沙洲推廣植棉不患無銷售之所又況江陰無錫均有紗廠亦必以近便之故取材於鄰縣以十餘萬畝之沙洲每畝植棉二三石平均以二十元計年可得銀二三百萬元之收入若種美棉其利猶不止此各市鄉公所所當盡力提倡始以給發棉種開其端繼以擇優獎勵策其效農民之富庶即地方之樂利所關所望於節消費以興公益者二也三曰養成女子職業土娼林立多數因生計艱窘所致女子無恆業衣食所需盡責之男子中產以下鮮有不同歸於盡者瞻養之能力既窮無恥之生涯遂盛救濟之策旅館台基之罰辦固望於官廳嚴切實行即治

遊浮浪之徒亦當科以罰金而資爲儆戒寓禁於罰未始非治標之方然平心思之此種素無職業之女子不授以謀生之方法而徒禁止其爲娼非特不足服其心亦且無以善其後是宜速設女子職業養成所其性質與游民習藝所略同酌撥空閒公屋如養濟院之類擇定適當工藝如繡工縫工織工紡工之類出品則由各商號代銷收入工資餘利除酌提所費外爲之儲蓄以備出所謀生而一切管理材料器械飲食之所需由於縣市鄉共同籌措及各商業酌量捐輸凡屬土娼迫令入習一藝既成或介紹於私家工廠或令其親族領回自立有資淺風漸革蓋以禁令杜其滋蔓以教養遂其資生雙方設施庶乎有濟所望於節消費以興公益者

三也。

籌賑芻言 民十七月作

本年水災甚廣。各地求賑愈多。救濟之力愈絀。不得不廣開籌款之路。以爲補苴之方。本邑各市鄉沙洲水災甚重。茲擬賑災辦法數條。並加說明。以供衆覽。以各個人之餘力。救濟災民。本無損於私財。有莫大之功德。事屬簡易。何樂不爲。其亦好善君子所心許者乎。

一 婚嫁節省費用移賑。

今之婚嫁。鋪張日盛。無非爲門面計。但就器用。衣飾。儀衛。觀之。不合於典禮者甚多。國奢示儉。古有明訓。際此災荒四告。苟能節省經費。移助賑災。不特全活災民。且可轉移風俗。

二 子女初生三朝滿月節省湯餅費移賑。

父母之寶愛子女。人有同情。其始生也。望其長成。及其既長。望其自立。湯餅之費。無非歡宴親朋。兼祝嬰兒幸福。今值災民嗷嗷待哺。甚於嬰兒啼飢。有心人又何忍不以此宴樂之需。移拯此萬苦之災黎乎。爲子女種善根。卽所以爲子女祝幸福也。

三 生壽冥慶節省筵宴費移賑。

生壽爲親祝延釐。冥慶爲親資冥福。節費助賑。合於善則歸親之義。

凡此三項。事主並可登報聲明。請將賀分移賑。所謂推己及人。善莫大焉。

四 普通酬應宴會移賑。

舉凡消寒。消暑。公壽。俱樂部等費。移以助賑。化無益爲有用也。

五婦女衣飾移賑。

婦女宅心慈善。尤勝於男子。以故施捨祈福之舉。婦女爲多。衣飾移賑。非以已有之衣飾資助也。惟當此賑災孔亟。苟欲易一新衣。置一新飾。則姑以舊衣舊飾。延長其應用時期。而以其新衣新飾之資移助耳。

六小兒果餌費移賑。

小兒所需果餌之費甚微。但集腋成裘。不嫌壤流之助。爲家長者。苟於給費時。訓以移助賑災。是爲孩提培植慈善之根性。尤合於義方之教也。

七寺院經懺資移賑。

僧道諷經。爲人超拔罪惡。懺悔冤孽。所謂得人錢財。與人消災。皆善因也。酌量移賑。是謂

推善因以宏善果。

八商店中秋年節筵餅費移賑。

九工業重陽冬至節筵宴移賑。

中秋筵餅。爲良辰美景及時玩賞之意。年節筵宴。爲歲晚務閑相與爲樂之義。重陽冬至飲宴。則以酬其夜工操作之勞。惟值此哀鴻遍野之時。偶一念及。吾人當有不忍下咽者。移以助賑。於我則僅易盛饌爲便肴。曾無所苦。而於災民。則積少成多。全活甚衆。又何憚而不爲。

十各業整規神戲酒席費移賑。

各業整頓業規。敬神演劇。陳設酒筵。一以表設誓於神道。具臨汝無二之意。一以示廣播於公衆。聯共同允洽之情。今以此費移賑。而



以登報告白。或發布傳單。或官廳揭示。以代其手續。人必鑒其真誠。欽其樂善。恐較之陳陳相因之演戲請酒。轉覺耳目一新。易得公衆之助力。而整規且藉以永長也。

### 論縣署改建大門守法事

民十十一月作

吾邑縣知事公署。有改建大門之布告。日報紀其事云。警察分所會同市公所職員。勘丈署前東西兩方面各縮進一丈。經警所牌示承造工匠。遵章按照規定丈尺。依期興作。又云頭門中爲石屏。兩旁各開一門爲出入路。俟工竣後。將街心木照壁拆去。以免道路障礙等語。觀於此舉。不可謂非法治之精神也。吾邑市區放闊街道之定案。始於民國元年。其時屠公敬山長民

政市議會議決咨報。爰即公布施行。屠公首先拆讓爲提倡者。縣直街自有之屋。弋橋頂公有之屋。縣署輒砌照牆及署左右從屋。同時並令商店招牌。長不得有礙行人之首。闊不得出門簷之外。至今稱便。而放闊街道之根據。則始於清宣統間。鄙人爲城鎮丈自治總董時。丈量街道之舉。凡所述。爲吾邑市區。十餘年中整理交通之歷史也。曾幾何時。令人有不勝今昔之感。公署前木照壁之設。作俑於前縣知事某。致縣直街及東西橫街三路阻礙。屠公見之。時作憤慨語而無如之何。未幾而署左空地。遂有藍縷不完之破屋。重行發見。居民之建屋者。抗不讓進。亦時有所聞。甚至因反對橋梁改造。欄板縮進諸端。釀成人力車禁止通行之案。而茶擔

之羅列。小車之阻塞。及各種攤擔雜物之縱橫於街道者。觸目皆是。轉無人過問焉。凡此種種。皆爲損害交通之舉。以言時勢。各省縣競謀水陸交通。建設新道路之議。日騰於耳鼓。以言政令。省道縣市道路之制。久經頒布。以言地點。則居滬寧鐵道中心。近日交通部且有議設飛行機站之測勘。我乃以塞爲通。以退爲進。猶日盼地方之發達。事業之振興。何其南轅北轍之如是。吾人思之。能無爽然自失耶。國非法治。不能久安。奉公守法爲美德。中外古今之所同。吾邑乃有以守法爲辱。違法爲榮者。其亦不思之甚也。縣署爲一邑之行政官廳。能以守法示人民。謂其有法治之精神。夫豈過當。路政之交通。地方之興廢繫之。善乎此舉。願吾邑人之速自警。

醒。勿徒令官廳專美也。

### 武進塘市經常濬河商榷書

民十二月作

吾邑商市。向恃河道爲命脉。不特塘河南通宜溧金壇。北通江陰。西通徒陽。東通蘇錫。卽孟瀆澡港諸河。亦爲通江北泰興揚中各縣之要道。商貨帳欸之往來。均賴于此。而關河城河。亦皆爲地方所需要。自滬寧鐵道通行。於商市固有增加發達之益。惟是以鐵道爲與河道聯絡並進。則可有鐵道而遂謂河道無關得失。則不可。况河道之爲用。不僅係乎商市。且於農田飲料消防。尤有密切關係乎。吾邑雖有水利研究工程等會。但全縣水利。工多事繁。非一時所能普及。而吾邑塘河。自光緒年間。憚心耘先輩大加

挑濬後。已閱二十餘年。惟北塘及城河。曾於民國年間。經屠敬山先輩。暨沈子楨曾則先兩丈。先後施工疏濬。餘皆年久失濬。淤墊已極。待治甚急。竊謂塘河之濬治。商市關係最要。應由商會負責。關河城河之濬治。市區關係最要。應由市公所負責。急宜合組機關。經常濬治。定名塘市河工局。由兩機關公同推舉熟悉工程。素著信用者。爲局長。籌定經費。任用專員管理之。就管見所及。列爲程序如後。

規定塘河之起訖。

如西塘。自丹陽分界三板橋起至尉司橋止。

東塘。自尉司橋起至三官塘前十丈止。或至

丁堰鎮之丁塘港口止。南北塘類推。

塘河經過之各路支河。

詳見武進月報二卷十一號縣境內河流里數表。

塘河之長度。

如西塘自三板橋至尉司橋止爲六千七百五十一丈七尺六寸五分。東塘自尉司橋至三官塘前十丈止爲一千七百十丈五尺五寸。(據光緒年間惲心耘先輩河工徵信錄) 餘類推。

各段之闊度。

河道濶度。應於丈量後規定丈尺。並記各段最狹處。爲放闊之標準。以後建築碼頭駁岸水閣等。不得再行僭佔。以保公便。

各段之深淺。

必經測量。爲施工之標準。列表記載。經一次

濬治後。並試驗泥量之增加。有無差異。  
塘岸堆土之厚薄。

從前濬河。卽就塘岸爲存土之地。歷屆積泥甚厚。不特絆路行人。雨水冲刷。逐漸傾卸入河。且使以後濬河。無從放闊加深。非經逐漸削平。不可入手之初。應先丈量各段存土之厚薄。爲計算方數之標準。

規定通塞之。最次爲濬治之先後。

逐段施工。地點有最次要之分。卽河身淤墊。亦有最淺較深之別。

規定開深尺寸。

初次濬治。或用舊法開挖。以後經常施工。改用挖泥機器。以免斷壩厚水等困難。

計算挖泥方數。

挖泥運泥。爲全部主要經費。應以常年計算。非以一次計算。

調查挖泥機器之成效。

南通河道之來源自江者。潮流帶入泥沙。較吾邑尤甚。使用挖泥機器有年。成效久著。上海之蘇州河。用之尤久。應調查其何國製品。爲耐用。且省燃料。以便購置。

規定堆泥地點。

堆泥之地。(甲)租用。(乙)購用。(丙)指定蘆蕩或低田。訂約代爲填高。酌收填費。此可與陸路清道運送垃圾。聯絡辦理。且可招人設置磚窰。以存土供給燒磚之用。

購用輕便鐵道。

輕便鐵道。大工廠多用之。宣統元年。寧垣濬

治玄武湖。最近下關填地數千方。均用之。以十餘石之泥。兩人推運。其行甚速。否則運泥費重工多。且難及遠。

設置水巡。

其專責爲禁止煤灰瓦礫雜物垃圾入河。且監視規定停泊之丈尺。及船隻縱橫礙道。阻塞河路等事。

籌定常年經費。

常年經費。應需若干。開具預算後。其籌措項目列左。

(甲) 各業酌認。

由商會邀集各業公定。或按欸。或論貨。酌提釐數。業中自行收集。按月彙送本局安存。

(乙) 班船快船認費。

由市公所按月徵集送局安存。

(丙) 輪船按煤灰噸數認費。

由商會與輪局協定欸數。按月收集送局安存。

(丁) 轉運業及駁船之認費。

由商會與轉運公司協定欸數。按月收集送局安存。

(戊) 關係地之農田認費。

由市公所協商鄉公所。於附稅內定數撥助。按月送局安存。

(己) 碼頭駁岸水閣之認費。

由市公所邀集區董。定數列冊。按月收集送局安存。

(庚)省縣水利之補助費。

塘河係木省運河。且與關河城河均爲木邑水利所關。由商會市公所分別呈咨定數。按月撥月安存。

右所規畫。畧具概要。與從前濬河不同之點。試更述之。從前濬河。開挖土方。專用人工。今則人工加貴。管理尤難。故改用挖泥機。不同一也。從前運河起岸時。用人工挑載。工價甚費。不能及遠。且多狼籍。故改用輕便鐵道。不同二也。從前堆泥。多不擇地。卽就沿河傾卸。今則擇適當之地。力戒沿岸堆積。不同三也。從前河道。無人管理。故煤灰垃圾。任意入河。今則水巡監視。禁止糟蹋。不同四也。從前河道。任意僭佔。濘削日隘。今則規定闊度。逐漸放寬。不同五也。從前濬河。

積年一舉。費重工多。不特臨渴掘井。籌費爲難。卽管理工程。亦屬臨時僱員。今則經常設備。於籌費儲材施工諸端。均無困難。不同六也。從前濬河。必須斷壩。蓄水。春冬之交。正值商市重要時期。而欸貨運送。頗形不便。且於消防飲料。尤感困難。而遇入春雨較早。工作廢於半途。次冬繼續施工。耗費更甚。今則機器挖泥。悉免斷壩。蓄水重疊施工諸患。不同七也。河道爲吾邑命脉攸關。年久失濬。淤淺已極。若不急起直追。勢成廢棄。如吾邑何。竊謂現時地方事業之大者。要者。莫過於此。不揣固陋。具書商榷於父老兄弟。惟祈教正而施行之。總之濬河當有專責。不能兼司其事。須設永久機關。斷非暫行事項。定一蓄志數年。擬俟廠事就緒。卽行舉辦。詎以公

私營業。牽累失敗。遂致蹉跎歲月。貽誤事機。疚心曷已。所望我縣商會市公所。不辭艱鉅。奮起圖維。地方幸甚。定一敬爲吾邑前途馨香祝之。

敬告各市鄉

民二十十月作

縣市鄉自治。已告回復矣。回復之始。組織未備。遑云建設。雖然。後之實行建設。當自今日之回復始。回念自治停止。在民國三年。屈指計之。忽已十載。歲月如流。良可深慨。使非經此挫折。則淬勵圖功。與時俱進。十年之成績。當不若今日之蹙陋。然使悠悠無爲。敷衍從事。則雖名爲自治。與非自治等。不佞則謂果有淬勵之精神。則雖無自治之名。何嘗不可行自治之實。故知自治云者。在精神不在形式。吾人於此。可以深思。且以議會言。國會省會。固回復最早。然以吾人

對於時局之感想若何。創痛若何。則知敷衍之非計。而搗亂之更足爲害也。積市鄉以成縣。積縣以成省。積省以成國。吾人於此。當知市鄉與縣爲省與國之初基。未有縣市鄉不良。而省與國能克自樹立者。然則縣與市鄉自治關係之重要若此。吾欲言縣自路。當先言市鄉。

吾邑市鄉。共爲二市三十四鄉。人烟稠密。事項之繁劇。當以武進市爲最。當民國三年。自治停止後。曾編印第一屆報告書。不佞曾有百年之郵治。非一旦之所期。惟進行無間。始有積銖累寸之觀。豈期甫具萌芽。卽經摧折。然自治之絕而復續。在指顧間。至已往之成績。存亡若何。初立之基礎。變易若何。則俟來者之搜求整理。其難其慎。恐不讓於規畫調查時期之語。今則已

及其時。而二屆之報告未經編印。則依據市鄉制之五條八項。無從爲明確之比較。第就不佞平時觀察所經。現時記憶所及。請試言之。

以言學務。昔無而今有者。如義務學校。昔有而今無者。如蒙養院與職業學校。昔有而今較擴張者。如啓智雲溪等社。而公立學校之未能增設。私立學校如志超。如各專修校社。則亦爲昔無而今有。至公立學校之辦理成績。今昔比較若何。固別一問題也。以言衛生。如清潔道路也。解除污穢也。程度猶昔。而居戶之雜物縱橫羅列於道路。以阻碍交通。則固有加無己也。所謂修建公園也。第一公園爲昔所固有。第二公園則昔無而今有。而一加觀察。其囂雜穢腐。殊令人蹙頰不甯也。以言工程。如修建橋梁

也。中新橋之特建。天禧覓渡迎春西吊西北水關諸橋之改建。仁育葛仙鳥衣外虹顯子王興諸橋小北小南吊橋與府橋板橋等之改平。固昔無而今有。而改正修繕道路一項。新馬路之擴充一千六百餘丈。及全市二百餘處。計一萬四千餘丈之街道。不及十年。已修築十之八九。此固爲最著之成績。而西郊馬路。及懷德橋之建設。方始經營。吾人固願早觀成者。又如西瀛門之開築。亦爲便利交通之要舉。而拆卸城。定案年餘。至今猶在停頓中。且如建築公共房屋一項。則第一小菜場之至今虛設。等於昔有而今無也。以言農工商務。三紡紗廠之勃興。與麵粉廠之成立。此誠昔無而今有。東鄉之利民震華兩廠。將屆開機。爲地方所忻幸者。然以三



紡紗廠而忽停其二。惟餘大綸一廠及恒豐麩粉廠。足爲代表地方工廠之成效。寧不深惜。至如籌備水利一項。塘河城河。關係闔邑工商業之命脉。開濬萬難再緩。雖經大聲疾呼。而徘徊觀望。則固依然如昔也。以言善舉。如救火會之組設。貧兒院之創興。不特爲昔無而今有。良足爲自治前途所嘉賴。然如原有善舉。僅能竭蹶維持。而其他救貧事業。則固闕寂無聞也。以言公共事業。則電流較前發達。如電燈電話之增加。及電力營業行將實現。而鐵道電車尙未足以語此也。

不佞詎敢以一武進市概各市鄉。惟以武進市既有印行之第一屆報告爲依據。則自可得今昔之比較。且以例各市鄉。其狀況亦未嘗不大

致相同。故不憚辭費。瑣述以供衆覽。願議董兩會諸君。淬勵進行。以慰地方之期望。仰尤有進者。吾人雖非身任議董兩會之職務。而凡爲地方居民者。皆有促進自治之責任。不得專諉其責於議董兩會也。古語云。衣食蒼生乎。蒼生衣食乎。農粟女布。所以衣食蒼生。而粟之耕與布之織。固非一人一家爲之而勝任。則仍蒼生相互爲衣食。理固同也。至縣之貢獻。當別爲一篇。

### 武進縣商會報告書序

民千四十二年作

國之要政有三。教育以立國。農工以裕國。軍警以衛國。而所以縮經濟之樞。通農工之郵者。惟商是賴。商之於國。顧不重哉。吾邑商會。始於光緒三十二年。迄今歷二十載。編輯報告。有不容

已者。請言其故。創設商會。爲前會長惲公心耘。其時定一舉任會董。駐辦會務。所據爲準則者。農商部奏定商會章程二十六條。以其不甚切於商會要旨也。爰於宣統元年。江蘇諮議局。提議整頓商會案。咨請江督蘇撫公布施行。如擴智識也。本會曾設商會研究會。商業補習學校。英文函授社。並發行武進月報。創建圖書館。以赴之。如謀進步也。本會曾設商品陳列所。工商獎進會。推廣國貨團。以赴之。雖或以經費不繼。及時局倏擾。中輟停頓。爲憾。然既植其始基。卽爲後來求進之根據。此編輯報告之不容已者一也。至如開闢馬路。疏濬城河。皆爲商業交通。創立商團。有關商市防衛。頻年時局多故。尤爲地方所倚重。他如四屆辦理平糶。疊次救濟災

賑。以及補助青年社。地方醫院等。或以事關慈善。或以協謀自治。舉其得失。足資後事之師。亦爲前車之鑒。此編輯報告之不容已者二也。二十年來。本會以記載之積累。卷牘之浩繁。是宜擷取精義。彙輯成書。作一起訖。以免散佚遺忘。而尤足與各商會互相攷鏡者。屈計各行省特區一千八百餘縣中。其商會成績之優良者。不可勝數。使本會得以輦路藍縷之資。藉廣聲應。氣求之益。寧非至願。此編輯報告之不容已者三也。抑此二十年中。相繼任會長者。惲公心耘。惲公北生。錢君琳叔。及定一。與盧君錦堂。惲君禹九。凡六人。惟是惲公心耘。惲公北生。已歸道山。人事代謝。彌增感悵。然又有可喜者。則以惲君禹九。卽惲公心耘哲嗣。二十年中。有父作子

述之美。而本會報告書。即告成於惲君任期以內。謂非嘉話。實是資紀念耶。若夫編輯緣起。亦有可述者。定一嘗於民國七年。擬具本會報告書目次。欲請范君慎初任編輯。范君者。當本省辦理巴拿馬賽會出品協會告竣時。曾共編纂報告書。又曾獨任編輯武進市董事會報告書。當時因任他職不果。爰屬嚴君煥如。嚴君旋卒。至民國十二年。始由盧前會長與劉副會長堯性專聘范君任之。更歷三載而書成。此則編輯報告經過之事實。於以見成書之不易。而又可證有志之竟成也。

## 知非集卷二

武進于定一謹懷

五八

### 函牘

丹徒縣人民呈江蘇省議會請議

#### 減賦案

民二三月作

謹以租稅原則首貴公平。負擔輕重務使各得其宜。此固世界之公理也。丹徒地瘠民貧。賦稅較重。前者人民捲服於專制政府之下。二百餘年。冤無可訴。憤無可洩。遂致挺而走險。釀為擾亂。鬧漕之案層見疊出。幾於無歲無之。當光復時。縣署積存鬧漕案牘十餘箱。為軍民所共同焚燬。咸額手相慶曰。今而後民隱可達。民困可紓。此等不祥之物。可不再見矣。於是請求減賦。遂為全縣一致之進行。計自十六閱月以來。十八市鄉之會議。凡二十七次。臨時縣議會之會

議。凡十五次。公舉代表至南京臨時政府請求者。凡五次。至本省都督府民政府先後請求者。凡十一次。餘如前任楊張二知事及今于知事之文牘上呈。或赴省陳述。以謀暫爲挽救之方。聊紓目前之急者。其次數不能悉憶。闔邑人民。惶惶汹汹。奔走呼號。必求達此目的者。果何爲哉。豈不知立憲國民。以加增擔負爲天責。庸有持消極主義而求減賦者。是實不然。丹徒之減賦。非減賦也。求租稅之公平。求負擔之輕重得宜也。試先以丹徒地瘠之證據言之。

(甲)形勢 縣境縱橫各六七十里。自東北至西南。斜袤一百餘里。面積雖廣。絕少平疇。沃壤。西兩則峯巒起伏。高低不一。遠望堤塍。如鍋如釜。甚或如塔梯然。此山田之形

勢也。東北瀕臨大江。蘆葦叢雜。冬則江水枯涸。地高於水。夏秋泛濫。水高於地。此潮田之形勢也。

(乙)土質 田分山潮。土質亦因之而異。山田堅硬如蠟。古志已詳言之。今俗呼爲小粉土。馬碱土。謂其板重沈滯。不宜於耕種也。潮田本淤沙所積。漲坍不常。亦多不利於種植。

(丙)水利 大江以南。運河橫貫。僅爲普通航路。以外並無支河。卽間有溝塘。亦復易盈易涸。前清王仁堪太守治郡時。發給官帑。令民間自行擇地挑濬。甫經創始。易以彥守詠之。催索此款。深累吾民。自茲以後。雖有塘工之欸。絕無借貸之人。鄉間固有之

水利日就淤塞。未開之水利。不復有疏通之望矣。

(丁)弓口 大田四至。共計二百五十一弓六分。中田四至。共計二百二十九弓二分。小田四至。共計一百九十九弓七分。

(戊)地價 上則田每畝三十餘元。中則田每畝十六七元。下則田每畝五六元。

(己)物產 潮田有稻而無麥。山田則稻麥雙收。然粗硬不適於口。蕎麥黃荳。爲數無多。山芋蘿蔔。今亦稍稍發見。以外別無種植。

(庚)產數 豐稔之歲。上則田每畝產稻兩石五六斗。中則每畝一石六七斗。下則每畝五六斗。糯晚二稻。土質不宜。種者絕少。麥產適較稻爲半數。其餘雜糧。既無大宗。亦

無定數。不足以資考鏡。

六〇

(辛)物價 秬稻米每石計錢六千數百文。小麥每石計錢三千數百文。此見新之市價也。至於鎮江爲通商巨埠。有時米麥二價。或較貴於他處。此係轉運使然。非出產之天然昂貴。白當不在此例。且當此之時。操物權者。均屬外來客販。本地小民。收藏無多。非但無米可賣。而且轉買貴米以糊口。(說明)以上調查。自地價以下。均以民國元年爲標準。

次就丹徒賦重之標準言之。

(子)減則沙潮田。每畝征銀一錢四分七釐四毫八絲四忽零。征米六升八合六勺六抄八撮零。

- (丑) 減則沙潮地。每畝征銀一錢四釐三絲五忽。零。征米六升八合六勺六抄八撮零。
- (寅) 山田。每畝征銀一錢一分七釐一毫九絲零。征米七升二勺五抄五撮零。
- (卯) 園市地。每畝征銀一錢一分七釐一毫九絲零。征米七升二勺五抄五撮零。
- (辰) 蘆岸地。每畝征銀七分三釐七毫四絲二忽。零。征米六升八合六勺六抄八撮零。
- (巳) 山地。每畝征銀五分八釐五毫九絲五忽。零。征米三升五合一勺二抄七撮零。
- (午) 荒白地。每畝征銀三分九釐六絲三忽。零。征米二升三合四勺一抄八撮零。
- (未) 山塘蕩灘。每畝征銀一分一釐七毫一絲九忽。零。征米七合二抄五撮零。

- (申) 公莊潮田。每畝征銀六分五毫八絲七忽。零。征米一斗三升四合一勺六抄零。
- (酉) 公莊山田。每畝征銀三分二毫九絲八忽。零。征米六升七合八抄零。

茲以廣義狹義兩端相比較而證明之。

一爲廣義之比較。以本省各縣爲比較也。按元年江蘇都督公布臨時省議會議決核減賦額先從調查入手案內開蘇松常鎮太五屬田賦科則有二百數十餘級之多。其銀米並征者。最高則每畝米一斗九合一勺有奇。銀一錢一分五釐有奇等語。查丹徒銀米並征之賦則有超過最高則者。詳列於左。

(A) 沙潮田。(又名減則潮田)每畝征米六升八合六勺有奇。征銀一錢四分七釐四毫

有奇。

(按)沙潮田。額征米一斗三升七合有奇。前清同治十年減成前數。銀則未減。仍超過蘇五屬之最高則。

(B)公莊潮田。每畝征米一斗三升四合一勺有奇。征銀六分五毫有奇。

(按)公莊潮田。係前清勅建寺觀之產。祇征地銀。不征丁銀。故銀數較沙潮田爲輕。米數則超過蘇五屬最高則二升五合有奇。

(C)山田。每畝征米七升二勺有奇。征銀一錢一分七釐有奇。

(按)山田爲丹徒大宗。銀數亦超過蘇五屬最高則二釐有奇。

如上所述。爲顯著之比較。蓋本省六十縣。大約可分四端。地腴賦重。如吳縣華亭縣等。是地腴賦輕。如舊蘇五屬之其他各縣。是地瘠賦輕。如江北各縣。是若地有江北之瘠。而賦有蘇松之重。則丹徒固當之無疑義矣。一爲狹義之比較。以鄰境之丹陽爲比較也。丹陽與丹徒接壤。民情風俗。大畧相同。且有農民一家之田產。跨越兩縣者。藉資比例。較爲確切。茲列丹陽之標準如左。

(甲)形勢 平疇沃壤。一望數十里。

(乙)土質 腴潤而鬆。肥料之吸收較易。故徒縣之腐草敗灰。裝運至丹陽。即成一種無機物之肥料。如在丹徒。仍不可用。

(丙)水利 運河東環。練湖西注。包港白鶴。灤

迴旋繞。其中汊港紛歧。溪流蕩漾。旱則可  
厚。潦則可洩。

(丁)弓口 大田四至。共計三百十六弓四分。  
比丹徒田大一百十二弓八分。中田四至。  
共計二百六十一弓四分。比丹徒田大三  
十二弓二分。小田四至。共計二百三十三  
弓二分。比丹徒田大三十二弓五分。

(戊)地價 上則田每畝計洋三四十元。比丹  
徒田多十餘元。中則田每畝計洋二三十  
元。比丹徒多十餘元。下則田每畝計洋十  
餘元。比丹徒約多十元之譜。

(己)物產 秋收以糯稻爲大宗。秬稻所出。僅  
敷所食。間有本年種稻。來年種豆。互相更  
換者。土人歲得甚豐。故其餘植物。不甚注

意。

(庚)產數 豐稔之歲。每畝所收糯稻。上則田  
約計三石以外。中則田約計三石以內。下  
則田約計兩石。小麥黃豆。每畝約收一石  
五六斗。以丹徒較之。適成單雙級之比例。  
(辛)物價 糯米每石六七千文。秬米每石五  
六千文。小麥每石三千文之譜。丹陽斗斛  
較小於丹徒。丹陽一石。祇能抵丹徒八斗  
八升。若以一二乘之。丹陽物價。亦較昂於  
丹徒。

(壬)賦稅 每畝普徵三升五合有奇。比丹徒  
潮田。少完三升四合。山田。少完三升五合。  
地瘠如此。賦重如彼。嗟我丹徒。何以堪此。稽之  
載籍。六朝時代。已有生東吳死丹徒之諺。蓋謂



其地之不宜耕種。祇可作爲葬地也。抑更有特別之隱情焉。以地瘠賦重之故。農民終歲勤苦。所獲不足自給。於是耕種者祇有零星散戶。搢紳士夫。無復爲求田之計。城廂居民。絕少購置鄉間畝田。此其一也。以言災患。夙以江北爲著名。實則丹徒尤有甚焉。荒歲固荒。不荒亦荒。然其苦況之所以隱而不顯者。則以鎮江爲通商口岸。就形式上言之。則若有金玉其外之觀在。試思商埠與農田何涉。此又其一也。平疇沃壤。其利恒豐。徒邑綿亘皆山。平衍之區。率爲沿江洲地。水利未闢。終歲沒於巨浸之中。高資一帶。衆所共睹。他處之類是者。設非邑民。何能盡歷而灼知。此又其一也。至攷其賦重之因。其他由來莫能推測。自前清雍乾之世。東南漕輓悉由

丹徒運河出口。以達揚子江。清廷正供。雖取給江浙。而轉運之害。獨注重於丹徒。楨脚之費。挑河之資。旗兵駐防之月餉。冠蓋往還之供張。始則征之於民者。繼則加之於賦。此爲確可稽攷者。其時文禁森嚴。民間疾苦雖深。無敢代爲伸訴。間有二三耆舊。如殷輅等。不避鈇鉞。以呼籲於九重。文牘公呈。僅散見於私家載籍。而國史記錄不與焉。張玉書爲相國時。知其弊而不敢明言也。乃爲補救之法。忙銀折價。獨較少於他縣。各縣每兩定例二千文。徒邑每兩計錢一千四百九十六文。卽以宣統三年最後爲比較。江蘇各縣銀價每兩二千四百文。徒邑每兩一千八百九十六文。平均計算。約在八折之譜。咸同以降。洪楊役罷。元氣凋傷。各縣普減甚多。而徒

邑亦稍獲輕減。然終以舊額過重。仍難踴躍輸將。故小則徒留積欠。大則釀爲鬧漕。歷任府縣。深知民力艱虞。催征無術。故每年藉端報荒。隱謀調護。其後上忙完銀五成之外。下忙僅完一成。或數釐不等。光宣之世。遂成習慣。若遇災荒。仍行照減。至應行核減之理由。則終以格於成例。無敢據實聲明。著爲定則者。然攷其實征成數。徒縣稅則以定額表面計之。獨見其重。以財政實際觀之。未見其有益也。如果依據應減成數。明定賦則。剔除隱匿報荒。歲計收入。較有把握。預算支配。亦易著手。否則上下相蒙。成爲積習。不特於財政上絕無裨益。而於政治上風俗人心。實已受其隱患矣。雖然。上所云者。雖非明減。實爲暗減之確証。於何徵之一。爲銀價之較

各縣。每兩減輕五百四文也。二爲下忙之祇征一成。或數釐也。三爲若遇災荒。仍行照減也。夫地瘠賦重。雖爲徂民偏重之害。而暗減諸端。猶屬徒民獨有之幸。民國光復。方冀正名定分。依據應減之理由。爲正當之解決。乃自省議會議決。都督交議忙漕案頒布。遂有利不與各縣同沾。害則於丹徒獨見者。蓋以銀價言之。向之每銀一兩。作錢價一千八百九十六文。今則以銀幣一元八角。每元以一千三百文計。實須錢二千三百四十文。以按照定額征收言之。向之下忙一成。今則加增四成。在省議會謀征收之統一。原所以昭示大公。祇以會期匆迫。未及預爲攷查。遂使徒邑特別情形。無由披露。偏重之害未除。補救之利盡失。不特此也。他邑隱受減賦

之利。徒邑轉受加賦之害。此固省議會所不及逆料。而亦爲各縣所不忍坐視也。於是徒民驚惶駭顧。觀望不完。聯合討論。電牘交馳。其時光復伊始。地方財政。支絀異常。政用軍需。待款孔急。稍一停滯。危險立見。有識之士。乃一面開誠布公。勸導完納。一面呈請長官。減征成數。求劑其平。幸蒙都督垂援。一則曰酌量從寬。庶免向隅。再則曰賦額偏重。應行核減。故元年實征五成。二年實征七成。此固默察根源。暫謀補救之深衷也。今當正式省會開議之期。正人民仰望困苦昭蘇之日。用特瀝訴隱情。堅持二義。以爲請求之根據。一爲地瘠賦重。應行核減。前清拘守成例。故爲減荒。民國俯順輿情。自宜實行減賦。此一義也。一爲征收忙漕。以銀元爲本位則

可。因用銀元而使徒民損失從前補救之利益。則不可。補救利益既經損失。而不爲徒民減輕賦稅隱劑於平。則尤不可。此又一義也。用特陳請省議會。惟祈鑒此惓誠。迅予議決之。徒邑幸甚。

### 武進市公益事務所修理街道啓

民四六月作

啓者本市於清宣統三年定案丈量街道。中華民國元年定案改良街道。一爲預備修理。一爲放寬丈尺。凡所以謀交通而便行旅也。查放寬丈尺。久經實行。而修理街道。以絀於經費。未能早爲着手。深滋歉憾。查吾邑街道。爲方磚人字。及亂磚補砌。或加中心石條。全鋪石面數種。以全鋪石面最爲耐久。其次則中心石條。若方磚

人字式。則近日磚坯既次。兼以小車衆多。故易損壞。亂磚補砌。更無論矣。全鋪石面。固爲一勞永逸。特是經費較巨。須酌量地段次第爲之。其經費較省。則以中心鋪砌石尺一尺三寸橫闊之石條。(石尺合營造尺爲九折)兩旁仍將亂磚翻砌。不特可使小車推行於中心。兩旁磚街較能持久。且後日經費稍裕。換鋪全石。亦已得其基礎。此爲行之以漸也。本所經費艱絀。全賴

公衆合力爲之。今擬逐年規畫。酌量本所經費之多寡。攷察街道之現狀。爲提出修理之標準。茲於本年先行提出街道十二處。切實估計。需費四千五百五十餘元。本所籌備補助費十成之二。計九百餘元。其餘三千六百餘元。卽請住居左列各街道者。自行籌集。一俟集數報告本所。卽便合力興修。本所儲款以待。惟冀大君子熱誠贊助。以竟宏功。曷勝幸甚。列表如左。

街名	以丈爲單位		石料	石匠工料	理溝	費(以元爲單位)		附記
	長	寬				邊	合計	
局前街	四七·二〇	四尺	無邊面	三八七·〇四	三七·七六	一四·一六	四三八·九六	自娑羅巷口至營田廟未鋪石路計如上數
鐵市巷	三六·六〇	三尺	有邊面	二四一·五六	二九·二八	一〇·九八	二八一·八二	
新街巷	五六·一五	三尺	有邊面	三七〇·五九	四四·九二	一六·八四	四三二·三五	
磨盤橋	三五·四〇	三尺	有邊面	二三三·六四	二八·三二	一〇·六二	二七二·五八	上三處爲西瀛里大街出入要道損壞已極

織機坊	四八・〇〇	三尺有邊	三一六・八〇	三八・四〇	一四・四〇	三六九・六〇	全路一百十四丈七尺 尚餘上數未鋪石路
楊柳巷	五八・一五	中心石條 一尺三寸寬	一八六・〇八	四六・五二	二〇・三五	二五二・九五	是處衝繁較次故用中 心石條
化龍巷	二八・六〇	四尺無邊	二三四・五二	二二・八八	八・五八	二六五・九八	全路一百零八丈六尺 尚餘上數未鋪石路
周線巷	一一・〇〇	中心石條 一尺三寸寬	三五二・〇〇	八八・〇〇	三八・五〇	四七八・五〇	是處車行較直街為少 而街已損壞
早科坊	二九・五〇	三尺有邊	一九四・七〇	二三・六〇	八・八五	二二七・一五	全路五十五丈五尺尚 餘上數未鋪石路
廟沿河	八一・五〇	中心石條 一尺三寸寬	二六〇・八〇	六五・二〇	二八・五二	三五四・五二	自舜宜巷至渡船口計 如上數
西市河	一二五・〇〇	中心石條 一尺三寸寬	四〇〇・〇〇	一〇〇・〇〇	四三・七五	五四三・七五	是處車行較直街為少 而街已損壞
雙桂坊	一〇五・〇〇	中心石條 一尺三寸寬	三三六・〇〇	八四・〇〇	三六・七五	四五六・七五	是處為次繁
篋箕巷	四二・〇〇	中心石條 一尺三寸寬	一三四・四〇	三三・六〇	一四・七〇	一八二・七〇	是處為次繁
統計	八〇三・一〇		三六四八・一三	六四二・四八	二六七・〇〇	四五五七・六一	

說明

一 丈尺均以營造尺計算。一 石面四尺無邊每丈八元二角。三尺有邊每丈六元六角。中心一尺三寸寬石條每丈三元二角。理溝每丈八角。石面砌邊每丈三角。中心石條砌邊每丈三角五分。一 表中所列街道有沿河不須理溝者將理溝費除算。

## 武進縣商會爲寧滬鐵路行車愆

時致沿線各商會函 民五十二月作

逕啓者。滬甯鐵路行車晷刻。向稱準確。行旅便之。近來變更行車時間。爲與津浦鐵路聯合計。用意甚善。乃實行以來。自甯至滬之特別快車。屢誤時刻。僅就敝會長身經目擊者言之。本年十一月十三日。在常州趁特別快車。該車到常。應在五時三十六分。乃遲至六時十分。應於九時二十分到滬。遲至九時四十五分。又於十二月十一日。在常州趁特別快車。該車遲至六時五十六分到常。到滬則在十時。敝會長不常乘車。兩月之間。僅此兩次。均遇愆時。詢之同行旅客。則僉謂自滬甯變更行車時間後。各次行車。仍能準時。惟由甯至滬之特別快車。則往往愆

時。推究其故。則以津浦快車遲到。滬甯以守待乘客所致。竊謂滬甯津浦。同爲國家鐵路。兩路聯運。爲便利旅客計。爲統一路政計。意非不善。惟一路以不能整飭時間。致牽率他路愆時。則期期以爲不可。查滬甯鐵路。有慢車客車快車特別快車。及滬常甯常區間車之分。車價以特別快車爲最高。誠以行車縮短時間。非遇一等車站不停。其收入之數。將以增價爲補助。而旅客納此高價之車費。應享減縮旅行時刻之利益。理至公平。今則反是。納高價之車資。轉不能準時乘車。所謂特別快車。較之慢車。猶爲不如。此不應一聞滬甯守待津浦來車。最久以二小時爲限。而滬甯行車時刻表。絕不標明此次行車有猶豫時間。旅客以準時到站。守待無定時

之來車。每以所期之人。所約之事。至於延誤而損失。此不應。二。坐待既久。或苦腹飢。或愁寒冷。童稚啼哭。男女喧嘩。秩序紊亂。怨詈雜作。黑暗之中。頓成愁慘氣象。外賓之待車者。睹此情形。頗爲齒冷。路政不飭。騰笑中外。此不應者三。其尤爲可驚可慮者。登車以後。速率倍增。車中頓覺震動逾常。蓋將以已去之時刻。補償於規定之鐘點中。故僅就到常之時刻。以驗其到滬之時刻。即可知其途中絕塵馳駛之確證。晚間行車。本較緩於日間。今乃倍其速率。危險何似。且各站員役。服務俱有定時。過時服務。猶恐精神不能貫注。遇此無定時之行車。管理預防。尤難週密。設有疎虞。誰能當此重咎。以列車數千人之生命。視同兒戲。此而可忍。孰不可忍。此不應

者四。總之自甯至滬之特別快車。果因何種事由而愆時。吾人無從臆斷。但其往往愆時。則已爲人所共見。使果因守待津浦來車之故。則當思津浦之旅客何幸。滬甯之旅客何辜。津浦車何故遲到。滬甯車何故爲其所牽累。此聯絡時間之事實。其果爲滬甯所發生。則滬甯應於事前與津浦約定行車時刻之不能延誤。其果爲津浦所發生。則津浦應思本路之行車時刻有無準確之把握。其果爲交通部所發生。則應知兩路之管理人員。能否程度相等。斷無不問其內容如何。事實如何。卽貿然施行之理。似此情形。關係匪小。以旅客之感不便。其害小。影響於滬甯沿途商務。其害大。以旅客無端遭不平之待遇。其害小。以路政之不飭。貽譏於中外。其

害大。以稽延時間。致旅客受無形之損失。其害小。黑夜行車。轉增速率。於多數人之生命危險。其害大。言念及此。不寒而慄。敝會長爲國家路政計。爲滬甯沿途商務計。爲多數行旅生命計。不敢緘默。謹舉大概。陳明貴會長。請公推甯蘇滬三總會領袖公呈交通部。立予整頓。以免損害而保安全。敬祈迅賜示復遵行。

### 武進縣商會市公所呈軍民兩署

請拆月城文 民十十月作

呈爲遵照成案。續拆月城。呈請飭縣查案出示。派警保護事。竊查民國二年四月。武進市董事會奉武進縣知事公署訓令第一百六十二號。令開。本年四月二日。據市議事會呈報本屆春季常會議決拆卸月城。應由市董事會執行案。

一件到縣。據此。查城垣係國家所有。處理及執行之權。當然屬之官廳。惟縣制第五十二條。知事得將其職權內事務之一部。委任市董事會。或鄉董代行等語。月城坐落該區。今爲整理交通。公議拆卸。自無不可。委任該市董事會代爲執行。除批答外。合行令仰該市董事會。即便遵照代爲執行。並將辦理情形。隨時呈報等因。奉此。當經市董事會呈報先從小北門月城拆卸入手。先後呈報開工日期。並請出示曉諭。派警保護在案。嗣於民國三年自治停止。由本所接辦各項事業。即擬廢續前案。將大小南門月城。同時拆卸。並建築小北門吊橋。以利交通。曾經詳請縣署。先撥墊款若干。俟城磚變價籌還等情。旋於三年六月二十七日。奉縣知事公署批



開查拆卸月城。曾經前市議事會議決。由縣委任市董事會代爲執行在案。現在自治雖停。事業未便中輟。應仍委任該市董代爲繼續進行。將大小南門月城一律拆卸。小北門建築吊橋。並准由署借墊洋一千元。俟拆卸城磚變價。即行歸墊等因。嗣以撥款千元。未能卽行撥到。是以此項工程。亦即緩辦。惟小北門吊橋。因損壞已極。已於民國六年籌款修築。並於清宣統三年。民國七年。商會兩次呈請核准建築馬路。並請會同公所設立路工事務所。以資管理。自車站經過小北門。以迄西門市場。特闢新西門以利交通。於是共有城門七處。除新西門本無月城。及小北門月城已於民國二年拆去外。餘如東南西北門及小南門。均有月城。且小南門除

大城門外。並有月城城門兩座。近年常州工廠漸興。如振生電燈廠。常州紗廠。均設於小南門外。恆豐麪粉廠。設於小北門外。廣新紗廠。設於東門外。大綸紗廠。設於大南門外。而大北門外。亦有創設絲廠之議。對於月城之阻礙。深感不便。實以月城小門。距離城門較遠。守門軍警。住宿營房。均在城門之內。遇事喚請開城。無從接洽。如醫院電局。均設城內。遇有貨價漲落之發。電工人傷痛之就醫。以及趨赴夜車之需要。種種延誤。洵於地方交通。實業發達。大有不利。竊思防制宵小。重在大城之門。月城小門。本屬駢枝。一經拆除。可免種種障礙。在城垣大門。依時啓閉。完固如常。足資保衛。而原有城基。且可建造房屋。地價收入。於公中不無裨益。卽城磚變

價抵去拆卸工資。尙有多餘。足爲修葺城垣之用。殊爲一舉數得。亟應賡續前案。將大小南門東西門大北門五處月城一律拆卸。以便交通。爲特具文呈報。仰祈鑒核。令行武進縣知事查照成案。出示曉諭。派警保護。以利進行。實爲公便。謹呈。

### 致江蘇省教育會請保留四庫全

書函

民十二年八月作

逕啓者。閱八月二十八日報載。某君有以四庫全書押款說。並載某君勸止函大意等語。雖係傳說。不爲無因。教育部薪水規定在中央行政費內。以欠薪救急之故。爲飲鳩止渴之謀。使此書落於外人之手。事果屬實。痛恥孰甚。我江蘇省教育會。有倡導文化保存國學之責。豈能緘

默不言。急應電呈大部。阻止出押。在某代次長當守有則改之。無則加勉之義。尤應明白宣言。負永久保存之責。抑更有言者。四庫全書全部計三萬六千餘冊。二百三十萬頁。集一千五百人之繕校。歷十二年而成書。洵吾國文學之大成。唯一之國粹。今海內僅存二部。值此政局不定之時。皮藏所在。尤宜審慎。京師近以清宮不戒於火。古物焚燬。足爲殷鑒。故爲此書謀安全計。允宜遷地爲良。應請本會建議政府。爲一勞永逸計。將京師一部運移上海慎藏。上海爲中外通商要地。較無軍事危險之虞。其皮設卽在本會會所。而保管並無慮不周。似此偉大之典籍。實爲文化之精英。爲吾國謀所以保全之方。本會殊有當仁不讓之責。是否有當。應請公決。

施行幸甚。

### 致江蘇財政廳李若卿廳長裁厘

認稅函 民十四十一月作

吾蘇屢經軍事。羅掘俱窮。而需財孔亟。窘困狀況。昔所未聞。身當其衝。其難可想。惟是賢者出處。必有確乎不拔之精神。開源節流。維持整理。公固籌之已熟。無待緘生贅陳。茲所欲言者。爲裁厘一事。厘金害商擾民。無裨公家。徒資中飽。久經公認。清之季年。吾蘇盛倡裁厘加稅之說。未幾而諮議局告成。以加稅事關國際。非一省所能爲。然以未加稅而不裁厘。固因咽廢食。欲裁厘而無抵補。又勢所難能。於是決議裁厘認稅。蘇撫程公雪樓。蘇藩應公季中。均主倡導。徒以江督不甚同意。故先由蘇屬試辦。其時弟任

省議員。於省會與其議。兼任蘇屬自治籌辦處參議。於蘇垣復與其議。又以承乏常州商會。身任籌辦之責。以武丹厘局設於奔牛鎮。全年收入爲制錢二十一萬數千千文。爰集武陽兩邑各業分認厘額。日夕探討。隨筆記載。一月有餘。頓成巨冊。已得認數十九萬數千千文。不足之數。正議平均派認。通告光復。遂爾中止。而記載專冊。固保存於常州商會也。光復之初。湘鄂浙滬宣布裁厘。臨時政府又頒免賦之令。本省以甯蘇滬鎮清徐淮揚主客各軍。紛布林立。餉無所出。譁潰堪虞。遂由都督程公。南通耆老。協籌借款維持。一方由臨時省議會籌議裁厘抵補方法。結果議決改厘金爲貨物稅。先從蘇屬舉辦。推行甯屬。以求統一。貨物稅之主旨。在免除

重疊征收。於是規定一稅兩收之法。

(甲)本省產貨。起運時收半稅。銷售於本省者。

於銷場收半稅。

(乙)本省產貨。除起運時收半稅外。出省銷售

者。於出口時收半稅。

(丙)外省來貨。進口時收半稅。銷售於本省者。

於銷場收半稅。

(丁)外省來貨。除進口時收半稅外。通過於本

省者。於出口時收半稅。

而以裁厘認稅辦法。歸納於但書中。凡各縣無論一業或各業。有願年認稅額。由商會轉解該縣附近稅所者。聽其自便。省會報告。財廳卷牘。歷歷可稽。此為蘇屬厘金改辦貨物稅之大要也。於是舊為蘇松常鎮通太各屬之縣。沿用此

項辦法。以至於今。而甯屬以別有阻隔。則仍厘金之舊。迄未變更。其時弟以承乏臨時省議會財政審查會。公推主任其事。並將各貨捐則審查增損。以劑於平。爰邀集甯蘇滬通四總商會。蒞應諮詢。僉稱便利。即經大會通過。咨請都督府執行。都督程公任弟為財政司籌備貨物稅主任。會同籌備者。為陳君美南。姚君子珊。孫君煥庭。當經弟手訂進行日期表。以四十日而規畫成立。貨物稅十三總所。弟則純盡義務。不受薪資。此為民國元年春間事也。其時前省長應公季中實主財政。於籌備告竣時。以吳縣同里等三總所相屬。弟辭不任。又以武丹為弟桑梓之鄉相屬。復辭不任。又以推薦稅所長相屬。不獲已。遂以姚君子珊介紹於應公。而令任武丹

稅所長姚君至常。弟邀之與各業董咸集於商會。以去歲記載認稅冊示之。於是按業按額實行認稅。惟豆業以銷路正值銳減。懷疑未認。其後屢求認稅而不可得。深以爲悔。至認稅各業。雖歷年稅額屢增。然以過於過卡需索留難之苦。比較猶爲稱便。至弟當時之不願任辦稅所者。良以貨物稅爲變相之厘金。以迫於時勢而爲此。致未達裁厘認稅之本旨。引爲缺憾。夫既事與願違。宵復從而爲之。職此故也。今當我公主持吾蘇財政。又值政府明令裁厘。宜乘此根本擴清。敢爲吾蘇商民請命。竊謂裁厘必求抵補。抵補惟有認稅。着手方法。請以認稅裁厘爲主。明定章程。將本省所有稅所厘局。畫分區域。某所某局。應歸某某等縣共同擔負。按照現定

征解金額。令各縣商會分認。按旬解廳。商會則按數預令各業分認繳會。一區認定。則先裁該區局所。陸續施行。數月以後。本省厘局稅所。必能裁撤無遺。至商會辦理認稅所需經費。卽以原有各稅所厘局征收費補助之。或慮裁撤以後。商會容有不能解繳之處。則規定該區各商會負連帶責任。以此預防補救。稅款不慮無着。如是則公家之收入無損。而中飽之弊竇可除。商民之擾害永絕。此誠本省商困昭蘇之機會。而爲我公克自建樹之時期也。不揣冒昧。敬以經過事實。及代籌辦法。覘縷貢陳。惟祈迅賜省覽。採擇施行。不勝馨香禱祝之至。

致江蘇陳陶怡省長函

吾蘇水深火熱之餘。百端待埋。竊有所望。敢貢其愚。報載有改道制爲郡制之說。郡即舊府。朝三暮四。徒滋紛擾。省縣直接。行政最便。橫添塔級。多一承轉虛糜。其害小。多一梗阻機關。其害大。府之爲害。與道正同。竊謂教育實業財政各廳。本爲省長所轄。莫如恢復民元舊制。與省長同署辦公。實行佐治。裁撤省署各科。以免紛岐。而資迅捷。或猶病未能。則各廳暫仍其舊。而道制不可不廢。郡制萬不可行。所望於公者一也。統治之權屬之省。分治之責屬之縣。縣實親民。知事關係綦重。應請察其賢否。分別去留。不分省界。但求得人。宜於台端任事之初。與軍事當局明定用人權限。勿爲干涉。乃可措施。所望於公者二也。政學紳閥。劫持省政。應杜其漸。如謂

敷衍以聯感情。於事或能有濟。終致無可假借。轉成進退失據。是宜預爲聲明。凡有請求。必携書面。無取形式。但其事由。所允所却。悉登省刊。以示大公。乃免包圍。所望於公者三也。辦事時。間。明定勿濬。一爲接見賓客。如規定起訖時期。賓主共同遵守。一爲裁咨案牘。如日行公件。披覽復核。一爲集合商榷。如例案諮詢。析疑辨難。有資僚友共同討論。一爲規畫事項。如應興應革。必先規畫。然後施行。凡此四端。各定時間。任何忙迫。勿相侵占。才力精神。乃能應付。所望於公者四也。

### 志傳

#### 先府君朝議公墓誌

民四五月

府君諱成棟。字子雲。秉性誠懇。篤於孝友。先祖

考厚甫公。以道光二十八年戊申六月初五日  
子時。生府君於邑之西倉廂故宅。至咸豐十年  
庚申。值洪楊之變。府君隨厚甫公暨先祖妣浦  
太宜人。避地如臯縣之查家橋。時年甫十二。一  
夕猝傳冠至。府君與厚甫公奔走相失。昏暮中。  
陷於河干。驚呼無應者。厚甫公暨浦太宜人反  
厲。似聞耳畔有屢言速救者。反顧無所見。急循  
故道往覓於數里外。聞聲援出之。水已及腹。逾  
時且無幸。相與慶更生。若有神助焉。喪亂之餘。  
迫於謀生。即於如臯習銀錢商。年十九。爲肆中  
經帳職。肆主倚重之。吾邑克復。府君隨侍歸里。  
娶先妣黃太恭人。時故宅盡燬。厚甫公與先伯  
祖考蓮茹公。合設于成泰棉花土布行於城中  
西瀛里。府君佐理業務。勤慎有方。先祖嘉之時

皖江呂松雲先生爲吾家司帳。喜臨池。習董文  
敏書靈飛經。十餘年不輟。府君則習顏魯公書。  
相與切磋者久之。故府君書勢沉著。無一率筆。  
亦由所性然也。旋建新宅於楊柳巷。府君與從  
伯考子峯公。叔考子薌公。子春公。朝則入市。晚  
則歸宅。出入必偕。親愛之情。數十年如一日。從  
伯考叔考皆先府君卒。府君待諸姪尤加厚。光  
緒十六年庚寅。府君年四十有三。厚甫公卒。府  
君侍疾兩月餘。夙夜匪懈。越二歲。浦太宜人得  
喘疾。危甚。府君憂勞幾三閱月。光緒二十一年  
乙未。府君年四十有八。浦太宜人卒。侍疾尤久。  
衣不解帶者幾半載。自此而心力瘁矣。府君當  
中年時。信譽日隆。邑人欽重。如濬河平糶火救  
諸公益。皆盡力董其事。吾家所居爲河南廂。爰

交推爲河南廂董事。光緒二十八年壬寅春，大濬城河。府君早夕董治，不遺餘力。因是積勞成疾。以其年九月十八日卯時卒。享年五十有五。葬於邑之豐東鄉東青鎮楊家頭。先妣黃太恭人。同邑鼎臣公女。與府君同庚十一月二十二日未時生。卒於光緒三十年甲辰三月初八日巳時。享年五十有七。以其年冬十月啓府君之兆而合葬焉。府君生女六人。長適高。次適談。三適張。四適談。五適朱。六適沈。先後皆早卒。子三人。定一。禮文。智文。孫六人。樸、德、儒、劍、儒。定一出。澤、儒、禮、文。出。俊、儒、灝、儒、智、文。出。曾孫一人。孟寅。樸出。府君生平無疾言遽色。誡子以讀書明理。立身行己。要言不煩。定一每承庭訓。覺心胸頓開。於書畫鑒別甚工。所藏如董元宰行書。桂未

谷隸書。沈石田。張二水山水。邊頤公蘆雁。閔元錫人物。李復堂松石。皆稱精品。尤善鈎鐫。家有王虛舟大字堂額。何子貞行書楹聯。翟雪凡蘭竹挂屏。皆府君手自鈎摹鐫刻於木。而令漆工循跡所槩者。於技術夙所愛重。常喜修治時計鐘表。繪機件圖。附以說明。裒然成帙。嘗謂幼苦失學。使以童年習機械。壯必有成云。定一自少壯以逮中年。而儒而仕而商。宅心行事。敬承府君遺志。以綿清白於勿替。心之憂矣。日月于邁。大懼先德之湮歿不彰也。用敢以不文之辭。爲銜哀述德之舉。示後之人。以無忘其孝敬。

### 繼室張女士事略

民八三月在

嗚呼。行年四十有四。兩賦悼亡。溯元配唐女士之歿。距今不逾廿載。今又遭繼室之喪。天之厄



我何其甚耶。定一哀悼之情。不能自己。辱承戚友勸慰。終無以釋悲懷。女士蓋不僅內助。且爲益友。而今已矣。謹述女士往行。不知涕泗之何從也。女士名綺。字組完。一字巧霞。世居江蘇武進。政成鄉戚墅堰。父佩珮。公。母楊太孺人。十歲失怙恃。依叔父母以居。授以詩書。輒成誦。不忘年十五。精女紅。親串多譽之。堂叔母張太孺人。爲其胞姑母。女士以是亦時至吾家。言笑不苟。遇事操作甚勤。先大母浦太宜人器之曰。此女品性端慧。惜長孫已定姻。不獲爲予家婦也。定一年二十六。始補博士弟子員。元配唐女士卒。子樸甫十齡。先考子雲公謂先妣黃太恭人曰。欲爲長男再授室。安所得佳婦。先妣曰。舍張氏女復何求。先考頷之。是年十月。女士來歸。先考

詔曰。汝之室家。必賴汝婦組織完善。因賜字組完。謹與女士拜而受之。是時先妣患肝陽震動。臥疾甚苦。女士問安侍疾。輒爲之霽顏。不匝月。病若失。定一戲謂女士曰。新婦之賢。可已姑疾。女士報謝曰。吾翁之德。而君之福也。予何力焉。清光緒壬寅九月。先考棄養。與諸弟經理喪葬。女士盡哀盡禮。內政井然。舉室賴之。甲辰三月。先妣見背。適次子得儒產於上海婦孺醫院。甫數日。女士奔喪歸。因慟哭曰。姑愛我。乃病不能侍。殮不得視。罪通於天矣。自是抑鬱成肝病。丙午冬。三子劍儒生。定一奔走國。是不遑寧處。外而爲子擇校。內則摒擋家事。撫育孩提。悉委之女士。心力交瘁。實基於此。宣統辛亥。四子震儒生。女士以體虧失乳。震儒常多病。保抱攜持。心

力益瘁。民國元年。長子樸授室。悉以簪珥佐聘禮。僅留銀質鍍金針二。以其一爲常日飾。髻之用。遇有事。加插一簪。事過則藏之。舉凡環釧約指之屬。皆不復御。詢其故。則曰。國奢示儉。且己爲姑嫜。豈復需此。定一任丹徒縣知事時。勸偕往。女士不欲曰。於君事無益。徒多耗費。且諸子遷校亦受損。遂止。閱數月。再勸之往。則曰。聞君治事甚勞。宜有人分任瑣屑。曩者。悔未偕行。乃移寓鎮江。定一自公署歸寓。必夜分十一二時。日間未了事。或續辦至夜盡。女士挑燈烹茗。整理卷牘。無倦容。促之寢。則曰。與君有分勞之約。豈食言者。震儒旋殤。女士哀感彌甚。二年秋。寧鎮變作。勸之歸里。則曰。歸而心懸兩地。孰若在此。定一以教養諸子。惟卿是賴。勉之。乃含淚登

車去。三年春。孫男孟寅生。女士色喜曰。頻年憂患。得此稍舒積鬱。定一謂女士曰。吾二人倘年逾七秩。可望五世同堂矣。則憬然曰。君勿爾。以君所期。必子孫早婚。然損體育。減學力。甚非宜也。且予孱質。亦安敢望此。孰意此言竟成讖語耶。嗚呼。傷哉。是年夏。女靜芳生。定一主任江蘇籌辦巴拿馬賽會出品協會。適赴日本考察返滬。得家報。不暇歸視。但函詢安否而已。出品協會既開幕。函邀參觀。復書謂遊覽非所好。參觀無此識。何虛糜資斧爲。卒不至滬。是年冬。編輯出品協會報告書。既竟。女士謂循覽報章。時局日非。以君之力。滄海一粟。其何能濟。不如謝絕政途。閒居養性爲愈。定一深然之。四年春。就聘商務印書館。任出版部事。語女士曰。今而後息

影滬濱。以遂卿志。能偕往乎。女士以得儒劍儒  
在冠英兩等小學讀書。不欲於學期中易校。遲  
至五年二月。始移寓上海。長子與媳。仍居常州  
祖宅。以家事屬之。當春秋暇日。女士藝蘭植菊  
曰。既勤灌溉。則欣欣向榮。如培養子女。俾各遂  
生成耳。未幾患咯血。醫謂積年肝鬱所致。療治  
匝月始愈。七年夏。奉令以江蘇出品協會成績  
給五等嘉禾章。女士曰。觀君所輯江蘇出品協  
會報告書。復參證江蘇辦理巴拿馬賽會報告  
書。君之勞力固可嘉。以云成績。則猶多缺點也。  
定一愧謝之。女士之見勗。類此者正多。執意言  
猶在耳。人已云亡。嗚呼。傷哉。自染疾至溘逝。甫  
兩月耳。以舊歷去冬十二月上旬患痧癩。經旬  
病起。勸之休養。不應。數日。疾復作。寒熱不已。右

足時覺痠痛。一月後。元氣大損。津液日涸。大便  
不解者月餘。右足成癱而潰。兼以嘔逆時作。藥  
不能進。醫皆束手。不得已。賃舟伴送歸里。瀕危  
神識如常。但云胸次覺熱。以手微揭其被。問欲  
安睡否。應曰諾。爰作閉目安眠狀。惟不見其呼  
吸。撫之已氣絕。回顧時鐘。針指七時半。民國八  
年三月十日。卽己未二月初九日酉時也。年僅  
四十有三。傷哉。傷哉。屈計來歸十九年。無日不  
躬親中饋。浣濯縫紉。悉自任之。勸稍休。則曰。予  
不樂閒逸。君勿予問也。其婦工有如此者。性柔  
和。親族長幼無間言。雖對子女。無疾言遽色。而  
訓誡則甚殷。案頭有牙牌一具。適兒輩自校歸。  
略一玩弄。卽棄擲之。曰。母令兒輩近撻菹也。去  
春定一欲令靜芳入幼稚園。女士曰。女方五歲。

以月計之。尙不足四齡。可使先識字。明年入園未晚。因購商務印書館看圖識字女士日課以二三字。並爲解字義。已識百餘字。病中猶令劍儒於散課後爲靜芳溫理。其母教有如此者。十九年中。未嘗添置簪珥。平居多衣布素。尤不輕易新。曰。予父母早世。且物力艱難。得此已足。其節儉有如此者。寓滬四載。未嘗一觀戲劇。有時勸之往。則曰。閱報載劇目。不當於理者多。且詎可使兒輩見之。其端嚴有如此者。去冬。預約偕赴西湖。女士謂西湖誠佳勝。終當一至。但劍儒不能獨居滬。偕往則曠學。俟其畢業後何如。孰意此恨綿綿。竟成虛願耶。嗚呼。傷哉。夫賢母良妻。時不多覩。既遇其人。忍令湮沒不彰歟。定一德薄。且不文。何足傳女士。謹掬其平生事實以

告當世。伏願立言君子哀矜而表彰之感。且不朽。

### 前武進縣商會會長惲心耘先生

事略 民八十月作

先生名祖祁。字心耘。晚號萊叟。世居邑之青果巷。儀容俊偉。才畧過人。其出仕時。由州縣洊升監司。理繁治劇。所至有聲。尤以任福建興泉永道。保全廈門虎頭山基地。與日人爭執一事。最爲卓政。絕府屈於外力。致不得已而罷其官。先生義聲震天下。識者韙之。先生居鄉。好爲公益。遇有地方大事。輒力任其難。他人所不敢爲。不能爲者。先生毅然爲之。慎始圖終。無功不竟。不特一邑之所沾溉。卽舊爲常屬之八邑。亦多利賴。以言學務。如籌設常州府中學堂。自建築

以至開辦。集合款產。聘定校長。皆先生所主持。設立學務公所。勸學所及師範傳習所。法政講習所。就龍城延陵等書院。改辦武陽公學。創建圖書館。其間如城區冠英育志鄉區如道南溪南道鄉高山諸學校之改設。靡不有先生之規畫或助力在焉。以言實業。則創建武陽商會。勸導各業派人出洋學習工藝。創辦罐詰石印造紙等工廠。籌備常州府物產會。籌設商品陳列所。創辦和慎商業儲蓄公司。以言水利。開濬運河。東自丁堰以上。西至奔牛以下。數十里間。二十年來。交通便利。并濬孟德澡三河。至今農商感受其福。以言善舉。如清理城鄉積穀。救濟武丹沙洲水災。籌辦丁未戊申庚戌三次平糶。散放芙蓉圩等振款。先生皆主其事。公善堂之清

理整頓。尤嫌怨不辭。至憲政。則諮議局選舉及縣市鄉自治籌備。皆先生開其先。警政則建立保衛局。籌設警察教練所。以及巡警之成立。防務之壁畫。先生皆身任其勞。先生年逾七十。神明不衰。見義勇爲。老而愈篤。考其事蹟。於地方至有關係。豈僅爲商界同人紀念已哉。先生以民國己未六月二十日。卒於家。享年七十有七。同人與先生相處久。於先生所任各事。皆在目擊之列。謹就所知。述其梗概。至其大且詳者。則有先生之傳記在。非此篇之所能賅也。

馬春帆先生傳

民十三年二月作

先生諱文壽。字春帆。性誠篤。童時不好嬉遊。恂恂如成人。父漢英公。母方太孺人。生二子。次曰文煥。字春塘。先生其長子也。咸豐庚申。公年十

八。四月。粵寇陷常城。舉家十二人皆失散。先生被虜數載始釋。同治癸亥。常郡克復。與弟先後旋里。輾轉探訪親耗。始悉方太孺人避居前橫鎮。餘人皆無聞。至則太孺人已於庚申十月病卒。惟餘邱墓而已。乃相對痛哭而歸。當被虜時。賊叩知所學。因責以教讀。先生固置死生於度外者。亦相與安之。惟念骨肉流離。輒潸然飲泣。以守者嚴。不得出。至是以遭亂厭世。遂萌不娶之念。同治庚午。先生年二十有八。春塘公少二歲。先生以馬氏不可無後。爰爲弟授室。即節母屠太夫人也。越二載。生子潤森。遂以爲嗣。而不娶之念益堅。更越一載。春塘公卒。時喪亂甫平。猝遭慘變。卹嫠撫孤。困阨百端。先生志慮寧靜。處之淡然。其後二十餘年。潤森漸能成立。由工

商業起家。爲節母屠太夫人建祠請旌。而奉先生居滬。以遂迎養之願。先生乃顏其所居齋曰樂我天真。其襟度之夷曠可概見矣。先生平生喜飲酒。不常醉。年八十。稱觴海上。神采奕如。今歲上元節。晨起。言動如常。午後一時許。忽倦欲眠。迄無病徵。須臾而逝。去來了然。其殆有夙根而不昧前因者歟。先生生於清道光二十三年癸卯三月初五日子時。卒於民國十三年二月十九日。卽甲子正月十五日未時。春秋八十有二。予與潤森交。悉先生行狀。因據實而爲之傳。論曰。予聞馬氏自宋南渡時居常。元明以來。代有隱者。如元一坦然。皆爲高士。先生豈其流亞耶。何相忘於名利若此也。昔林和靖隱於孤山。恬淡好古。不趁榮利。終身不娶。而教其猶子成

進士。蓋隱居求志。行義達道。使彼我之間。各得分願焉。可也。嗚呼。可以風矣。

余君幼舫別傳

民十四十月作

君諱大鴻。字幼舫。與予同居邑之楊柳巷。其先祖伯初先生。爲名醫。與先祖厚甫公友善。有吳姓以居宅畝許出售。兩家共購之。中界以牆。分爲二宅。故予與君爲比鄰。君少予二歲。童時嬉戲。契合無間。君性警敏而貌魁碩。力猛聲洪。年十二。從同里沈友卿先生學。詩文多奇氣。一日課以詩。有句云。白鶴一雙依谷口。見人飛入亂山中。師激賞之。與羣兒角。振臂一揮。輒仆數人。年十六。赴鄂。入武備學堂。畢業試第一。鄂督張文襄之洞。及巡撫端忠愍。方皆稱爲將材。光緒壬寅。君年二十有五。任愷軍第三營管帶。愷軍

素驕縱。第三營尤甚。文襄以君治軍嚴。故屬君整飭之。不三月。規律肅然。士氣大振。尋晉標統。爲張彪所忌。君乃去鄂而觀操於日本。忠愍督兩江。召之歸。復任以標統。光緒戊申。皖撫朱家寶求將於江督。任君爲協統。君素主君主立憲。而非視革命。謂吾國專制久。當以此爲過渡。譬之病者。元氣久傷。若以猛劑治之。殆所難堪。恐病未愈而元氣絕矣。熊成基主革命。乘孝欽后與德宗之喪。爲變於皖。勢甚張。君率軍撲滅之。其致怨於黨人者以此。宣統辛亥。君隨忠愍入川。川督趙爾豐任爲前路防軍統領。赴防夔州。道經瀘州。土匪搶擄。君率所部二百餘人擊平之。聞武漢事起。嘆曰。清廷失政。感悟無方。志士救國。迫而至此。成則宜若國運一新。然躓等以

求。民智未逮。恐流血慘劇。正不知何時底止。事若此。復何言。將本予救國之天責。舍己以從人耳。鄂督黎元洪。夙重君。招之來武昌。襄軍事。清軍攻漢陽。武昌危。君與孫武等。以使命赴清軍。與主者商和議。竟成約而還。然忌者多以君昔年皖事爲齟齬。遂去鄂返蘇。是時吾蘇以蘇滬寧鎮清徐淮揚軍隊林立。非謀統一。必生事變。同里莊公蘊寬方督蘇。予囚建議。非君不克當此任。莊公然之。而爲忌者所沮。適鄂督薦君於袁總統世凱。電召入京。袁夙耳君名。任以諮議。並補少將。癸丑夏。江西軍事起。鄂督使部將歐陽武爲護軍使。統贛軍鎮南昌。政府命君資護軍使印赴贛。過鄂。黎使參謀湯則賢副之。君以國基甫植。不堪再革。陳說大義於贛軍主者。不

聽。別將何子奇謂君雄武。不可輕釋。囚君脅降。君誓不爲動。遂以六月二十五日遇害於湖口。棄尸江濱。義僕陳大純潛抱置中野。而誌君姓名於鴟夷間。及事定。贛宣撫使段芝貴禮葬之城西神仙洞。政府命追贈中將。並予建祠立碑。以彰其烈。當君徇義時。子奇縛君使跪。君憤罵不屈。遂腰受刃創。毒斫數下而逝。時年三十有六。其師沈友卿先生挽以聯云。聞瑟在門。仲由不得其死。免胄入狄。先軫竟喪其元。可謂有餘痛矣。君夙負將帥志。於孫吳兵法。戚氏新書等。幼即誦習。其長於軍事學。蓋出之天性。光緒壬寅。君旋里。每談戰守訓練法式。豪氣縱橫。令人有聞而起舞之概。宣統己酉。君因事至金陵。相晤於江蘇諮議局。抵掌談國防省防諸計畫。其



於世界現勢。水陸地理。瞭如指掌。尤足使聞者傾心焉。由其志篤學粹。故能專精若此。其治軍也。主寬猛相濟。嘗語予曰。兵士有小過。治須嚴。大過。則戒而赦之。蓋小過不戢。必釀大過。若遇大過。察其情有可原而原之。則必感激而效死。故凡驕縱之軍隊。得君蒞治二三月。率皆帖然就範。君勤於訓練。每操演。以身先之。講論則若師弟。誥誡則若家人父子。又於部下。別有精詳記載。姓名年籍餉級外。凡其人之性行家屬資產生計。備錄之。每至令節或歲暮。兵士之窘迫者。輒爲籌寄贍養資。俸給有不足。繼之以借貸。借貸不足。繼以典質。夫人爲宜興名族儲氏女。明大義。於君所爲。畧無吝惜。以助成君志。故其所屬之愛戴。迥非尋常所能及也。嗚呼。君往矣。

君之英姿偉畧。猶日留予心目間。其生平之大者詳者。有國史及家乘在。予惟即其軼事爲所知者紀之。以盡後死者之言責耳。

### 紀事

#### 南通廣生榨油廠參觀記

民九十月作

張齋庵先生之言曰。南通產棉。吾利用棉以興地方實業。次第規畫。自大生紡廠始。紗既紡成。織廠隨之而成。以紡織機械之增修。外求不便也。因設資生冶鐵廠。以軋花所餘之棉子。大可利用也。因設廣生榨油廠。以通棉應國內外之需求。將不敷供給也。因從事於墾植。推廣種棉。吾於通棉功用。似可無遺憾乎。然榨油以後。棉子之渣滓成餅。專售於日人。彼知吾國農民之

不信用棉餅。舍彼無所售也。則任情操縱。而吾固無如之何。今惟有以棉子榨餘之渣滓。供造紙之原料。造紙廠成。斯竟通棉之功用。吾乃無負通棉矣。先生之言如此。予參觀廣生榨油廠。因述其緣起而記其順序如下。

(甲) 篩塵機 篩去棉子中之雜質。去其塵土。并去夾入之棉朶。如雜有鐵釘之類。機中有磁石引去之。

(乙) 去棉機 機中有密布鋸齒形之轉軸。剝去子上餘棉。機前置鋼絲機。使剝下之棉。成爲花捲。可紡粗紗。每石花捲。現時售價十二三元。紗可織線帶。

(丙) 剝殼機 以機剖殼。並分拆殼與肉兩途。流出。不相和混。

(丁) 碎肉機 肉自剖殼機流出後。卽入此機之軋牀碎之。

(戊) 蒸熱機 自榨機出後。卽入此機蒸熱。不熱則油不易出。且渣滓亦不能凝結成餅也。

(己) 榨油機 榨油機卽係成餅機。油入地池。渣榨成餅。餅與油同時製成之。

(庚) 磨邊機 榨機之鐵版爲方形。餅邊未及榨到者。切下入機。磨碎後再榨。

每一手續。均用升運機。循環無間。自棉子入去塵機。至榨油成餅。僅數分鐘耳。

油既入池。以旁浦打油入鐵桶。每桶可盛千石。記其何日起盛。至十日啓桶。裝篋出售。

棉油以石灰提淨。油爲食品。餅則肥田。不能飼

豬以太膩故。日人於餅中提出他質致用。而以餅之粕爲食料。西人則購毛油（未提淨之油）提出他質。一爲萬士令。作粧飾品。二爲石油。製洋燭用。三爲胰皂料。其提淨之油作食品。較橄欖油稍次。亦上品食料也。

廣生現聘精化學之德人在廠提油。較土法爲勝。毛油價與淨油彷彿。但不能不稍提淨油。爲應酬內地貿易計云。

廣生榨油機。每日夜可榨棉子二千石。每石出殼三十斤。餅四十斤。油十二斤。原動力爲引擎。馬力一百餘匹。現以棉子存貨不多。每日僅榨一千石之譜。

棉子之殼。售作燃料。較煤廉三分之一。全廠贏餘。去年獲利七萬元。經理高雲翰君。武進人。已

經辦十餘年云。

### 創建商會圖書館記

民九十一年作

武進縣商會及圖書館。在吾邑城中雙桂坊。西通公園路。地係延陵季子祠基。商會創於清光緒三十一年。惲公祖祁爲領袖紳董。其明年商部頒定會章。公舉惲公爲總理。部復加劄任之。圖書館創於光緒三十年。爲定一與莊君俞劉君志揚所發起。其時圖書館借設於鐵市巷某宅。商會則借設於附近之磨盤橋錢業公所。光緒三十三年。建築會所。費銀五千三百元。悉惲公所籌集。其款除原有蘇綸廠股售銀一千二百餘元。何君承燾捐銀一千四百餘元。各商業捐銀一千八百餘元外。益之以典業息借銀二千元。由商會分兩載清還。足成之季子祠基計

地二畝八分七釐六毫一絲二忽。會所建築用不及半。宣統元年。憚公復就餘基建圖書館。費銀四千九百餘元。以其猶子憚君毓嘉捐田九十五畝。售銀二千一百八十元。並以志書餘款及自捐銀足成之。綜計憚公長商會者七年。定一以振正衡。皆自創設。迄今更迭爲會董會長。嘉穀則掌書記最久。定一又於創設圖書館爲發起人。故皆深悉其緣起。民國八年。憚公謝世。同人開追悼會於商會圖書館。因念創建之勞。謂不可無記。爰立斯碣以誌其顛末云。民國九年十一月日。武進縣商會會長錢以振。副會長盧正衡敬立。前會長于定一述辭。書記長李嘉穀書石。

## 興城遊記

知非集 卷二

民國十四年四月四日。予自北票鑛廠乘錦朝車至錦縣。下午三時。欲乘京奉車至營口。已不及。遂乘西行快車赴興城。調查煤銷。七時許抵站。站在興城西門外里許。爲運貨便利計。煤商五家。皆處於此。城郭頗完整。南市城中爲盛城之中心。有鼓樓。駐此。則四門皆見。蓋自鼓樓至四門。均相距百餘丈。故一覽瞭然。縣有商會。在城北門內。五日上午。往晤會長何君際周。詢知糧食與煤爲大宗商業。油坊七家。冶鐵八家。燒鍋三家。磚窰二家。年皆用煤甚多。居戶炊爨用煤。以冬季爲盛。其餘商業。如綢布雜貨零星而已。有印刷店三家。均鉛印。學校三所。一女校。二男校。皆兩等小學。耶教另設一校。詢以圖書館及公園。則尙缺。如有電話數十號。而電燈尙未

設興城昔爲寧遠州治。民國之初。改設縣治。下午赴煤商各家接談。調查既畢。聞城南有溫泉。距城約四里。爰乘驛車往遊。予寓西城。因自西門出行里許。見有崇閎壯麗之新第。御者云。此爲前直隸省長王承斌所築。工甫竣。未能居。而直軍敗。今猶空屋。因憶去夏。曹銳築巨第於天津。未竣而敗。且銳死。遂無居人。昔人過伯有之門。輿嗟生莠。予謂伯有始居室而後亡。今乃不能一朝居。其朝榮夕萎。曾伯有之不若。彼軍閥政客官僚。亦有感於此否。又行二里許。一山當前。下有清溪。水色澄澈。蓋山泉也。山名手山。但形殊不類。何所取義。不可悉。山之陽。有屋數十楹。御者指爲湯泉寺。寺前有大樹一。護以垣。視之爲榆。寺已摧敗。入則有廣方盈丈之泉池。以

石爲欄。蒸汽沸騰。噴湧跳珠。泉清見底。底積碎石。以手探之。熱尙可忍。泉之來源。蓋在手山。寺設浴室三。一女子。二男子。惟男子浴室。各懸一牌。曰官長浴室。曰兵士浴室。則皆奉軍之所爲。視之。則兵士室中垢敗不可耐。官長室稍清潔。有二人浴於其間。軍衣雜弛於榻。蓋所謂官長也。皮簧雜作。聲震耳膜。令人生厭。此等叫囂惡習。固不獨兵卒爲然。予於南北各地浴室中。時聞之。惟壁間有表。爲某日某隊入浴。一周分輪。尙爲有序。室後濁流停瀦。幾成汙池。卽浴水所洩處。胡不導之入溪。於以見寺僧之不善管理也。寺中正殿。供佛像。左室有土像。不知名。匾額縱橫。皆因浴愈病。以答神庥者。不知溫泉有硫質。能殺肌膚微生物。而歸美於神。固無識之陋。

俗使然。寺距海約三里許。寺前平原遼闊。出寺南望。海水動盪。沿岸雜樹紛列。聞海濱有釣魚臺。未及往觀。并不知爲何代何人之遺跡也。邑中糧食百貨。皆出入於此。則又爲本邑之商港焉。歸途自南門入城。往觀孔子廟。廟有碑六。在櫺星門左右。分列二亭以覆之。其左亭第三碑。爲清道光二十八年知寧遠州事溧陽強上林重修文廟記。其詞云。考興京志。廟建於明宣德五年等語。寧遠無州志。改縣後。亦未創修。君子愛其鄉。愛必有其由。若不悉其鄉之歷史。則繼往開來。莫溯源委。愛何自生。寧能無憾。其右一碑。爲去歲邑人記述王承斌重修文廟事。自禮門義路入。已修葺竣工。惟櫺星門未竣。自門而進。爲泮池。左爲名宦祠。右爲鄉賢祠。再進爲戟

門。爲甬道。爲坡臺。正殿三楹。東西廡亦各三楹。正殿懸清聖祖御書萬世師表額。字幾盈丈。後爲啓聖宮。金碧朱漆。煥然一新。所植槐柏。參天合抱。皆明代物也。廟之左側爲勸學所。廟卽歸其保管。聞王承斌以五萬元修廟。竊謂尊崇祀典。以數千元爲修葺費。使無廢墜可矣。以此巨款創設圖書館或邑志。爲邑中文化之導源。不猶愈於此。惜其不及此也。是日爲清明節。南望先塋。未能祭掃。不禁泣然。口占一絕志感云。春風吹不到遼陽。三月郊原尙草黃。未得先塋歸祭掃。但揮清淚憶家鄉。六日上午十一時。趁京奉東行快車。晚抵營口。

### 頌詞

謝氏新居落成頌

濟經先生二十餘年舊交也。經營商業。具有幹才。尤以宅心誠篤。見義勇爲。爲鄉黨所稱道。際茲一陽來復。忻逢大廈告成。覩甲第之宏開。美哉輪奐。卜壬林之永錫。俾爾熾昌。爰集易林。允符吉頌。頌曰。

執義秉德。君子是則。擴然大通。倉盈庾億。芳澤肥壤。宜利居止。四序允釐。駕福乘喜。南山高岡。松柏棟梁。歡喜堅固。居之寵昌。麟趾鳳雛。千門萬戶。長樂行觴。鵲笑鳩舞。

陳甲珊先生  
劉曼殊女士  
婚禮序言并頌  
乙丑閏夏

原夫禮敦婚媾。聿昭萬世之經。詩誦絲緡。永合百年之好。是以周南寄興乎關雎。敬仲叶占乎鳴鳳。種玉則稱賢雍伯。盈門則致美韓侯。攷之

於昔。曾傳六禮之告成。徵之於今。洵合五洲而大備。則有海城陳甲珊先生者。子貞封翁之哲嗣。星樓中將。祝三司長之介弟也。蘭陵劉曼殊女士者。厚生次長之令媛。葆真會元。葆良編修之猶女也。是華宗佳子弟。爲奕世好家庭。遼瀋以名都見稱。人倫允推師表。武陽乃文化所萃。女學具有淵源。先生則超心鍊冶。比出玉於崑岡。豪氣橫縱。方元龍之湖海。女士亦令嫺宿學。才名不讓阿兄。中壘家風。列女夙多佳傳。固已蜚聲南國。延陵早瞻丈人之峯。坦腹東床。逸少允當快婿之選。時維首夏。地屬京華。良緣恰締三生。二姓結朱陳之好。端午先期六日。同人躋慶賀之堂。桃李實而詠禮花。標梅聖而逮吉日。照眼槐雲榴火。好音諧高蔭之新蟬。滿庭翠竹

碧梧麗景絢畫屏之孔雀。正時序清和紀閏。風日晴明。看人花照耀成雙。瑟琴靜好。宜乎蕙心紈質。爭傳詠絮之才華。玉潤冰清。妙擅乘龍之聲譽。從此闈闈雍睦。同心載咏。雞鳴。行看桂馥蘭芬。獻瑞爰賡麟趾。敬集易林。虔申頌藻。詞曰：芳花當齒。景星照堂。仲春孟夏。麟遊鳳翔。嘉我淑姬。常樂允康。配我君子。爲國寵光。頌聲並作。文定吉祥。子孫千億。福祿久長。

### 祭文

#### 祭馬春颿先生文

維中華民國十三年歲次甲子正月宜祭之辰。寶興長總號。寶成上海第一紗廠。寶成上海第二紗廠。寶成天津第三紗廠。蘇州寶通紗廠。上海寶源造紙東廠。寶源造紙西廠。同人等謹以

香花清酌。致祭於馬公春颿之靈曰。嗚呼。滄桑歷劫。過眼雲烟。大地空花。朝鮮夕蕪。太上立德。得天獨全。不隨物盡。不與化遷。懿歟。馬公。毘陵望崇。弱不好弄。譽擅黃童。徇齊敦敏。僉稱亢宗。時丁陽九。天降鞠凶。潢池鼎沸。家室飄蓬。赤眉憐孝。黃巾矢恭。身雖淪陷。禮意則隆。皋比坐擁。絳帳儼同。睠懷骨肉。雪涕臨風。泰堦泊平。郡城初復。二難言旋。友于誼篤。訪求親耗。殆遍鄉曲。椿樹天涯。存亡末卜。萱蔭已凋。蓼莪廢讀。喪亂飽經。心如槁木。名利都蠲。拒婚免俗。和靖希蹤。孤山梅鶴。抗志淵明。栗里松菊。誰延宗緒。仲氏是承。好迷淑女。六禮告成。亦越二載。麟趾爰賡。遂爲公嗣。手足縈情。陡驚噩耗。痛失原鴿。孀孤撫育。困阨頻仍。公曰無傷。樂天知命。二十餘年。



處以淡定。蘭玉敷榮。境斯遇順。小阮承家。門庭  
不振。迺效陶朱。迺宗猗頓。表紀漣阡。式昭節行。  
迎養滬濱。怡情適性。醉月坐花。徜徉三徑。昔歲  
春暮。風景暄妍。芳園桃李。八秩開筵。含飴遶膝。  
磊落英賢。是翁矍鑠。白髮華顛。如何不弔。遽謝  
塵緣。上元勝節。星隕江天。白雲黃鶴。倏忽昇仙。  
高齋寥閤。題額空懸。老成凋喪。能無泣然。有酒  
盈卮。有肴在籩。以豐以潔。靈其鑒焉。尙饗。

箴訓

于氏家訓

幼時蒙祖父厚甫公祖母浦太宜人所鍾愛。飲  
食教誨。無微不至。稍長。先父子雲公。先母黃太  
恭人。望子成人。意念諄切。予年二十六。元配唐  
孺人卒。繼娶張組完女士。是歲始青一衿。而厚

甫公及浦太宜人皆先卒。不及見矣。予於地方  
自治。曾任江蘇諮議局議員。武進市總董。及兩  
任武進縣商會會長。於地方行政。曾任丹徒縣  
知事。及籌辦巴拿馬賽會江蘇出品協會主任。  
於工商業。曾任商務印書館出版營業兩部長。  
常州紡織公司協理。未嘗妄取一錢。且遇公益。  
祇有賠助。而自奉儉約。亦未嘗妄費一錢。乃以  
見理不明。持家不慎。於壬戌年。公私事業。牽累  
破產。除現金及手創地產股票不計外。並將我  
祖父所創立之前爲于成泰花布行。後爲源大  
盛布行紗號。頓遭閉歇。又西倉橋市房三所。及  
欽風鄉田九十五畝。悉數變充償款。癸亥六月。  
始告結束。爰應劉丈柏生。馬公潤生之招。於是  
冬十一月。就寶成上海第一第二紗廠副經理

之職。今當甲子歲首。予年四十九矣。歷思我祖我父勤儉創業。忠厚待人。子孫乃不能保持先業。敗壞無遺。是予孽何可逭。罪何可原。言念及此。能無痛心。惟有深目刻勵。冀復舊業。以對先人。予今有三子一孫。深望其助我挽救前失。爰作十要十戒。永爲家訓。并歷述其緣起。錄製成帙。年將五十。敢云知非。予惟以此自勉。并以勉我後人云爾。

父母要孝順、兄弟要友愛、夫婦要和睦、子女要讀書、房屋要乾淨、飲食要清潔、衣服要樸實、銀錢要儲蓄、疾病要謹慎、作事要耐勞、

守此十要、受福無量。

戒嫖、戒賭、戒酗酒、戒吸鴉片、戒說假話、戒失信、戒欺侮朋友、戒破口罵人、戒貪非分之財、戒暴

殄天物、

犯此十戒、受禍無窮。

### 格言箴

民國十四年六月，營口某學校將開紀念運動會。正滬上學潮激起之時。索書格言。以勗學生。爰作此箴云。

孝弟忠信。立身之本。嚴以責己。寬以待人。學業愈進。事理愈明。無學則死。有學則生。業精於勤。學荒於嬉。所貴益友。學業相規。勿矜意氣。是謂涵養。膽大心細。智圓行方。知過必改。得能莫忘。安肆日偷。莊敬日強。寸陰分陰。聖賢所惜。惟勤與儉。人生美德。自食其力。國民天責。百業維新。國乃富足。衛生之道。首重清潔。法治之國。民必守法。欲雪國恥。先裕學力。人能力學。是真愛國。

# 知非集卷三

詩

五絕

戊申四月西湖鏡清樓題壁

事物有成毀。湖山無古今。我來春已盡。感此一登臨。

壬子春暮道出丹陽

落月雲陽道。舟行逐曉風。夜來時有夢。覺後已無蹤。

癸丑夏日蘇城晚眺

夕陽度林末。平野入蒼茫。叱犢人歸去。微風生晚涼。

丁巳春杭縣徐子仲可五十初度

以銜杯春笑圖囑題爰賦俚言

## 以博一粲

九八

山水鍾靈秀。餘杭世澤長。西湖探勝遍。淞水樂徜徉。

百齡徵上壽。君壽日方中。破臘尋春去。梅花萬點紅。

鸚鵡秋風起。凌雲奮羽儀。文章聲價重。曾到鳳皇池。

定遠懷投筆。終軍賦請纓。壯遊三萬里。意氣自縱橫。

世事閱滄桑。知非復知命。白髮羞華簪。偕隱全真性。

明發念椿萱。盈庭蘭桂起。跨竈有佳兒。大廷魁多士。

槿籬圍四壁。菊圃拓三弓。難逢開口笑。把酒酌

春風。

孟光操井臼。筆硯付朝雲。競言城北美。窺鏡笑顏醺。

癸亥五月輓昭容嚴勇可集杜句

獻納開東觀。君年二十留學日本賢良復幾人。友于皆挺拔。君與令兄直方君同學同遊下筆有如神。君畢業於明治大學政治經濟科受得業士

北斗司喉舌。君為參議院議員以共策統一為職志歿之前數日猶至院出席寒山落桂林。直方君長桂省財政時君協助籌餉厥功甚偉癸丑黨禍起君幾罹難於世家遺舊史感動一沈吟。

哀挽青門去。行間失呂蒙。護法之役聯軍援桂君請纓從戎曾入譚

督軍幕參軍務。淒涼餘部曲。揮淚各西東。君聯合羣彥促成憲

勳業青冥上。昭然開鼎彝。君奉令特給二等嘉

禾章老親如夙昔。白首淚雙垂。封翁與太夫人年均古稀聞耗慘痛

恒逾

時議歸前烈。蒼梧雲正愁。君監督廣西銀行以公債百萬撥入抵補桂省軍事損。失未嘗自伐。鴿原荒宿草。涕泗不能收。直方君有雁行既折重傷親心此恨曷已之哈

便作死生分。悲來望白雲。君病亟時猶手作書奉終天素交零落盡。把劍覓徐君。

癸亥秋挽莊室費夫人

莊費守枚夫人。百俞先生之德配也。今

夏歿於滬。訃來繫以哀詞。悱惻之語。不

忍卒讀。敬集古句。為詩四章。以挽之。並

塞百俞老友之悲。

取婦得如此。晝夜勤作息。努力愛春華。阿母常

仁惻。哀詞云來歸七日遭鬪姑喪襄大事主家政事上馭下罔不合度

皓首以為期。願君崇令德。幽珮為誰哀。長當從

此別。哀詞有治家廿七年得有今日不能一日無此君之語

夫人先即世。君子意如何。哀詞有在首戲爭誰早死而今竟讓我浮

生之。含悽向寥廓。想像顰青娥。哀詞云長夜遺懷輒閉目作詩

鮮能全憶

奕葉班姑史。夫人暇輒手一卷不釋餘波德照隣。予借先室組完

女士昔年居滬與君家比隣強吟懷舊賦。嗚咽淚霑巾。先室組完

女士歿於己未歲年四十有三與夫人卒年相同距今五載矣

### 癸亥十月集句挽蔣菊生先生

十載攷墳典。出遊翰墨場。君少有文名年十

方兼有訓。君以忠厚誠子莊心安先輩嘗書忠孝傳家堂幅為贈丹桂五

枝芳。令嗣襄庭等昆李五人咸有聲於時

儒術豈謀身。理生那免俗。君以少孤養母棄儒業商此道未

溜磷。志士惜白日。君撰楹聯云人無才幹休多事找有功夫且讀書憚樽園

先輩歎為涉世名言

豈邀仁里譽。民國二年君被舉為定西鄉自治議長、敦俗勸農桑。

君創設久華繭。痛迫蘇耽井。慈顏拜北堂。昔蘇行提倡蠶桑

將歿指橘井以養母君事母卒不幸先母卒古今同慨

結交三十載。端雅獨倏然。予與君交垂三十年見其言動沈飭知所

得力秋風動哀壑。情在強詩篇。

### 癸亥十一月代馮君崇德挽旌表

#### 貞節李師母汪太恭人集杜詩

堂上會親戚。俱過阮宅來。節母為李厚茲師繼室厚師前室洪太恭

人與先慈為異姓姊妹哲嗣益之仁弟又為先紅寄子飄零迷哭處。幽佩

為誰哀。先慈與節母先後棄養痛哉德與益弟終身為無母之人矣

夫人先即世。夫子獨聲名。洪太恭人卒厚師以子女幼稚禮聘節母

為室未及視迎而厚師卒三歲如轉燭。回首淚縱橫。時德從三載慘境皆及門親見

凶問一年俱。日斜鵬鳥入。拜命已挺身。義無棄

禮法。節母秉持風教抱主成禮。禮慷慨赴義遐邇稱歎。

報茲劬勞願凋瘵滿膏肓。節母賢孝性成在室時以父應淮公病革

會封臂肉和羹以進譽滿閭里但求椿壽永骨出熱衷腸。

沈綿疲井臼急難心迥然。訓諭青衿子用心霜

雪間。節母撫孤守節督教。節母撫孤守節督教。節母撫孤守節督教。

卽事須嘗膽紀綱正所持。隣家遞歌哭慎哀漁

奪私。隣里有欺蔑孤寡者節母困心衡慮輒以大義折之卒凜然不敢犯

青瑣陪雙入。郎官列宿應。司科長臻之亦以交

通郭主事改就中國銀行職鳳池日澄碧丹極上鯤鵬。兄弟濟美

皆秉節母義方之教

歷職漢庭久尊榮邁等倫。慈竹春陰覆潘輿送

喜頻。鑫之昆仲曾二次迎養節母於京師環顧兒孫遶膝時或出遊名勝意甚忻悅

此道未淄磷。東方領播紳。同鄉莊公思絨等呈請政府給予褒詞匾

額及金章以旌貞節而勸方來聞者躋之高名入竹帛錫號戴慈親。

舊日重陽酒悲來望白雲。坐深鄉黨敬時過憶松筠。去歲九月先慈入祀節孝祠節母會親臨觀禮

### 甲子正月集杜工部詩挽史雪胎

先生

清峻流輩伯名家信有之。君隨宦閩中年未弱冠卽助理公私各事

冲融標世業雅望與英姿。父執早以勤慎幹練稱之

壯年學書劍。君讀書妙悟。嫉惡懷剛腸。滯務滋

一掃。君年二十納貲爲吏所至洞悉利弊事無不舉才格出尋常。

伏臘涕漣漣。報茲劬勞願。君事親孝奔父喪不食水漿者三晝夜

三年獨此心有恨石可轉。

看君妙爲政。正直朱絲絃。君任閩省鹽運局提調凡所薦舉悉乘至

公奮身勇所向。人憶止戈鋌。光復時辦團防匪保全洋口運局課

銀十餘萬上洋廳治民賴以安

同調嗟誰惜。同鄉有縮贖財廳篆者因案憤激

馳林邱。庶往共飢渴。至性有此不。君篤於友誼。慨然入京奔。走月餘履危共。難聞者多之。

恐乖均賦歛。防身動如律。一請甘飢寒。事與雲

水白。君辦三江口稅務迭遭早潦正。課故絀雜稅轉贏大府廉之。

挺身艱難際。得失寸心知。富華儲蓄銀行以不聽君言而被累君隱

痛雖深始終以保。慘淡苦士志。紀綱正所持。今

行所存証券皆君犧牲身命所爭得者

執友嗟淪沒。終身恨不平。君殉身行務予乃不

極百年秋已半。回首淚縱橫。君年僅五旬歿剛一載臨危惟念行

務語不及私思之痛絕

### 旌表貞節費嚴太君挽詩

太君卒於乙丑二月。年八十有五。予集

杜詩得十首。自津門寄挽。

奕葉班姑史。琳瑯照一門。節母幼讀詩禮及四子書通解大義須

知風化首。金石兩青燐。節母喜論史書節義事

森然起凡例。此道未淄磷。衣冠心慘愴。拜命已

挺身。節母未嫁喪父抱主成禮凜然赴義戚族感嘆

老親如夙昔。文雅見天倫。承顏胼手足。盡力潔

殮晨。節母奉養祖姑及翁姑克盡婦職人無間言

喪亂獨前途。無家問消息。節母以渡江省親得

免何時太夫人。倘歸免相失。節母長齋奉佛日夜禱天乞佑費氏

常恐違撫孤。推遷孟氏隣。功課日各足。夜字照

莪薪。節母日勤操作夜則篝燈針黹課讀嗣子恭嚴

有喜留攀桂。青雲滿後塵。節母左荃孝廉工書能文以光緒甲午捷

於老人他日愛。更覺綵衣春。

幕府初交辟。文翁儒化成。左荃孝廉幕遊燕鄂浙贛大府交辟歷館

永明海鹽諸邑篆紫誥鸞迴紙。潘輿送喜頻。節母會就

慈竹春陰覆。獻壽更稱觴。庚申八秩大慶坐深

鄉黨敬。前後皆輝光。節母曾奉清代奏揚及民國政府褒揚

朝夕高堂會。差肩列鳳輿。諸孫賢至今。芝蘭疊

璠璣。節母頤養天和孫曾遠膝咸謂天福善人

寂寂春將晚。悲來望白雲。節母以今春二月棄養飄零迷

哭處。時過憶松筠。節母生榮死哀遐邇欽慕

增註 其一元轉青韻其四咸通質韻其七庚通真韻

### 五律

#### 庚申歲暮述懷

歲月忽云暮。青春願已違。園梅紅破臘。簷雪白

生輝。塞北哀鴻斷。時北方苦旱江東戰馬肥。某省戰事方殷

不勝今昔感。淒絕一沾衣。

#### 遼河北岸春日早起

昨夜東風起。聲號萬馬奔。遼河春日多大風悠悠滯營

口。悄悄憶津門。時眷屬寓津曉樹柔枝拂。春流細浪

翻。羣鷗如有意。泛泛伴朝昏。

#### 營口晚歸

落日遼河畔。扁舟隔岸迴。萬家起燈火。片月上

樓臺。年事催人老。功名付劫灰。嗚嗚聞汽笛。知

是晚車來。

#### 營口泛舟卽事

許子潛庵。所居有林泉之勝。門臨清溪。

繫一小艇。乙丑初夏。風日晴和。許子偕

其夫人周冰一女。士並携公子三人泛

舟。招予同遊。賦詩紀之。

許子饒佳興。浮家喜見招。鳳麟皆俊質。梁孟擅

清標。小飲携芳榼。微波盪畫橈。豈知關塞外。濠

濮竟非遙。

### 五排



太倉洪母楊太君七秩壽詩

太君爲伯言先生之母。子三。女二。孫男

女六。庚申九月稱觴於滬上。

山水鍾靈淑。璇閨播令譽。四知嫺姆訓。廿載詠  
關雎。氣誼諧鴻案。倡隨挽鹿車。侍姑供菽水。課  
子託楹書。三鳳英聲起。雙珠瑞彩舒。板輿迎杖  
履。蘭玉遠塔除。寧郡瞻慈蔭。淞濱樂隱居。廉封  
官署鮮。儉種故園蔬。節屆重陽後。筵開七秩初。  
千齡宜頌魯。羣彥喜充閭。福壽綿無極。門庭慶  
有餘。北堂秋色好。松菊愛吾廬。

五古

夜宿營口

永夜不成寐。起視霜天月。四野悄無人。惟見遼  
海闊。清輝激素波。浮鷗色逾白。棹歌發春聲。犬

吠遠村隔。我行關塞間。驚沙時浙瀝。江南花正  
繁。風雨莫摧折。江南正育蠶時聞奉軍將移駐徐州

挽吳應銓先生

君卒於甲子七月。年六十有八。乙丑暮  
春。始悉確耗。予於瀋陽旅次寄詩挽之。

先生邑中彥。商界早致身。我年當弱冠。已識老  
成人。壯歲主商會。晨夕倍相親。光緒丙午予任商會坐辦時君

任會平生善拓業。安雅邁等倫。長君既騰達。餘

子亦鳳麟。長君友梅任交通部參事次君作梅等亦善繼先志年來多惜

別。塞外走風塵。予任北票煤礦營運事時往還於京奉錦朝間忽驚噩

耗至。涕泗爲沾巾。我思古君子。市隱儕羣衆。鴟

夷致千金。端木億屢中。君創辦工商業以吳元順生爲尤著淵明

託避秦。君六十初度自號桃源逸叟曾繪印桃源笠履圖見贈君平善易

諷。君晚年精術角占驗之術小道必可觀。才大難爲用。君才

信不凡。公益惟天職。楊子東遊歸。理化竟所習。

楊君性誠習化學工業於日本光緒丁未反國語其製作長楮素與罐

詰。我欽先哲。懽提倡具卓識。釀資設工場。贊助

君最力。懽心私先輩細設工場於養濟院為地方工業倡君首先出資贊成之憶

當光宣交。裁厘說乃盛。辛亥改稅則。茲事我為

政。子於江蘇臨時省議會議改厘金為貨物稅復於都督府主任籌備以四十日而成立十

三稅。武丹吾咽喉。煩苛夙所病。認稅紓商困。同

聲首相應。武丹稅所長姚君子珊子所薦引迨至常予在商會邀集各業認稅君首

先贊成各業皆從之。運河邑命脉。百貨藉通津。導源溯往

蹟。卅載漸湮淪。樺公心私大舉濬河吾邑利賴重三十年今漸就阻塞嗟

我正挫衄。咄咄計未伸。癸亥年予著塘市君志經常濬河商榷書君志

切溶治。寧辭歷苦辛。研求機械力。老更見精神。

君任籌備河工事攷察機械不辭勞瘁在昔癸亥歲。我方旅滬濱。

憶君來訪我。嚴冬風雪晨。導觀輕便道。笑語室

生春。予時任寶成第一第二紡織廠副經理導觀輕便鐵道君甚忻喜謂運泥可仿用

嗚呼不整遺。胡天奪之速。或謂方事殷。留君挽

隕俗。君曰不可為吾將叩冥冥。人道日欽嶷。變

幻疇測度。羣盜况如毛。朝露庸非福。遂與世長

辭。埋憂向岑寂。將老失知音。山陽愴聞笛。作歌

以告哀。我心滋悱惻。不但惜斯人。更為來者式。

### 賀邗江張仁輔君五十再舉子

君為營口交通銀行長。甲子冬始識面。

與傾談。深相契。其長公子。夫人所生也。

乙丑夏五。其如君再索得男。予集杜少

陵句為詩以賀。

始見張京兆。交情老更親。人生意氣合。披豁道

吾真。青青歲寒後。偃蹇龍虎姿。猶含棟梁具。郢

樹發南枝。佳氣拂周旋。燈花何太喜。高秋此日

生。天上張公子。况當仲夏交。薰風行應律。騏驎帶好兒。豫章夾日月。煥若靈芝繁。尤異是龍脊。超然懽笑同。門闌多喜色。

七絕

壬子初夏赴句容道中口占

隱隱青山曉霧濛。肩輿行處麥田空。野塘風過生微浪。無數菱花蕩漾中。

戊午冬日讀莊子百俞四十初度

詩和呈粲政

名門甲第重南金。吾邑科第明清兩代君家為最盛今西瀛里有莊氏世科坊  
此日宏開教育林。君與尊公為丈手創冠英學校及女西校君家通伯創設嶽氛一壺傳經流澤厚。君丈以名孝廉精豪養院  
工古文顏其濟。君丈以名孝廉精  
曰一壺草堂。君丈以名孝廉精  
詩書不負百年心。  
五常馬氏誰為長。共識白眉君最良。君昆季澄

試當年留伴我。故交道義感難忘。辛丑同應院發回唐皆故歸浼君留待竟允予請予即獲焉以妻喪耗至急歸行李皆遺以累君至今感不能忘  
客舍光陰逐逝波。結隣常滬每相過。君家在邑比歲旅廬又同寓寶山路西湖勝蹟曾同賞。申歲曾與君偕作西湖旬日遊  
三到輸君眼福多。  
等身著作邁羣倫。瀛海爭傳桃李春。君所著教外讀者不可指數  
更喜一門沾樂育。冠英已畢業者四  
微名坻驥愧前塵。常願冠英尚公兩校皆君所創辦子皆忝任校董  
曩年壽母祝遐齡。周甲金萱茂北庭。甲寅春君母余太夫人六旬稱觴  
初度震宮占瑞早。華堂合聚老人星。君家堂名早聚  
忘年交誼託靈椿。君丈嘗引予為忘年交  
三世相親夙有因。子與君諸子皆同學  
我亦生當強仕歲。子年四  
君共慶八千春。

己未秋日奉題丹徒包榮翰素人

斷腸詩後

掃眉才子隴西李。福慧能兼世少雙。一自春殘人去後。維揚花月付滄江。

新詩百咏斷腸篇。願作鴛鴦不羨仙。我亦相憐同病者。淒涼風景奈何天。

己未冬壽會稽盛竹書先生周甲

詩

泮宮早歲冠青衿。十載宏開教育林。却憶西湖遊興好。袖中詩本足清吟。

珂鄉水利善源開。江漢流長幾溯洄。絲繡平原金鑄蠡。東南一路福星來。

太守風流似樂天。耆英高會杖鄉年。滿園蓉菊花如錦。好與先生晉壽筵。

鯉庭競美三多頌。象服同賡偕老章。天錫遐齡仁者壽。行看七秩更稱觴。

史節母楊太夫人八秩壽詩

節母爲清初名臣楊兆魯六世女孫。同

治四年乙丑年二十一。于歸史氏。二十

四歲而寡。有節孝行。嗣君藩。清分省知

縣。今爲審計院協審官。孫一鏗。年。曾孫

二甲子二月爲母誕辰。

家學淵源證夙傳。名門忠孝本兼全。溯從乙丑于歸後。節操冰霜六十年。

八旬壽母稱觴日。令子文孫卓有聲。藁苦蔗甘等閒事。天教嫩行炳龍城。

七古

光緒丁酉先嚴命題五十肖像携

琴采芝圖

昔聞高山有四皓。當年高隱歌紫芝。塵世膏粱無所羨。紫芝馥郁可療飢。又聞成連居海上。琴聲清越澈天涯。一彈馮夷爲之舞。再彈海若爲之悲。我是十洲三島逍遙客。欲學古人志趣之清奇。山之曲。水之湄。芝能駐我之顏色。琴能寫我之襟期。與爾悅性怡情常相守。富貴功名安足縈我思。

題慕劬室圖照

己未中秋。過君漢秋以先世所遺慕劬室圖照見示。敬賦短章。以志景仰。

倉橋之北臥龍西。中有高人昔隱棲。紅羊歷盡滄桑劫。白雲已逝心酸悽。君家祖德多清操。彥明紹古皆純孝。水源木本見先型。世澤相承植

風教。丁蘭刻木奉高堂。今見曾玄奠酒漿。未經親炙予生晚。空對遺容蕪瓣香。

詠山海關

效柏梁體乙丑春作

山海名關鬱崔嵬。天下第一重鎮推。舊鑄石額曰天下第一

一關明清之際多劫灰。平西赫赫安在哉。明思宗使吳三桂守關三桂引清師入關清封之爲平西王其盛時西選之官半天下二百餘年

元氣培都市車馬競喧豗。爲問白榆誰手栽。榆關屬今臨榆縣無端政爭結禍胎。兩雄並立互嫌疑。

吳佩孚張作霖並峙於關內外。兵戎相見浩劫來。前歲直軍奮

如雷。壬戌直軍奉之戰曳兵棄甲走于巒。豐碑屹峙長城

陔。直將彭壽莘立戰勝紀念碑於關前直軍敗乃毀滅今年奉軍捲甲回

甲子奉軍之戰。雄師十萬疾銜枚。但使當前大敵摧。不

辭異域借長材。奉軍聘日人爲教練並招俄人入伍九門陡峻俯

山隈。當關萬夫莫能開。奉軍攻九門直軍力禦驍將馮玉榮等遽死奉

山隈。當關萬夫莫能開。驍將馮玉榮等遽死奉

軍亦傷亡逾萬。天空飛機猛徘徊。兩軍皆以飛機 彈雨起驚埃。關垣十丈倏崩墮。血飛肉薄殷蒿萊。遍地白骨何皚皚。直軍潰敗時死亡山積外 來未有之劇戰。民兮無辜罹慘災。移粟賑饑號散財。奉

粟賑饑。何日流亡重招徠。將軍智勇恥能恢。張

霖為奉軍總司令。諸將如楊宇霆。以智略聞。李景林郭松齡稱能戰。有子年少亦

英才。作霖子學良 亦號將材。長驅入關功孰魁。北抵京闕

南蘇臺。李景林遂代王承斌督直 張宗昌偕盧永祥入蘇。論功行賞快

傳杯。乙丑春諸將為作霖 稱慶皆升賞有差。四方今猶多蝮虺。螳

蟬黃母雀乃獸。外憂日亟莫主裁。吁嗟家國我心哀。

鎮海陳樵峯先生暨德配朱夫人

八秩壽詩

先生以名進士作令晉省。治績稱最。當

知非集 卷三

拳亂時。擒渠保境。兩宮西狩。有旨褒嘉。

晚隱西湖。娛情詩酒。子廷緒等五人。皆

賢達。孫八人。曾孫三人。乙丑九月誕辰。

予代友人壽以詩云。

大富貴。亦壽考。祝華封。歌天保。太丘長德邁羣

倫。希夷先生真不老。側聞壯歲捷南宮。制作承

明才望隆。龔黃治績魁。汾絳寇竄殊勳冠。華嵩

聯輝棗。夢羨諸郎。臨風玉樹何清揚。繼起循聲

多俊彥。粹然美質識琳瑯。紫陽家世承通德。艷

說蘋蘩修婦職。八龍三鳳挺孫枝。木公金母輝

南極。蒔花種竹西湖濱。板輿頤養樂天真。獻觴

遙介齊眉壽。百歲詩篇太古春。

詞

光緒丁酉先嚴命題五十肖像携

琴采芝圖調寄減字木蘭花

煙霞着屐。爲想蓬瀛遊戲客。問我何來。此去塵寰訪友回。追隨杖履。閒喚兒童携綠綺。歲歲榮華。信手拈來不是花。

知非集卷四

武進于定一謹懷

聯語

題贈

贈上海都益處餐館

館爲蜀人所設。歲乙卯。客滬上。當春秋佳日。與二三朋輩小飲其間。感激賞之。

書此以識。

竹麤花豬。春遊好讀坡仙賦。尊鱸稻蟹。秋興

應題杜老詩。

題會稽田氏宗祠

田出於齊。宋南渡時。裔某破走金師。愛山陰山水之勝。爰卜居焉。其地爲岳武穆屯兵處。掘地得水。因名歡潭。

先代自齊司馬兵法名家。源遠流長。偉績當年著南渡。此間爲岳鄂王軍屯故址。地靈人傑。崇祠終古傍歡潭。

集句題公園水竹幽居

吾邑城中雙桂坊第一公園。東隅有屋二楹。窗外皆竹。竹外有池。入夏池荷盛開。尤饒佳趣。

隔沼連香芰。杜甫當軒暗綠筠。劉憲

集句自題延爽齋

秋菊有佳色。陶潛清風來故人。杜牧

贈香山羅季植 甲子年作

跋云君審事理。主敬信。舉此以喻。聯語

媿勿工也。

道統紫陽推仲素。兵法羅山自一家。

贈津門王養溪

蘭亭墨妙傳千古。秋柳詩奇壓衆英。

贈梁溪許潛庵

神農學派開天下。太岳英聲播洛中。

贈無錫周幹忱

廣廈棟梁資大受。層霄日月炳丹心。

贈海城陳甲珊

跋云。兄豪邁越恒流。交遊遍宇內。爰舉

君家龍川語爲贈。

推倒一時豪傑。開拓萬古心胸。

贈綏中智榮亭

君以聰明爲姓氏。我於邂逅識賢豪。

贈陽羨陳漱六前輩

同甫清言驚四座。太邱長德冠羣公。

贈劉正幹 乙丑春日

跋云。兄才品超卓。夙所欽重。與予同庚。生而長予數月。行年五十矣。去臘晤於奉垣。開尊話舊。喜可知也。爰爲此聯以

志鴻雪。

伯玉知非今長我。洛妃平視或前身。

贈灤縣程玉臬 子九

明道世其澤。厥聲聞於天。

武清張紀生家住楊村爲題楹聯

地接枌陰社。人來楊葉村。

贈平陽孫嘯南



君爲於越智謀士。我識蘇門鸞鳳吟。

贈興安雷寶華 孝實

公瑾清才工顧曲。豐城奇氣識干霄。

贈崑山吳稚田

草廬先生真積學。延陵季子故知音。

贈屠振初

放歌雅愛聞鈴曲。數典能詳揚鱗篇。

雷吳二君專精礦學。屠君則經理紡廠。

卓著成效。而皆長於南曲。雅人深致。故

自不凡。

贈丹徒胡健春 乙丑仲春

跋云。君爲鎮郡商團長。鎮屏乃商團本

部所在地。當軍事孔亟時。盡力保衛。郡

賴以安。憶癸丑秋。同登象山砲台。勸阻

發砲。已歲星一周矣。

鎮屏一山。作名都之保障。大舜千古。有賢胤

在東南。

贈丹徒陸筱波

跋云。君識量明。邑有大事。類皆勉爲

其難。敬贈聯語。以志夙昔佩仰之忱。

醇儒漢代傳新語。華閥雲間識俊才。

贈馬潤生 乙丑三月

跋云。君創辦順昌。機製石粉廠。茲屆開

機。予自津門馳賀。又以昔年太夫人節

母祠成。愧未躬親瞻拜。敬贈此聯。以伸

景仰而資紀念云爾。

滬濱拓業酬初志。鄉國明禋慰母心。

贈莊百俞

人稱濠上世家。科第昔爲最盛。我識漆園舊雨。學問無所不窺。

贈慈谿李皋裕 乙丑春

跋云。君品性冲粹。好爲公益。當癸丑秋。曾共患難。茲居一周歲宿。復聞風鶴相驚。舊雨關懷。不勝水遠山長之感。敬贈聯語。聊志雪鴻。

故人別夢常相憶。佳士如香固可蒸。

贈丹徒王蔚卿

跋云。君學行純孳。歷任地方公職。憶當癸丑之秋。患難相共。距今歲星一周矣。贈此以志不忘。

投門我昔慚元節。家學君應接夢樓。

贈李復稔

世稱鄴侯有仙骨。吾見老子其猶龍。

贈劉堯性姻兄

跋云。兄夙擅時譽。昔尊公聲甫姻丈爲商界名流。邑人猶能稱之。予生也晚。不獲親承警欬。今兄創興永孚銀號。成績卓著。可謂能繼先志而守世業者矣。七畧傳經。名父之子。八齡正字。理財所宗。

贈翁佩孚

隱居教授。我所思兮景說。精心汲古。君是今之覃溪。

贈盧錦堂

跋云。君爲吾邑商界泰斗。能秉義禮以濟人之急。確然有古君子風。至其善飲而不以飲名。欣賞書畫。收藏甚富。尤饒

雅趣。贈此以識傾倒。

我愧非管仲。君不愧爲鮑叔。雅量如玉川。好

古更如抱經。

贈營口扶輪學校校長許維周

叔重博通經史學。子將能爲月旦評。

贈粵中梁澤山

君爲營口京奉鐵路職員。掌水上交通。

年六十餘。猶能作工楷。

南越重洋。通商爲最早。山舟學士。書法自名家。

家。

贈津門郝席珍

天津名區應九宿。佐治腹笥羅五經。

贈維揚張仁輔

君至性過人。年逾五十。常抱暈魚之痛。

平生深自刻勵。兼凜古人佩章之思。爰

廣其意。作聯語云。

五旬慕親勿渝。虞舜爲千古至孝。九世聚族

而處。公藝以百忍持家。

贈慈谿張仙根

靈和蜀柳方思曼。秋谷西泠號釣徒。

贈粵中徐潤泉

孝穆令譽。比麒麟於天上。修仁素抱。以清白

世厥家。

贈浙西吳藕塘

延陵觀樂識治道。梅邨退居多著書。

贈天津田春普

君爲遼東輪渡船主。

宗慤壯遊。能酬破浪志。孟嘗好客。自有表海

風。

贈灤縣龐振林

君掌京奉路稽核測量事。

暨亥從衡兩極。士元冠冕南州。

贈錦縣高子容

跋云。君長於國學。兼擅西文。尊甫雲亭

封翁。占稀鬢鑠。以講道周歷奉省諸邑。

誠一路福星也。介弟春溥。主任奉省中

學教務。並有聲於時。爰作此聯以美之。

軾轍齊名。老泉得之爲三傑。紀謀競爽。太丘

特許以二難。

贈灤州孟子德

遼東管幼安。是真處士。魯國仲孫氏。代有名

卿。

贈津門陳國樑

營造測量。能通法式法義。高名清德。不數元

方季方。

贈貴池姚紹枝邑侯

民國紀元以來。任吾邑知事者。以君爲

最久。君昆季四人。皆潛心政治。又皆事

母以孝聞。君其仲氏也。

元之治術。與廣平曲江以媲美。仲氏吹篴。合

伯歌季舞。而娛親。

贈香山盛麟昭

虎門商場。地靈人傑。西漢爽氏。源遠流長。

贈蓋平鄭樂亭

漢高密。宋莆田。經史學導源。篋絕千古。明設

衛。漢置縣。遼瀋間重鎮。厥推珂鄉。

贈潘雲青

武功盛稱宋韓國。水利永賴明烏程。

贈營口梁德溥

君家莖隣能為好聯語。我來營口作此貽良

朋。

贈蓋平崔子餘

黃鶴題詩使青蓮閣筆。亭伯博學與孟堅齊

名。

贈淮安章仲衡

珂鄉與江漢同源。名著有淮南鴻烈。家世為

呂姜合系。數典宗尙父鷹揚。

贈遼陽杜韻笙

杜本陶唐氏之裔。君名賡堯。殆取此義。

今主任營口交通銀行會計職務。

華宗溯淵源。放勳光被四表。數學中肯綮。臨

甫術精九章。

贈天津孫澤忱

君為營口京奉鐵路工程員。雅善歌劇。

公和能抗聲作鸞鳳嘯。稚繩乃拓地在遼瀋

間。

贈蓬萊葛寅堂

家學承抱朴。仙鄉說蓬萊。

贈宜興徐潤甫

霞客遊記三萬里。雙南詩評五十家。

贈徐果人

君任江蘇省議會議長。時挈眷居金陵。

家學綜子楞仲平所長。詩文並擅。卜居攬鍾

阜秦淮之勝。人境雙清。

喜聯

賀余劍青世兄娶婦

劍青爲少舫大令長公子。己未十二月。  
在紹興縣公署行結婚禮。娶張氏女。亦

吾邑人也。

花好月圓。東園觀梅動詩興。椿齡萱壽。蘭陵

美酒鬱金香。

賀江上欽世兄娶婦

上欽爲江君增泉哲嗣。娶同邑惲氏女。

本來南浦才人。恰稱大雲家範。携得生花彩

筆。畫成舉案齊眉。

賀孫炳成世兄娶婦

炳成爲孫君介壽哲嗣。娶同里謝君濟

經女公子。

催妝合誦天台賦。佳話爭傳柳絮詞。

辛酉八月賀崇明林國良結婚

誦南國風詩。君子得淑女爲配。賞中秋佳節。  
彩雲與明月交暉。

賀盧鏞培世兄結婚

鏞培爲盧君錦堂次公子。娶於同里胡  
氏。婚期爲二月十八日也。

秉家學抱經。配女宗安定。後花朝六日。詠國

風首章。

賀昇西鄉高玉麐先生金婚聯

先生爲高君翰霄尊甫。甲子三月十二  
日。與德配吳夫人。行金婚禮。時年八十  
有一。夫人年八十有二。子三。孫十四。曾  
孫七人。

是福星。是壽星。四代一堂。蟠桃正熟。八千歲。

甲子春。甲子日。木公金母。花燭重諧六十年。

壽聯

壽梁溪顧母唐太夫人八秩

太夫人為顧君維精之母。顧君昆季三人。皆有聲於時。

八秩慶三多。令子早徵三鳳瑞。元春逢九日。

良辰預晉九旬觴。

秦縣單樞亭封翁暨潘夫人七旬

雙壽聯

封翁二月生。夫人八月生。哲嗣允工等

昆季三人。並有男女孫十一人。

星輝南極。雲霞北堂。寶樹煥三株。蘭玉叢生來  
繞膝。春雨杏花。秋風桂子。華筵開七秩。神仙

不老壽齊眉。

丹徒李樹人大令暨德配蔣宜人

六十雙壽聯

君擅文名。多著述。早歲官皖省。馮夢華  
前輩修江蘇省志。屬君為鎮郡徵訪員。

看神仙不老。著書五千言。伯陽職掌柱下史。

祝夫婦同春。初度六十歲。白傅詩成耳順吟。

壽費貞節母嚴太夫人八秩

太夫人為左荃大令之嗣母。年十七。未

嫁而夫卒。抱主成禮。事翁姑以孝。撫嗣

子成名。

祝萱壽千秋。爭拜西池王母。數芸編列女。有

如北宮嬰兒。

壽上海秦母張太夫人八秩

太夫人爲錫圭太史。錫田孝廉之母。有

四子。二女。及孫男女十八人。曾孫男女

二人。誕辰爲正月十三日。

慶元宵令節。頌民國長春。蟠桃果熟八千歲。

祝壽母百齡。合同堂四代。玉樹花開廿六株。

庚申秋。壽南通張退庵先生七秩

從心所欲不踰矩。善人是富謂之祥。

遼陽王萬程封翁七秩壽聯

翁素行慈善。尤好古籍。晚耽禪學。令子

孟先仲樵。皆躋顯達。予代友人爲聯云。

宜爾子孫大富貴。萬家生佛地行仙。

黃陂劉春庭觀察七十壽聯

先生昔宦中州。治河施賑。全活逾萬。晚

隱里門。徜徉詩酒。二子四孫。皆有聲於

時。予代友人作聯云。

令子二難并。文孫四美具。萬家頌生佛。七秩

作者英。

挽聯

挽余幼舫中將

癸丑秋。揚鎮兩軍失和。予時當其衝。君

方銜命入贛。遇變不屈。死之。

京江兵火。湖口風雲。生死兩難忘。總角深交成

契濶。信國孤忠。常山大節。古今同不朽。崇祠

遺像薦蒸嘗。

挽蔣克莊君

君工繪事。豪於飲。有名士風。卒年未五

十也。

是青山白雲人。畢竟以醉死。草畫禪酒仙傳。



微君誰與歸。

又代同飲者挽前人

畫格在青藤白陽之間。擲筆竟成千古恨。酒

仙隨彭澤糟丘以去。銜杯願結再生緣。

挽寶應盧墨庵廣文

先生居鄉。好行其德。邑稱善人。令子殿

虎繡虎。皆任教育名於時。

老泉爲一代儒宗。學有淵源傳軾轍。司馬是

萬家生佛。身多德澤被粉榆。

丙辰秋代虞山歸駿聲君挽嚴建

侯君

吳門把劍。歇浦聯床。十年講席周旋。金石盟心

惟我最。室有雙親。孤無六尺。半世儒坑埋沒。

風塵灑淚爲君多。

歸與嚴同學蘇垣。嗣同任教務於滬上

尙公學校。共居一室。故云。

挽孟公師母張太夫人 丙辰五月

長君心史夫子。奔走國是十餘年。比以

世變日亟。奉慈輿隱於滬上。次君庸生

世丈。亦棄官營墾植於濱江。皆秉義方

之教也。

與介之推偕隱以終。縣上高風箴薄俗。長歐

陽母一年而卒。瀧岡實錄表遺徽。

戊午二月挽丹徒陳母錢夫人

夫人爲陳光甫君之母。卒年六十有二。

大銓封翁正健在也。

陳太丘以長德見稱。不堪垂老年華。興悲故劍。

郭有道遭喪母之痛。愧未登堂瞻拜。恭奠生

蜀。

### 挽孟庸生世丈

庸丈著作等身。頻年辦理濱江墾植。並拓戊通航業公司於松花江。以挽國權。

戊午冬。以疾卒於松本醫院。

文字有靈。死而不朽。國權猶在。魂兮歸來。

### 挽趙頌眉君

君長於財政。能詩。

管夷吾是名世奇才。府海官山曾挾策。李謫

仙以詩人老去。楓林關塞竟銷魂。

### 己未春挽鄂渚湯濟武總長

中原發難。曾以全力建共和。更佐馬廠義師。重新民國。北固訂交。相與傾心論時局。陸驚美  
洲凶耗。竟壞長城。

### 挽劉述文孝廉

君儻有雋才。曾同試鄉闈。卒年甫四十也。

鷓鴣秋風。君昔凌雲曾奮翮。鷓啼春雨。我來挂劍正傷神。

### 戊午夏挽劉葆良世丈

丈為吾邑名翰林。光緒中葉。倡導教育。甚至以經營實業失利。鬱鬱久之。卒於

京師。

庚信平生最蕭瑟。龍門聲價重文章。

### 己未二月初九日挽繼室張組完

女士

溯卿往行。允不愧賢母良妻。親中饋以勵勤。撒環瑱而示儉。教子女有義方。可憐廿載辛勞。到

此淚乾絲盡。來日大難。是垂老淒涼况味。記病時呻吟語。憶臨危訣別情。覩兒輩悲啼狀。縱我平生曠達。能無腸斷心傷。

### 挽南匯顧瑞霓校長

君任教育。以苦卓聞。尊甫旬侯先生。曾同任江蘇諮議局議員。君訃至。適為先室設奠。即就靈次寄輓一聯。時己未五月初九日也。

人間何世。天上何年。怪雨盲風。畢竟嘔心殲李賀。思子慰公。悼亡慰我。節情達變。翻教含淚勸西河。

### 又代挽前人

名父之子。盡瘁於熱心興學焉。遂使斯人竟千古。既葬而封。吾見其廣輪揜坎也。不堪老友

痛三號。

### 挽屠元博君

君曾與予同任江蘇諮議局議員。後任衆議院議員。洪憲之役。抗議不屈。以疾卒於津門。

比歲老懷太惡。總是傷心。慘絕賦悼亡。况當世局艱危。良友又成死別。曩時議席同膺。獨伸讜論。勸君毋過激。胡以天人悲憫。中年遽折雄姿。

### 己未五月挽應季中省長

蘇垣識公。屈指已十年。清釐財政。曾應諮詢。追憶前塵如昨夢。滬寓聞病。傷春當二月。慘賦悼亡。猶承慰唁。不期慧業倏昇天。

### 己未秋挽惲心耘觀察

公任福建興泉永道時。爲保國權。與日  
人力爭。廈門虎阜山地。抗議去官歸里。  
倡興地方公益甚多。卒年七十有八。吾  
鄉沈中甫太守。莊心安方伯。盛杏蓀宮  
保。均年逾古稀。相繼凋謝。距公之歿。先  
後數月耳。

論我公風概。無愧生平。昔曾官湘鄂。贛著政聲。  
更力保國權。閩海編氓爭頌戴。任吾邑鉅艱。  
不辭勞怨。今竟與沈盛莊諸前輩。相將謝塵世。  
陽湖耆舊感凋零。

### 挽長樂高子益次長

先生爲外交長才。歷任意比等國公使。  
民國四年。任外交部次長。洪憲之役。抗  
議去官。嗣以喘疾卒於京師。

蹈海魯連曾抗節。悲秋宋玉竟消魂。

### 挽白下盧亞屏君

予任商務印書館營業部長時。君爲部  
員。夙有疝病。力疾從公。卒於己未八月。  
予甚傷之。

以君勤奮任事。是良好少年。可憐一病艱難。竟  
嗟無命。而我今日。抑鬱寡歡。正愴懷故劍。不  
意中秋奄忽。又哭斯人。

### 挽嚴練如參事

君與予同歲。研精釋典。任教育部參事。  
以疾卒於都門。

同歲悲君成佛已。先靈運去。萬方多難。傷時  
竟天龔生年。

### 挽二弟婦張延雲女士

女士卒於庚申二月初七日。距先室組

完女士之歿。一年缺二日耳。

去歲悼亡時。剛從淞滬歸來。念穉兒無母何依。烏哺深恩曾託庇。一年容易過。又是清明節。嗟予季相憐同病。鵲啼春雨共招魂。

代沈頤朶姻兄挽其四兄頤祚

平生愼默寡言。竟英年鬱悒以終。最難堪堂上慈親。鄰前弱息。地下相逢老父。爲報語門庭無恙。予小子白慚薄德。幸賴諸兄。

君有深思。寡言笑。痛遭尊甫早生姻丈之喪。不逾年。以憂卒。

又代其同學挽前人

如飲醇醪。訂交曾識周公瑾。不期短命論古同悲顏子淵。

代挽丹陽王星衢廣文

詩文並壽千秋。君自抗心蘇內翰。憂樂不忘天下。我來慟哭范希文。

挽孟師母周香谷夫人

夫人卒於滬。距長君心如世兄赴德求學時。僅三月也。尊師哭之慟。

讀吾師悼述。一文一聯。盡瘁於十四年中。其行足傳。死應無憾。念遊學重洋。佳兒佳婦。聞耗在數萬里外。不遑將母。情何以堪。

挽莊室陳覺儒女士

女士爲通伯先生繼室。創辦滌氛蒙養院。其卒也。通伯於訃啓中稱後死夫焉。放歌我識莊生達。蒙養無慚衆母賢。

辛酉十月挽屠敬山先生

先生爲吾邑名翰林。精地理。工文學。善

飲。晚著蒙兀史。未竟而卒。曾與予同任

縣知事。

蘇子美飲酒讀漢書。借澆塊壘。公誠結習難忘。

爲文苑。爲儒林。世稱其著作等身。才未盡也。

謝安石夢雞逢厄運。遂隔人天。我獨前塵回溯。

論是非。論出處。古所謂動而得謗。名亦隨之。

### 再挽前人

與令子同膺議席。與夫子同縮邑符。往事廿年。

交誼若此。戊午歲曾挽長君。辛酉歲又挽長

者。哭公兩世。吾哀可知。

### 挽太倉洪伯言大令

君與予同任省議員。又同任縣知事。卒

之前五日。曾相遇於寧垣旅館。時壬戌

十二月也。

便作死生分。一別寧垣成永訣。不勝今昔感。

廿年舊雨倍傷神。

### 癸亥正月挽史雪胎君

追思往事。感不絕於予心。公誠肝膽照人者。

瞻望前途。杳莫知其所屆。誰使鬱憤以死乎。

### 挽王紫雲封翁

翁爲蘇省警務處王清泉處長之父。清

授振威將軍。

惟先生定節立謀。論古畧同馬新息。看諸子

文通武達。家聲不墜李西平。

### 挽天寧寺冶開和尚

署欵云。冶開上人靈山之遊。法外于定

一集本傳語爲聯。以誌頂禮。

北方苦潦。親至各縣放賑。全活不可數。敷坐默然。逝後飾龕示衆。七日而如生。

挽梁溪孫曜青先生集杜句

長嘯宇宙間。高才日凌替。素交零落盡。萬事益酸辛。

癸亥八月挽華子璇先生

跋云。白縣商會開創。二十年來。歷次舉任會董。尤以辦理四屆平糶。獨任勞怨。爲人所難能。今歲令嗣明初兄被舉會董。忻瞻喬梓。相得益彰。方幸長留耆碩。爲吾會光。不意噩耗驚聞。道山遽返。愴懷舊雨。能無泣然。

西郊落德星。記昔年頻呼庚癸。關懷民食。是誰與相劑於平。惟君身任鉅艱。墮淚難忘羊叔子。

吾會數耆舊。閱廿載公益維持。盛德敬銘。願後嗣永綿勿替。回念古稀翼鑠。據鞍不讓馬文淵。

挽莊費守枚夫人

夫人爲百俞先生德配。卒於壬戌四月。長君新爲清華學校高材生。先二年卒於京師。

方古列女。饒有孟光風。云胡不永其年。壽殤天彭。頗憶君家齊物論。我欲銘幽。愧非白傳筆。無以慰吾老友。悼亡思子。劇憐長夜夢枚樓。

挽崇明龔楣蓀先生

先生爲龔君劍秋之父。經明行修。卒年六十有六。予集杜句爲聯挽之。隣人嗟未休。前輩復誰繼。世儒多汨沒。夫子

獨聲名。

挽靖江張益普先生集杜句

先生爲張君逃山之父。敦孝友。好矜恤。

善解紛。鄉里有善人稱。

再使風俗淳。義聲紛感激。不但時人惜。到處潛悲辛。

挽江寧仇母毛太恭人

長君欣。次君塚。皆有文名。母撫孤守節。

卒年八十有五。

有令子軾。轍齊名。顯揚無愧矣。惟賢母陶歐比德。福壽且過之。

癸亥十月挽徐福溟君

剛從牯嶺歸來。痲骨支離。早慮及此。適在京江邂逅。強顏歡慰。吾悲可知。

挽胡室薛宜人

宜人爲胡竹亭姻丈長媳。卒年三十有三。其祖姑猶在堂也。

是能得重闈歡。允稱佳婦。可以續列女傳。惜不永年。

甲子春挽馬春颺世丈

丈爲潤生先生之胞伯。性夷曠。不屑事家人生產。顏其所居齋曰樂我天真。終身不娶。以潤生爲嗣。甲子上元。卒於滬寓。年八十有二。

燈月輝佳節。江天落德星。

又代挽前人其一

史冊合添高士傳。典型尙憶老成人。

又代挽前人其二



黃浦傷春。噩耗竟從元夕至。白眉擅譽平生。原作古人看。

又代挽前人其三

人品在希夷和靖之間。無愧碑銘傳有道。酒仙隨彭澤糟邱以去。不留者碩作靈光。

又代姪婿丁希俊君挽前人其四

夙昔仰宏慈。以猶女視吾妻。猶子視予。松柏有心蘿蔦繫。去來皆分定。值誕辰在三月。歿在正月。桃花含笑水仙悲。

又代寄男劉繩祖君挽前人其五

疇昔本同居。念飲食教誨。常荷提撕。予小子竊比梓材。忝埒喬柯。忻蔭庇。元宵聞噩耗。觀火樹銀花。頓添悲感。與吾父相逢地下。為言母氏幸平安。

又代姪孫培陸培基君挽前人其

六

陸君時携眷在津。

為親蘿蔦最關情。公昔惟自樂有真。公今乃含笑歸真。鶻唱聽津橋。空憶桃觴稱八秩。漫說春秋多佳日。惜別於壬戌九月。聞訃於甲子正月。罡風吹歇浦。從茲燈宴怕元宵。

又代屠松泉世丈挽前人其七

同居近世載。相與默契此心。或班荆道古。或把酒談玄。平生攻錯無忘。自遷滬倏將十年。見面時遂少。上壽過八旬。本於葆真有法。不慕入世名。不屑治生產。老友蓋棺論定。舉獨行以矯末俗。微君誰與歸。

癸亥十二月挽嚴煥如君

君曾任丹徒縣公署第二科長。

尊酒每微醺。饒有清言霏玉屑。簿書曾共勩。不堪往事憶丹徒。

### 挽胡秦生姻兄

君爲朗甫姻丈哲嗣。世有長厚名。君歿時。予居滬。未悉也。甲子三月舉殯。適歸里。始知之。

范希文以忠厚傳家。更喜堯夫能濟美。黃魯直正間關返棹。驚聞坡老已遊仙。

### 挽丹徒陳湘濤君

君工魏晉書。曾出資修建焦山之碧庵。及城南招隱寺。卒年三十有三。

比歲善緣多。佛言早證菩提果。平生遺墨在。書勢猶傳魏晉碑。

代秦中雷孝實君挽潘母雷太夫人

人

太夫人爲蜀江潘大道先生之母。以九月九日卒。時潘與雷君同客津門。

與長君昔年結契。師友兼資。祇緣蜀道蠶叢。行路艱難。拜母未親。彤管範。正佳節同客異鄉。茱萸醉把。忽聽津橋鶻唱。噩音傳報。傷心望斷白雲飛。

### 甲子仲冬挽張內姊唐孺人

姊何遽溘逝乎。憶先室當時。染疴滬濱。沉沉長夜。醫藥多賴調維。姊德豈能忘。我愧窮途無策報。甥昔甫襁褓耳。念苦節卅載。閱盡艱辛。悵悵中年。精力遂爾衰竭。甥其勤自立。庶幾慰母在天靈。

易林集聯

喬遷類 落成附

豐年多儲。與天相保。北宸紫宮。逢福值喜。  
 和氣所舍。以樂孔嘉。春城夏國。宣時布和。  
 春日載陽。宮成室就。典策法書。吉善長久。  
 南山多福。歲樂年豐。松柏枝葉。柔順利貞。  
 入門升堂。來歡致福。麟鳳室堂。長受嘉福。  
 逢時積德。常樂允康。松柏枝葉。共保歲寒。  
 歲樂年豐。元吉无咎。伯虎仲熊。俊良美好。  
 時行雲集。萬利以生。春城夏國。光明盛昌。  
 南山芝蘭。芳花當齒。松柏載青。照臨東海。  
 雲夢苑囿。靈鳥載遊。鳳皇來舍。翱翔紫淵。  
 駕入喜門。大略爲寶。淵流浚多。得其福利。  
 移居安宅。小窗多明。草木嘉茂。居之寵昌。

華葉茂成。生不知老。麟鳳所遊。照臨東海。  
 秋蘭芬馥。樂以忘憂。金玉爲寶。受福西鄰。  
 坐立歡門。商人受福。麟遊鳳翔。照臨東海。  
 移居安宅。君子樂胥。符左契右。藏在蘭臺。  
 南山高岡。福祚之聚。羔衣豹裘。世有封祿。  
 東嶺多粟。德義以生。芳澤肥壤。業處子孫。  
 海爲水宗。衆利室宅。衆利所聚。百福是受。  
 棟隆強輔。太平機關。松柏棟梁。麟鳳室堂。  
 駕鳳遊行。宜利居止。麟遊鳳翔。生我嘉福。  
 草木嘉茂。順時施行。鳥升鵲舉。居之寵昌。  
 松柏載青。飛樓屬道。小窗多明。喜盈我室。  
 林木來會。景星照堂。飛樓屬道。日利良辰。  
 駕鳳遊行。長生之域。伯虎仲熊。福喜盈積。  
 蕃屏輔弼。積善有徵。金梁鐵柱。起動安甯。

春東夏南和氣所舍。天成地安得君所欲。  
 時行雲集文德在身。家給人足與樂並居。  
 起動安寧所在遇福。光輝盛昌長生之域。  
 年歲豐熟可以樂居。吉喜福慶和氣所居。  
 受福西鄰進樂相舞。喜至慶來長生無極。  
 照臨東海治道得通。宮成室就昭德允明。  
 慶賀盈門子孫蕃衍。歲樂民安以成恩福。  
 崔嵬北岳功德昭明。家給人足相與笑言。  
 起動安寧忻然嘉喜。駕鳳遊行騶虞喜悅。  
 福佑長久樂以高明。春陽生草景星照堂。  
 天孫帝子福祿洋溢。  
 陶朱白圭德義淵閔。

開業類

知非集 卷四

入和出明。福德之士。入門升堂。駕福乘喜。  
 增祿益爵。商旅以懽。握珠懷玉。蒙慶得財。  
 嵩高岱宗。百流歸德。隨陽有功。世載其樂。  
 日出東早。萬物以生。開市作喜。利入我門。  
 圭璧琮璋。天之都市。擴然大通。以成恩福。  
 江河淮濟。海爲水宗。見者有穀。所求吉昌。  
 太倉充盈。所受大喜。三德五才。利以攻玉。  
 章甫進用。以成乾功。千權萬悅。喜來如雲。  
 隨陽有功。所求必倍。足用豐財。國之奧府。  
 含潤爲德。曰壽無疆。含和建德。海爲水宗。  
 陶朱白圭。衆利所聚。鳳皇銜書。安仁尙德。  
 芳澤肥壤。萬物風興。金玉滿櫃。足用豐財。  
 君子作仁。天之所予。萬物蕃成。常茂不落。  
 商人受福。懽以相迎。衆英積聚。以類相投。

福與善生。各得其願。受福且多。所求必倍。  
利從母出。身樂以安。履德有信。與利相逢。  
兆如飛龍。爲我利福。隨陽有功。長受安福。  
留獲和玉。所至吉昌。開市作喜。多得利歸。  
宣時布和。允利孔福。執義秉德。常權以安。

賀喜類

宮商既和。頌聲並作。和氣所居。嘉偶相得。  
宴樂有序。文德在身。歌謠送喜。福祿來成。  
嘉我淑姬。配我君子。晨風文翰。神鳥五彩。  
逢福值喜。駕福盈門。明月照夜。花燈百枝。  
高明淑人。孔德如玉。和合六親。各同心願。  
飲御嘉客。景星照堂。德义四布。以降嘉休。

功德昭明。相與孝友。春桃生花。鵲笑鳩舞。  
婚姻配合。得其願歡。明月照夜。麟遊鳳翔。  
婚姻孔云。嘉偶相得。麒麟鳳皇。子孫千億。  
福祿所在。主君以權。犀象玳瑁。金玉滿堂。  
入福喜門。必保嘉美。長樂行觴。春多膏澤。  
振鐘鼓樂。相與笑言。孔德如玉。駕入喜門。  
安樂几筵。明月作畫。和璧隋珠。盈我筐筥。  
香盈筐筥。美風盛隆。良夫淑女。得其願權。  
舞韶和鸞。舉趾振翼。和璧隋珠。溫仁受福。  
賓主俱喜。英俊在堂。羔裘豹褰。慶賀盈門。  
白駒生芻。芳花當齒。金玉滿堂。輝光照國。  
嘉樂君子。高明淑人。鳳皇來舍。駕福盈門。  
文定吉祥。函珠懷玉。三德五才。所受大喜。  
長安富貴。同枕共牢。仲春孟夏。以降嘉休。

文定吉祥。各同心願。  
長生懽悅。相與笑言。  
季女宜家。咸賴嘉福。  
德音孔博。所求吉昌。

祝嘏類

茹芝餌黃。三塗五嶽。  
符左契右。一室百孫。  
安如泰山。長受嘉福。  
駕之東海。明見善祥。  
黃裳建元。萬物華實。  
芳花當齒。四序允釐。  
道德神仙。獲譽受福。  
藩屏輔弼。常樂允康。

幽人利貞。貴壽無極。  
君子懷德。福祿來成。  
甘露醴泉。芳花當齒。  
紫芝朱草。白鶴啣珠。  
公悅嫗歡。宜家无咎。  
伯歌季舞。積善有徵。  
甘露醴泉。黃玉温厚。  
璠英朱艸。白鹿呦鳴。

萬福攸同。駕之東海。  
百流歸德。壽如喬松。  
高明淑人。日新其德。  
赫咍君子。天福所豐。  
高岡鳳皇。德音孔博。  
南山松柏。和氣兆升。  
榮譽日登。君子長樂。  
壽算無極。幽人利貞。  
大福永興。子孫千億。  
仁德感應。和合四時。  
文山紫芝。喜爲我福。  
雍梁朱艸。樂以忘憂。  
和氣兆升。相與合齒。  
履福爲厚。可以長安。

六位光明。身受利福。  
千秋起舞。貴流子孫。  
與君笑言。使君壽考。  
酒爲懽伯。德爲道門。  
出應德門。經歷致遠。  
拜謁王母。福祿來同。  
高岡鳳皇。合體比翼。  
温山松柏。含和履中。  
金齒鐵牙。長生利氣。  
羔裘豹褰。君子顯名。  
一室百孫。遨遊仁宇。  
五利四福。慶賀盈門。  
金齒鐵牙。令妻壽母。  
紫芝朱艸。麟趾鳳雛。

和璧隋珠。倉盈庾億。甘露醴泉。四時順節。  
令妻壽母。目聰耳明。元龜象齒。萬福攸同。

頌揚類

東里宣敷。名成德就。出得隋珠。輝光照國。  
南山多福。喜至慶來。武立天柱。慶賀盈門。  
與日月俱。武立天柱。制命出文。履行素德。  
振鐘鼓樂。駕入喜門。論仁議福。動順天時。  
春草榮華。惠吾嘉喜。利入我門。與以為寶。  
甘棠聽斷。為國寵光。身受天慶。不失其恭。  
重譯賀芝。世載其樂。北宸紫宮。載受福祉。  
北山有黍。天福所豐。金城鐵郭。以成和平。  
功德昭明。天祿所伏。君子萬年。蔭受國福。  
心志娛樂。和氣兆升。陽春長日。動順天時。

重譯賀芝。益爵增祿。文定吉祥。家蒙福祉。  
春陽生草。涉和履中。生長和氣。業處子孫。  
湛露之歡。勞賜我酒。善政得祥。日益富有。  
陽建其極。喜來如雲。和氣所舍。利居長安。  
高明淑人。和謙致樂。被服文德。福祐日成。

祠廟類

期於嘉貞。庶物蕃息。日月相望。明神建德。  
崇我文德。世祿久長。溫良受福。壽考宜家。  
則天順時。獨蒙福祉。羔衣豹裘。履祿綏厚。  
修德行惠。萬物華榮。元龜象齒。功德昭明。  
天福吉昌。國家富有。載福長生。藩屏輔弼。  
神嗜飲食。功德昭明。習靜獨處。清潔淵宗。

期於嘉貞。姬姜祥淑。典策法書。神明所伏。  
 相與孝友。子孫億昌。陽城太室。仁哲以興。  
 諷德誦功。陰陽順序。茹芝餌黃。與道合契。  
 乘風駕雨。出入有爲。春栗夏棗。隨陽有功。

常州俗語對

福州梁苴鄰巧對錄。仁和繆蓮仙文章遊戲。  
 皆有俗語對。梁氏轉錄鶴韻軒筆談。語多吳  
 越參合。繆氏專集越語。吾鄉先輩亦有集常  
 州俗語爲聯者。惟無專本。丁巳夏夕納涼。與  
 內子組完女士互說鄉諺屬對。旬許積百餘  
 聯。庚申元夜。鬱襟無聊。偶於書麓檢得此冊。  
 距女士之歿。幾一載矣。不勝睹物思人之感。  
 閱數月。孟師心史自粵歸見之。謂仁和翟晴

江。著有通俗編。集俗語聯。較梁繆爲富。定一  
 愧未之見也。

提花頭。	賭笑面。	交門親。	隔壁戲。	過來人。	先出世。	喫長頭。	伸後脚。	雌雞啼。	瘋狗咬。	口頭禪。	胎裏素。
一條鞭。	三隻手。	灌黃湯。	喫黑飯。	趕老羊。	摸死蟹。	吵家精。	現世寶。	活閻王。	騷韃子。	齋月宮。	鎮風水。
抽懶筋。	踢飛腿。	嘍囉神。	溜打鬼。	紮火囤。	開金口。	尋開心。	放極相。	闊少爺。	癡公子。	喫雷齋。	殺風景。
九頭鷗。	四眼狗。	調龍燈。	趕狗棒。	搨木梢。	開金口。	橄欖頭。	櫻桃嘴。	刮地皮。	上天表。	唱山歌。	鑽地洞。



見免放鷹。	偷貓吊狗。	紅眼野貓。	青皮光棍。	四季發財。	百年長壽。	麻糕訟師。	豆腐太子。	臭監生。	清知縣。	磕頭蟲。	笑面虎。	兩頭蛇。	四眼狗。
兩面三刀。	四時八節。	開眼烏龜。	蓬頭獅子。	時來運來。	風出屁出。	坐產招夫。	關門捉賊。	八分杯。	三眼竈。	甩龍梢。	塞狗洞。	牽糊猴。	鬪蟋蟀。
破釜沈舟。	拈槍弄棒。	止步揚聲。	拿腔做勢。	說嘴郎中。	收心婊子。	親上加親。	夢中說夢。	鬧五更。	活千歲。	窮做窮。	硬碰硬。	結鬼緣。	說天話。
								回頭香。	直脚火。	連毛豬。	沒脚蟹。	牛角尖。	蟹面孔。

忙裏偷閒。	苦中作樂。	相體裁衣。	探囊取物。	耀日爭光。	見風着色。	老店新開。	蠻棋瞎着。	接二連三。	來千去萬。	單夫獨妻。	二心三意。	空心湯團。	折脚板櫟。
		同姓勿宗。	有陽無氣。	指桑說槐。	移花接木。	反老還童。	欺窮愛富。	挖肉補瘡。	連皮帶骨。	養虎傷身。	畫蛇添足。	本命星君。	當方土地。
	水火無情。		陰陽怪氣。	順水推船。	衝風打仗。	白手成家。	赤脚爬地。	兩面光鮮。	一般見識。	五子奪魁。	八仙過海。	眼高手低。	口直心快。

火燒延慶寺。喫飽叫化子。包脚布面孔。

礮打襄陽城。新鮮活死人。破竹竿喉嚨。

惡狗當路睏。救兵如救火。佛頭上着糞。

野雞着天飛。擒賊先擒王。筆管裏煨鰯。

前客讓後客。姜太公在此。火燒延慶寺。

門神當竈神。馬利尙過江。水淹泗州城。

觀音齋羅漢。木作棒吹火。租田當自產。

小鬼跌金剛。鐵將軍把門。舊屋搭新披。

豆腐小夥子。

棉花老壽星。

賠涎唾喫炒米。東耳進西耳出。

說大話用小錢。三分酒七分腔。

日裏說夜裏話。鷹生鷹鳳生鳳。

死馬當活馬醫。柳對柳花對花。

冤有頭債有主。餓剃頭飽洗浴。

買的少饒的多。窮算命富燒香。

蒼蠅不鑽無縫蛋。好女只怕閒浪子。

惡龍難鬪地頭蛇。皇帝也有草鞋親。

夏至餛飩端午粽。今日不知明日事。

少年身體老人頭。家花那有野花香。

日當衣衫夜當被。一家飽煖千家怨。

冬穿綾羅夏穿紗。三分容貌七分粧。

四方檯脚八方理。清官難斷家戶事。

百日琵琶千日琴。皇天不負苦心人。

螞蝗叮牢鷺鷥脚。掩著耳朵喫海蜇。

簪箕罩住八哥頭。數了和尚做饅頭。

老豆腐切邊做嫩。甩掉釘耙弄掃帚。

瞎婆子包脚蠻纏。騙上高樓拔短梯。

拳勿離手曲勿離口。冷在風裏窮在債裏。  
養兒防老積穀防荒。做了饅頭壞了酵頭。  
二佛生天一佛出世。三日扳罾四日晾網。  
前人栽樹後人乘涼。前門拒虎後門進狼。  
嫁雞隨雞嫁犬隨犬。亮屋勿漏響屁勿臭。  
種豆得豆種瓜得瓜。清明斷雪穀雨斷霜。  
人老筋出船老釘出。半夜裏呼貓阿咪咪。  
錢在手頭食在口頭。肉骨頭敲鼓昏髮髮。  
自尊自重自輕自賤。兵來將擋水來土掩。  
捉賊捉賊捉奸捉雙。人爲財死鳥爲食亡。  
水中撈月甕中捉鱉。  
火上澆油雪上加霜。  
肉麻當有趣滯氣當知己。  
着衣看門面喫食看來方。

雨落釘鞋傘天晴肝腸飯。  
親眷遠離鄉鄰舍高打牆。  
各人心裏愛生油拌韭菜。  
瞎串三官經絲瓜炒麩筋。  
脚瓣頭置行竈踢落就走。  
老壽星喫砒霜活勿耐煩。  
搨石臼調鍾馗竭力勿討好。  
鄉下人喫橄欖回味再思量。

### 知非集卷五

武進于定一瑾懷

延爽齋筆記

智水仁山

予居北方數年。覺文化程度。遠遜於南方。而就  
交通事業觀之。直奉諸省。鐵道縱橫。如京漢京  
奉京張京綏津浦正太安奉南滿四洮吉長中

東諸路。其廣袤交錯。實遠過於南方。南方之文化。夙稱江浙爲最。陸路交通。僅有滬寧滬杭寧省。淞滬甬紹等鐵道爾。然水道交通。如江湖河海。隨處貫通。尤以蘇之南部。浙之西部爲最。其地方之文化亦較高。然後知孔子智者樂水。仁者樂山。智動仁靜。智樂仁壽之語爲益信也。孔子生於魯。踪跡所至。不越魯汴秦湘四省。其於江浙水鄉絕未一至。而能斷言若此。非聖人其孰能之。

### 梁鴻范式

予年十六。讀後漢書至梁鴻范式二傳。一則滅寵更炊。不因人熱。賃春廡下。自食其力。一則二年之別。千里結言。設饌以候。如期而至。竊嘆梁鴻之義。范式之信。爲人不當如是耶。按二人之

所爲。陳義並不甚高。而皆可爲法式。尋繹本傳。千載而下。恍若身親聞見。其文其事。感人深矣。生當斯世。信義蕩然。此等行誼。尤足爲末俗痛下鍼砭。

### 鼻烟壺

衡陽彭剛直玉璫。統水師攻浙時。有某提督來調。坐談間。出鼻烟壺。傾烟嗅之。彭視其壺。不類常製。屢目之。某以壺授彭。彭詢所自來。答曰。數年前在贛克省城時。於途中拾得此壺。剖之。有零星銅件甚多。遂以刀剗去。復令匠置口加蓋。而用以盛烟。究不知其爲何物也。彭笑而還之。某退。所親叩彭。始知壺爲一銀壳之時計表所改製也。

### 五等菜

菜有五等。能自有味而兼助他品有味者。爲一等。如雞蟹火腿江瑤柱蝦子笋菌麻菇雪裏紅黃豆芽之類。是。能自有味。不須借助於他品者。爲二等。如猪魚蝦鴨雞蛋牛羊青菜薺菜芹菜蘿蔔之類。是。已雖無味。能因他品之助而有味者。爲三等。如魚翅魚唇魚肚海參豆腐粉條王瓜東瓜之類。是。已既無味。而又無能受他品之助者。爲四等。如燕窩明骨海蜇海帶變蛋蕁菜茭白菘豆芽馬鈴薯之類。是。已固無味。而能損害他品之味者。爲五等。如蒔菇藥芹山藥栗子之類。是。他如芫荽辣椒薑葱韭蒜。則皆爲調味品。或隨嗜好特性而作爲飲食整品。不當在菜之列。

明太祖遺聞

明太祖在御營閱武。惠帝允炆時爲皇太孫。與諸王均隨侍。將士乘馬疾馳。太祖見馬尾隨風飄盪。疎落有致。口占一語曰。風吹馬尾千條線。回顧皇太孫等曰。汝等試覓句對之。太孫對曰。雨打羊毛一片氈。太祖色不懌。正轉念間。燕王棣應聲曰。日曬龍鱗萬點金。太祖大喜曰。真吾子也。惠帝有慙色。太祖由是益知成祖之不凡。惟以太孫循謹無過。且痛懿文太子之早世。不忍遽行廢立。而又不欲裁抑燕王。躊躇累日而罷。卒成靖難之變。幼聞先祖厚甫公言之如此。

李秀成墨蹟

太平天國諸將中能文者。石達開而外。以李秀成爲最。秀成性慈善。深得衆心。見諸賊之嗜殺。輒加勸阻。合肥李文忠鴻章克蘇州。幕府有皖

人許姓孝廉。於城中得秀成手書楹聯。質係黃緞。字學魯公。筆勢英挺。聯云。魂兮歸來。三藐三菩提。梵曲依然破陣樂。悲哉秋也。一花一世界。國殤招以巫咸詞。上款太平天國年月日。下款忠王李秀成敬題。蓋爲追薦陣亡將士而作也。孝廉後携此聯至南京。爲湘鄉曾忠襄國荃所見。手裂而寸毀之。曰賊蹟安可留。孝廉悚息不敢言。出而語人曰。吾不意九帥量隘。竟如是之不能容物也。惋惜者久之。

### 昭慶寺香樟

杭州昭慶寺。距西湖約十里。門前有樟樹二株。長逾二丈。花時香聞數里。予於宣統戊申初夏遊杭。適值盛開。風日和煦。中時覺芬芳襲人。蘭桂諸香。無此遠且烈也。庚戌春。予於邑之圖書

館手植一株。人夏密葉青葱。樹已全活。冬經大雪。明春芽發。爲雀所啄食。遂漸凋。逾年竟枯死。按樟爲常綠喬木。產於黔蜀閩廣諸省。氣候較江浙爲暖。但浙既能生長。吾邑何獨不然。毋亦培養未當。抑初種之年。元氣未充。適值嚴寒。遂爾摧折歟。亦有幸有不幸也。

### 張文襄軼事

南皮張文襄之洞。工文學。擅長經史詞章。於百家言。亦有心得。兼治說文。爲學者所推重。然好自矜。每以一二章句掌故弄人。人或不能答。則沾沾自喜。時人以此少之。其督鄂時。門下士江寧金鼎。最所親信。凡諸差缺。均令掌記載焉。浙人章某。以名進士。入選縣令。籤分到鄂。人謁文襄。詢其姓名。答曰章某。曰與予同姓。則答曰立

早章。卽文章之章。文襄矍然曰。此音十章也。何謂立早。子爲進士而不知乎。章嘿然無以應。文襄卽舉茗。侍者傳呼送客。章出甚懊喪。謂初謁上峯。卽遭白眼。宦途自此蹭蹬矣。章素與吾鄉某公善。告以故。某公躊躇片晌曰。已得轉圜之策。當有以報命。某公固朝夕與文襄覲晤者。是夕。文襄語以難章事。某公曰。頃晤章已知之。文襄詢以章作何語。某公曰。章某盛稱宮保眞一字師。渠甚感愧。文襄拍案大笑。連呼孺子可教。繼詢金何處有優差。金已悉其隱。遂檢簿畧視曰。差則一時無有。惟某縣缺出。尙未委員。文襄點首者再。謂金曰。卽令章某去。某公出。則見藩署已懸牌矣。遂以告章。聞者莫不稱某公詞令之妙。而笑文襄以小慧弄人。轉爲人所弄也。

文襄夙以好士稱。其歷任疆圻時。凡所知名。悉羅致於幕下。屠敬山先生寄爲吾邑名翰林。著有遼金元史掌故。及地理問答諸書。又嘗輯清代駢文。刊行於時。文襄督粵時。延之閱卷。凡省會各書院兩司及道府所掌者。課士試卷均屬之。屠時丁父憂。至粵。館於外舍。文襄往拜。見門懸紅呢幃。顧謂左右曰。屠大人奉諱。汝等知否。皆應曰。是。文襄面邀屠至署。午膳歸。而窗戶幃幕坐墊之類。均易青色綾綢。卽茗椀痰盂。亦盡易青色花磁矣。其所承應。則皆善後局爲之時人於此等處多美文襄。謂其能以德愛人。前之督撫。固未有若此之用心精密也。不知視金錢如泥沙。舉所揮霍。皆爲民膏。長吏之專橫。汰侈莫之或異。轉從而稱道之。清末官場積習。於此

可見一斑。

文襄督粵。赴任時。駐節珠江三口。臨水起高閣。四圍懸燈萬餘盞。以鐵絲脚接。每一挂輒二三。十燈。遙望如火山。光燭數里。供應之費。逾數萬金。均道府及縣令所爲也。然此等供張。固不自文襄始。歷任督撫。至皆如是云。

文襄幕中。有天地人三字號之說。凡長於文學。負有時名者。延爲上客。授以編校書籍。衡量文字。或主講書院。經辦學堂。尊而不親者。皆是。時人謂之天字號。或爲故舊子弟。或係科第出身。於文學既無所長。於奔走亦非便給。則授之以官。官則素有剗地皮之稱。時人故謂之地字號。精明幹練。足供驅策。則授以錢穀簿書。及洋務督練善後權運等要差。類皆親而不尊。時人謂

之人字號。然投効於文襄者。多願爲地人兩等。以獲厚利。其願爲天字號者。實居少數。蓋以月薪之外。他無所得。則又可見清季仕途人格之日卑也。

### 多妻制

多妻之制。外國如古之羅馬。印度等。今皆革除絕跡。惟中國相沿未改。有清光緒季年。曾頒禁止納妾之法令。然自執政以下。狃於故習。率皆陽奉陰違。降及今日。此風尤甚。雖身受高等教育者。亦多不免。世道人心之日下。於此可見一斑。惟革命諸人。如孫文黃興輩。皆守一夫一妻之制。不可謂非社會模範之一端也。竊謂禮記昏義。天子后立六宮。三夫人九嬪二十七世婦。八十一御妻之說。爲中國多妻制最著之明文。



以一男子而偶百數十女子。悖理傷德。猶公然著爲禮經。寧非怪事。詩美文王則百斯男。然以一女生一子計。其數當不止百人。則正不得謂多男。聖哲之君主。而多妻若此。在中主以下。更無怪其嬪御之漫無限制。白香山後宮佳麗三千人之句。無足異矣。人第知今日創爲公妻之論爲邪說。而不知多妻制之其失惟均。經禮三百。曲禮三千。其有關世教者。固宜守之勿失。其繁瑣不切於實用者。可置之勿論。惟如昏義多妻之說。則當力闢其非。以重人道而正人心。勿任背謬之說。濫廁於經籍。多妻之弊絕。而公妻之邪說。或可已乎。

### 婚姻制

婚姻制度。中外各殊。吾國舊制。以父母之命媒

妁之言爲主。西俗則以男女自由爲主。一則束縛太嚴。過爲勉強。故多怨耦。一則純任自由。漫無限制。易於離婚。各有所蔽。其失惟均。求其適當。則於二者之間。爲之確定標準焉。竊謂婚姻制度。必設檢查審定二級。管理區域。不嫌其小。充任職員。必求其備。學識則分普通與專門。職務則分經常與臨時。每區設經常檢查與審定各一二員。臨時職員無定額。男女結婚。必具五種相當資格。年歲也。體格也。性情也。容貌也。學識也。男女有結婚志願時。必先具書於經常檢查員。由臨時檢查員會同檢查之。合格。則聲請審定員審定後。知照其父母。以命令舉行之。如非合格。不得私相結婚。既經合格。父母不得阻撓。至結婚以後。當守終身不改之義。男死女子

不得再嫁。女死。男子不得再娶。何論乎離婚。何有於守節。文化進步。世界大同。如此則婚禮正而人道全。拭目俟之。

### 飲食笑柄

梅啓照。湘鄉曾文正國藩門下士也。性粗率。時人號爲梅瘋子。以軍功歷任浙江巡撫。一日。兩司請宴。筵間有寧波蚶子一簋。梅連壳碎嚼之。聲徹四座。咽既。謂所親曰。味尙佳。但不易食耳。聞者無不匿笑。楊昌濬任浙撫時。食嘉興糟蛋。甫至口。大嚼。蛋黃淋漓。沾唇而下。自鬚髻間。汗及補服。舉坐解頤。楊亦不禁大笑。

### 尙書韻文

唐蘇頲幼時。對太宗尙書之問。引說命木從繩。則正后從諫。則聖之語。李嶠之子引泰誓。斲朝

涉之脛。剖賢人之心以對。皆韻文而兼偶語也。太宗嘆謂蘇壤有子。李嶠無兒。尙書不少韻文偶語。如撫我則后。虐我則讎。惟聖罔念作狂。惟狂克念作聖。民非后罔事。后非民罔使。偶語也。不作無益害有益。不貴異物賤用物。偶語而兼韻文也。類此正多。而皆厲規惕人主之義。嶠子皆不之引。其受譏也固宜。

### 梅花嶺

在揚州天寧門外。三里許。明督師史忠正可法。祠墓在焉。壬子春。因事至揚。往謁公墓。墓前有石。煥然如新。題曰大明督師史公道隣之墓。度非舊物。或以忠正爲清所諡。故於光復時易之耳。墓後種樹。以梅爲多。四圍繚以短垣。墓左有屋數楹爲享堂。昔所傳誦之心痛鼎湖龍。一寸

江山雙血淚。魂歸華表鶴。二分明月萬梅花。一聯已不知何往。而惟吾邑趙雲崧先輩題聯尙存。句云。讀前生正氣之歌。廢書而歎。結再世孤忠之局。過墓興悲。以相傳公爲文信國再世也。享堂之南。聽事三楹。頽然欲倒。廡下有公最後所作家書石刻一方。祠云。恭候太太楊太太夫人萬安。北兵於十八日圍揚城。至今尙未攻打。然人心已去。收拾不來。法早晚必死。不知夫人肯隨我去否。如此世界。生亦無益。不如早早決斷也。太太苦惱。須託四太爺大爺三哥大家。照管。炤兒好歹。隨他罷了。書至此。肝腸寸斷矣。四月二十一日法寄。書法逼近趙松雪。而多蒼勁氣。石平嵌於壁。缺一角。痕猶新。幸未損字。予以紙墨榻十餘本。歸貽戚友。而函縣知事汪君彝

伯保存斯石。汪君固舊友。昔曾與予同任江蘇諮議局議員者。

### 落星石

吾邑城中第一公園西。圖書館外。有落星石。色白而形楮圓。縱三尺許。橫五尺許。厚二尺許。四無鋒稜。皺紋滿布。石本距今址十餘丈。埋土中。微露石面於外。光緒戊申。建築圖書館。予於夏日晚眺。信步至此。偶見此石。覺有文字形。摩娑審視。則落字在焉。喚工發掘。而石面所鐫落星石三字全露。字法似董香光行書。石重逾千斤。以十餘人移置於此。攷邑志有落星石。落星亭。在忠義祠之語。其來處及時期皆不可攷。忠義祠爲洪楊劫後重建。度石與亭必爲兵燹時毀。沒無疑。予於石側築亭以復其舊。邑人并置額

於亭。額字則惲孟樂先輩所書也。亭之四柱皆石爲之。亦於土中所掘得。蓋卽其舊物。一柱微損其角。以木補而用之。石之成形。度係飛泉急湍所衝激積久而鋒棱盡去。故光潤無彫琢痕。好事者據星隕成石之說以名之。星學家言。天空流星接近地球時。爲地心力所吸墜。冷乃成石。其皴紋係光熱之所鑠。理或然歟。洵吾邑古蹟也。吾友翁君佩孚。胡君君復。均撰聯紀之。翁聯云。看周遮雲實日華。低則若承。高則若拱。要擺脫天荆地棘。明不如晦。靈不如頑。又云。九天以上。亦有陵谷。咫尺之間。若接風雲。胡聯集芳茂山人句云。大塊滿噫氣。明星搖空天。又集司空表聖句云。橫絕太空。如不可知。虛佇神素。汎彼浩劫。是有真宰。與之沈浮。聯語皆超拔可誦。

惜以人事蹉跎。迄未懸置爲憾。記此以志吾過。

### 記事册格言

予性駑鈍而記憶力弱。辦事皆藉記事册以相助。先嚴子雲公亦有記事册。封面題勤筆免思四字。可謂言簡意賅。予之記事册。則署日知其所無。月無忘其所能。進思盡忠。退思補過。蓋不僅記事。兼爲座右箴也。

### 楹聯無作法

楹聯文中小品也。起於五代之末。蜀主孟昶始爲之。歷宋元明代。有作者。至清乾嘉時而盛行。其妙處能以少許勝多許。如名物之記載。人事之叙述。傳之以文。非數十百言不能畢事者。以聯語爲之。寥寥數言。即能盡其大概。且使情景神理。躍然紙上。洵文字中寫生妙品也。惟歷覽

前書從無作法。時至今日。文學之變遷日亟。楹聯一道。無人注意。將歸消滅。歲乙卯。主任商務印書館出版部。日與編譯諸君習。偶言及此。僉謂無作法之可言。無已。搜集古今聯語之佳者。分類彙刊之。或以流傳廣而閱者多。據有好者。必有存焉之例。其或免於失傳乎。同邑胡君君復。乃任編輯之役。定名古今聯語彙選。至庚戌而計成四集。今更續刊數編矣。搜羅之廣。各省而外。並及於朝鮮南洋。蓋以商務印書館遍設。而又與士林日相應接。故能收旁搜博采之效。若在數十年前。交通閉塞時。則固未易臻此也。

### 曾文正聯語

曾文正學問功業。冠於清代。古文亦卓絕。爲世所宗。秉性謙慎。平生不作得意語。惟於楹聯則

頗自負。嘗語幕府曰。吾於文字皆無所長。聯楹則自信必傳。雖戲言。實確論也。其所爲聯。包攝一切。由其根柢深而魄力厚。故下筆不作第二人想。人亦無能及之者。惟於挽胡文忠太夫人聯云。武昌居天下上游。看郎君新整乾坤。縱橫掃盪三千里。陶母爲女中人傑。痛仙馭永辭江漢。感激涕零百萬家。以下聯第二語稍弱。指示幕府曰。此次名作如林。予聯不無遜色。改之而構思未就。不知誰居吾上也。觀此可見用心之專。吾邑劉開生先輩。久在曾幕。言之如此。

### 賭害

賭博之人。其日用經濟。必無預算。雖有預算。爲勝負所牽率。必紊亂而不能準確。賭博之習。中外皆同。西人好撲克牌。華人好麻雀牌。近數年

來。華人打撲克者漸多。西人打麻雀者亦漸多。於是麻雀牌爲出口貨之一宗。上海有專製出口麻雀牌者。每盒值數十元。獲利頗不貲。寓華西人始習打麻雀時。多由洋行職員及細憲廚夫等之指導。其後遂有舍撲克而就麻雀者。華人之於撲克。則趨時者偶一爲之。其專心致志。仍在麻雀。蓋以打麻雀者多。而打撲克者少。且以撲克簡單。不若麻雀之較繁而趣濃。則雖謂西人屈服於中國之賭化也可。聞麻雀牌始於浙之寧波。其爲何代何人所作。則不可攷。自麻雀盛行。而舊有之骰子搖寶。牙牌牌九及紙牌諸賭。日就衰滅。麻雀遂代興矣。惟於日本人則未見有爲此者。日本禁賭甚嚴。中國與歐美亦未嘗不禁賭。而賭益甚。廢時失業。勞精疲形。舉

世滔滔。積非成是。上焉者藉口於消遣。消遣之道甚多。寧資於賭。下焉者以之爲職業。不爲正當職業。而轉爲此。世界國體。自酋長之野蠻。以至君主之專制。歷數千年。今已革除將盡。曾以人類之靈。溺於賭博之害。竟爾相忍終古者。無是理也。良好之教育普及。世界之真理大明。此等無端之禍害。庶爲消滅之時期。

### 圓光

科學興而迷信絕。神怪之說。科學家所弗道。近世雖有神怪學之研究。然尙未臻貫澈。不能斷言其有無。平生於鬼神怪異之事。無所見聞。偶有傳者。視爲談助。姑妄聽之而已。惟圓光一事。爲予九歲時所目擊。吾邑西瀛里爲城中最著之市場。大商店多設於此。有布行劉復盛者。一

夕。櫃房失銀百餘元。行主疑行人中所竊。特未能確指何人。好事者介紹一皖人。作圓光之舉。謂能使竊銀者顯呈形貌。藉以決疑而獲案也。行主然之。時方深秋。是日傍晚。在楊柳巷布業公所舉行圓光。予家與公所對門居。屆時往觀焉。任圓光之皖人。年約四十餘。不悉其姓字。聞爲販棗商。以白紙三尺許粘壁間。倚壁設案。炷香然燭。注清水一盃。其人擊盃默祝。所祝何語。聲細不聞。每祝畢。即以水噴紙。并焚黃紙一束。如是數次。忽謂行主曰。可令十歲以內之童子視之。行主携二童來。同時並有童六七十人。皆附近鄰居。爲予所素識。而予亦一童也。諸童忽聲言曰。紙上現一白鬚之老者。携杖至。後隨一圓面微黃。青襖而黑袴。年約三十餘之鄉人來矣。

繼又曰。鄉人出史家街矣。入劉復盛布行矣。曰。聽事間有燈火。鄉人入於左側之門而潛伏矣。曰。入於竈下矣。曰。廚人息燈而睡矣。曰。鄉人然燭出行至櫃房矣。曰。出鑰啓箱矣。取銀矣。銀圓散落於地矣。鄉人拾取而納於布囊矣。曰。啓門而出矣。曰。巡更者携鑼執燈自東來。鄉人復掩門矣。曰。巡更者西去。鄉人復啓門而出矣。曰。向東而行至弋橋矣。曰。過橋矣。遂不見。當是時。諸童注目視壁上紙。同聲相告。所見如是。予亦注視不稍瞬。則絕無所見。不勝悵詫。行主詢其人曰。白鬚而方巾者何人也。曰。土地神也。予急詢何獨無所見。其人微哂曰。則固有見有不見也。亦終不言其故。此情此景。至今猶歷歷不忘。而所謂竊銀之鄉人。以莫識爲何人。則終未破獲。

然行主始疑行中人所爲。至此乃釋然。圓光之名始於何時。圓光之術始於何人。無人能言之。近世所謂天眼通催眠術之類。果與此爲異爲同。則又莫知其究竟也。志之以俟發明。

### 陳國瑞

陳國瑞。字慶雲。湖北應城人。初爲捻匪。後降於僧格林沁親王。驍勇善戰。僧用爲前鋒。平著匪苗沛霖。敗東捻張洛行。張總愚。西捻任柱等。所向有功。積官提督。性凶悍。好私鬥殺人。曾文正惜其材勇。屢誡之。終不悛。後削職遣戍。死於黑龍江戍所。國瑞貌不逾中人。而發音甚洪。每衝陣。喊聲甚厲。雖重圍中。亦莫不聞其叱咤聲。軍中號爲霹靂將軍。

國瑞性喜動。雖剃髮亦然。居揚州時。每剃髮。無

人敢應召。惟某匠能之。每次給千錢。一日匠偶拂其意。國瑞怒。欲執之。懼而走避。國瑞愆怒。自起追匠。匠狂奔。及門。適一親兵入。出不意。爲匠猛撞。仆於地。國瑞舍匠而執親兵。數之曰。汝爲親兵。不能當一剃髮匠之衝。留汝何用。立手刃於門間。一僕時患瘡。驚倒於屏後。因駭汗而瘡愈矣。國瑞令重賞匠。且召使補親兵。匠不敢應。再往視。已不知所之。蓋避往他方矣。

國瑞有妾八人。稍不如意。輒鞭撻。其第三妾爲揚州人。屢被撻。不勝楚。一日撻已。謂國瑞曰。今日之撻。枉否姑勿論。身爲妾媵。鞭撻所不敢辭。但屢撻不已。則知屢拂公意。既勿殺。又勿遣。留此拂意之人。果何爲乎。竊爲公不取。竊意果愛之。遇有小不如意。恕之可也。不能恕則殺之。若



不忍殺而又怒之。則遣之可也。公其何擇。國瑞不能答。乃大稱賞。寵之專房。而屬以家政。謂其賢能出諸妾上。此妾可謂庸中佼佼。

鎮江駐防某參領。素驕橫。欺壓良善。官紳莫敢較。日往戲園觀劇。必據中座。以故正中一案。園主常虛左以待。人亦無敢居之者。鎮揚相隔一江。一日。國瑞潛至鎮。短衣入觀劇。見中座尙虛。昂然踞坐。園役讓之。國瑞不顧。喧嚷間。參領率僕從至。令摔之。國瑞舉手一揮。參領立仆。并仆數人於地。叱曰。汝識陳某否。參領鼠竄而出。府縣聞之。爲設宴排解。令參領衣冠謝罪而罷。然戲園中。從此無參領踪跡矣。

國瑞居揚。驕縱日甚。官府多畏之。梅花書院。爲府縣課士之所。當課士時。列名冊於案。府縣據

案執硃筆點名。吏侍立唱名。生童按次領卷。國瑞見而羨之。謂府縣曰。予在軍中。點將卒數萬人。惟從未一點士籍。今能讓我試爲之否。府縣皆笑曰。此朝廷大典。某等職守所在。安能讓公。國瑞堅請。府縣互商良久。曰。今有一法。能另設小課。多具膏火費。士子或亦不吝受點也。問爲數幾何。曰。數百千。國瑞大喜曰。此何足消。我出資加倍。按名皆給之。何如。遂定期開小課。人數較府縣課時轉增。以膏火多。且盡人皆給。故蓋此輩多寒素。亦大可憐矣。

### 平翰

平翰字樾峯。浙之山陰人。以翰林出知常州府。事善書。學鍾王。秀勁而有逸氣。刻求青閣帖行世。平自幼嗜書。總角時。好握管。恒於坐椅上習。

之。其母勿禁也。吾邑城西白龍庵臨水一亭，懸額幽然，意遠。爲平書，筆勢超逸。至今猶存。何桂清督兩江，愛其才，平已任滿，將卸篆，桂清強留之。江南大營陷，桂清退保常州，匪踵至，桂清挈平偕遁之蘇州，後桂清被逮，誅，平以先卒得免。

### 菜傭能詩

吾邑安西鄉奔牛鎮，在城西三十里。滬寧鐵路今設三等車站，鎮中街市繁盛，東西長三里許，北通長江，江北泰興等縣糧食多集於此，以通車運焉。清道光中有賣菜傭朱姓，逸其名，生未讀書，而能爲韻語，日挑菜入市求售，暇即信口高歌，韻語天成，市人見聞習熟，勿之異也。其所歌自然成詩，無彫琢氣，時爲人所傳誦，猶記其一詩云：春到江邊三月二，桃花水裏一船還。

中缺）搖過浮橋就轉灣。或詢以既不識字，何以能詩，則大哭，謂幼失怙恃，未嘗讀書，爲終身憾。聞者傷之，年五十餘卒。里中父老，今猶能道其事。光緒間邑人修縣志，採訪及之。主者某紳，性迂拙，日爲不經，謂未有不識字而能作詩者，遂擯不錄。不知北齊斛律金唱勅勒歌，隨園詩話載樵夫哭母歌，二子亦何嘗識字乎？且詩三百篇，大都采之民俗歌謠，爲此者，豈必皆文人學士某紳所見，無乃慎乎？崑山某鄉有賣酒者，亦能詩，有句云：雙親頭漸白，諸妹眼看長。所詠多家庭事實，蓋以業務之暇，骨肉言歡，卽託諸歌詠也。其人雖不能文，然已非不識字者，較之奔牛賣菜傭，固有間矣。其人年四十許，言行誠樸，今尙存。宣統間，崑山顧仲雅君爲予言之。

載穆都統

有清鼎革。以身殉國者。一爲山西巡撫陸鍾琦。一爲長沙總兵黃浩。皆以効忠清廷。慷慨就死。其昭然大節。足爲遜清國史增光焉。而尤以鎮江駐防京口副都統載穆死事爲最烈。載穆者。清之宗室。於穆宗德宗爲弟兄。而於宣統帝則叔父行也。初清廷以南京係明代陪都。視爲重鎮。設旗兵駐防。統之以江寧將軍。鎮江屏障南京。分設駐防。以京口副都統統之。而受江寧將軍之管轄。辛亥九月。蘇撫程公德全宣告光復。就任江蘇都督。東自淞江。上海。西達常州。丹陽。相繼用命。惟以南京未下。程公統軍攻之。鎮江密邇南京。新軍雖已反正。而駐防旗營。則堅持抵抗。戰禍將開。危在旦夕。於是鎮紳楊君邦

彥。吳君兆恩等。冒險入營。求見載穆。痛陳利害。謂大勢已去。雖有善者。亦無如何。今以旗營抗民軍。無異抗江蘇。而並抗全國。徒使地方人民糜爛。而旗民亦寧有噍類。公素仁愛。何忍以一人之効節。而傷多數之生靈乎。載穆乃慨然許諾。下令防營繳械。而與諸紳約。誓保全旗民。事既定。乃遺書告衆。其畧曰。予不忍以一人博死義之名。而令闔郡生靈塗炭。故命防軍繳械。以遂和平。予爲大清宗室。當守國亡與亡。君辱臣死之義。以明志節。所望鎮郡紳民。勿負信約。保全旗民。爲謀生計。使無失所。則予心安。而予目亦瞑矣。遂仰藥死。鎮紳聞報。急往救。已無及。皆感嘆不置。有相率泣下者。予任知事時。將之鎮。都督程公以旗民生計。相諄囑。蓋深有感於載

穆之死爲仁至義盡也。今鎮人祀之於北固山。嗚呼。載穆之功德在民。民之不能忘也固宜。

### 鮑忠壯遇胡文忠

奉節鮑忠壯超。字春霆。初隸水師李孟羣部下。掌舳舨。益陽胡文忠林翼率所部六百人自黔援鄂。胡部編練素精。夙稱能戰。大別山之役。精銳盡喪。欲以身徇敵。策馬衝陣。親隨知其意。牽其騎使馬首向後。文忠方奮鞭。出不虞。馬逸至江邊。踐鮑舟所繫纜。鮑探首艙外視之。知係陸路統將。鮑素不識胡。見其德。邀入舟小憩。胡允之。告以故。鮑甚慰藉。胡與語甚器。鮑遂請於李。使治陸軍。授以兵法。使募兵二千人。鮑遂改隸於文忠矣。

金口鎮之役。陳玉成率悍匪五萬人來攻。前敵

偵者報至。胡謂鮑曰。君年方壯。足以有爲。當留此身爲國家討賊。可入城守禦。予已衰朽。死亦無憾。即移駐鎮。當其衝。鮑大感奮。謂其下曰。帥語。君等皆聞之。帥文官也。不愛死。吾輩武人。反畏避入城。能無愧死。誓當捨身以報國。衆皆曰。願死戰。敵至。圍之數重。見鮑兵少。易之。鮑率其部突陣死戰。敵出不虞。小却。鮑連破其數營。敵遂退走。是役也。以二千人破悍匪數萬。軍威大振。遂與多忠武隆阿齊名。其後李忠武續賓戰歿於三河。胡失先鋒。令鮑繼之。時年二十餘。諸將中。最稱年少焉。

鮑駐兵於江西浮梁縣之景德鎮。湘陰左文襄宗棠駐兵於平陸。互爲犄角。左營高阜。鮑率四千人屯平田。左謂鮑曰。平田無險可扼。不可營。

且賊以數萬人至。尤難抵禦。予兵少。不能相救也。鮑不聽。太平將侍王李世賢率數萬人。至次日。堵王黃文金繼至。重疊圍之。見鮑營偃旗息鼓。不敢遽攻。至第三日。攻之不克。第四日晨。鮑謂其下曰。今日當破敵。衆問計。鮑曰。聞砲即出戰。毋反顧。衆諾之。旁午。太平營方治餐。鮑見炊煙甫息。亟鳴砲分四路猛衝。敵方食不虞卒。遂敗。鮑乘勝窮追數十里。匪散不能復合。後鮑歸見左。左問戰狀。鮑曰。賊衆我寡。所謂置之死地而後生也。且營於高阜。動作皆爲賊見。營於平田。則難瞭望。彼前隊已破。後隊尙不及知。故得出其不意而勝之。左大稱賞。

### 程忠烈破東西墩

程忠烈學啓。皖之桐城人。始本從匪。爲英王陳

玉成部下健將。時曾忠襄軍中有與程同里而兼誼親者。貽書說降。令學啓之同宗一童子賈書往。學啓上聞於玉成。面毀其書。惟言童子無知。當釋之。令去。玉成不可。固請。玉成怒。手刃之。且謂程曰。汝豈有二心耶。程嘿然。甚啣玉成。遂降於曾。勇冠一軍。又以來自賊中。習知情勢。每戰輒爭先。所向有功。護王陳坤書踞常州。烈王費天將副之。常州距無錫不百里。有東西二墩。皆壘石爲營。匪遣重兵扼守甚固。且揚言曰。能破我東西二墩者。以常州讓之。時程以李文忠之請。隸於李部。與戈登軍分攻二墩。東墩較西墩尤固。程自攻東墩。而讓戈登攻西墩。程冠翎頂短衣草履。携雙刃出。與戈登別於馬上。一拱手。絕馳去。不半日。東墩破。移兵助破西墩。戈甚

敬佩。程後攻嘉興。砲中其首死。戈登哭之慟。

### 王文勤經驗

仁和王文勤文韶。光緒中爲相國時。有門生某。以翰林京察出任道員。臨時請訓於師門。文勤語之曰。凡作事。須有站得住的憑據。方爲立脚。某服膺斯言。嘗告人曰。作官二十年。畧無蹉失。吾師訓言之賜也。竊謂文勤此語。實爲作事要訣。不止作官用得着也。

### 蔣果敏晚學

安福蔣果敏益澧。字癡泉。爲左文襄舊部。屢任前鋒。攻克浙省。戰功甚著。始以軍功。歷保至參將。一日。見游擊某。被笞軍棍。意甚不平。謂同儕曰。三品大員。尙不免被笞耶。同儕謂。君如有過。恐亦不免。蔣益憤曰。如何而可免。曰。欲免於此。

當爲文官。蔣大喜。自請取消武職。報捐從九。積功歷保。遂任浙藩。時文襄爲浙閩總督。蔣入謁。衣白狐馬褂。以布纏雙股。著草履。冠紅頂花翎。昂然而入。左訝之。謂蔣曰。何乃如此。殊不雅觀。蓋以其臨陣裝束而衣大褂。爲不類也。蔣怫然曰。某雖不才。忝官二品。豈尙不可衣狐裘耶。左知其悞會。爲之蹶然。蔣平生意氣自豪。體質絕健。數夕不寐。亦不覺憊。文襄每當挫衄時。遣蔣往援。至則一軍鼓舞。士氣大振。每轉敗爲勝。性勤奮。善自勵。任浙藩時。年已四十餘。浙撫某。校閱省城書院試卷。甲乙既定。例須兩司傳觀。後始發榜。蔣與臬司均集撫院。撫軍知蔣素不識字。以卷授臬司。臬司不安。進卷於蔣。蔣謂臬司曰。本司軍功出身。不諳文字。君閱即可。毋庸擬

謙爲也。歸卽延師講習。公餘刻意讀書。數載遂能爲文。竟臻通順。時論多之。

### 寒山寺

寒山寺以唐人張繼楓橋夜泊詩而名著。此詩日本人多傳誦之。民國三年夏。予以攷察大正博覽會。厲日時。誦此詩者。一聞於東京旅館之下女。再聞於神戶之人力車夫。歸途則又聞諸三乘丸之水手。乃知此詩於日本幾無人不習知之。寺在蘇州閶門外。日人之至蘇者。莫不往遊。若視爲中國最著之名勝。爲一償其積年所翹望。有爭先快覩之概焉。清光宣間。雲陽程公德全撫蘇時。慨勝跡之久荒。爰加修葺。煥然重新。並刊寒山子詩集爲序以紀其事。程公既去。寺遂無人過問。距今已十餘年。漸就摧敗。前歲

過之。榛蕪滿目。垣宇皆頽。令人有不勝今昔之感。人存政舉。凡事皆然。何獨致慨於寒山寺哉。

### 松隱庵

松隱庵在泰縣城外三里許。中有古柏。幹已數抱。而高僅丈餘。枝柯盤旋屈曲。陰被十餘方丈。以其枝曲幹巨而不甚高。察之。蓋以盆栽紫景移植於地者。邑人謂之六朝松。其時代雖未能確信。然栢爲常綠之木。生長甚遲。而偉大若此。度必爲千年以上物。憶蘇州拙政園有紫藤。相傳爲明文待詔徵明所植。蔭庇之廣。與此相埒。計爲三百年物。則以紫藤爲蔓生之木。易於生長。固與栢絕異也。栢與松相類而不同。就所常見者言之。栢有扁栢。側栢。檜栢。羅漢栢。諸種。葉皆鱗形。松則葉皆針形。白松一名白皮松。其葉

三針叢生。黑松皮作鱗片。赤松皮與嫩芽皆赤。葉均二針一蒂。海松關東多產。其葉五針叢生。與五鬚松亦名五釵松相同。惟羅漢松葉狹而長。與柏相似耳。秦縣之柏。固側柏也。庵當以柏名。不曰柏而曰松。卽庵中楹聯與碑記。亦皆松柏不分。莫知其故。詢之邑人。則謂大江以北。松柏同名。其然。豈其然歟。

### 乘輿濟人坐於塗炭

幼時讀孟子子產以其乘輿濟人於溱洧。心竊疑之。謂渡水以舟。何乃謂乘輿。又如衣朝衣朝冠。坐於塗炭。疑爲厲言。不必實有其事。迨行汴魯直奉諸省。而始恍然於乘輿。乃以牛馬所駕之兩輪大車。而非南方之肩輿與獨輪之小車。卽北方之水。爲山水冲刷而成渠。水與沙石交

并。亦非如南方之溝渠。純係汙泥。故能勝車之重量也。北方之人。坐臥習於土炕。猶沿席地而坐之古制。每見衣冠甚整而憇坐於道塗者。恬不爲怪。蓋北方少雨而多風。塵土飛揚。終歲皆然。人皆安於塵土。故不以泥塗爲可厭。始悟朝衣朝冠坐於塗炭。乃實有其事也。境非親歷。無以灼見真知。則知南方不出戶庭之蒙師。其於課讀時。必不能透切講解矣。

### 江南春色塞外風沙

早年讀唐宋人詩集。中多塞外風沙諸作。則知其入必生長南方而偶至北地者。中多江南春色諸作。則知其入必生長於北地而偶至南方者。考其里居。百不爽一。人情安於鄉土。囿於居處之習見。偶至異地。不自覺其少見多怪。此在



關關時代使然。今則交通日便。此等習慣漸趨  
薄化矣。

### 李忠武三河之戰

湘軍諸將帥。多理學名儒。曾胡宗朱文公。而治  
朱學最篤者。尤推羅忠節澤南。羅起家寒素。講  
學湘鄉。一時學者多從之遊。如李忠武續賓及  
弟勇毅。續宜。其最著者也。忠武家貧。販布爲業。  
過羅氏門。聞講誦。輒佇聽不倦。日以爲常。久而  
羅知之。詢以故。曰。家貧無力讀書。中心嚮往。聞  
先生講誦。心竊好之。畧叩詰。頗具見解。羅喜。授  
以學。不取修。并告其家。時羅負重望。鄉里所欽  
仰。其父母知之。甚悅。其後。軍事起。李兄弟遂從  
羅治軍。羅主正心誠意之學。尤得力於定靜二  
字。軍中遇敵。銃不虛發。發無不中。匪甚憚之。忠

武始領鄉勇。僅數十人。數年。積功至監司。每戰  
身先陷陣。多設奇計。戰無不克。由湘入鄂。轉戰  
至皖。時胡文忠丁母憂。總督官文兼攝撫篆。忠  
武性躑直。爲官所不喜。官之幕僚亦多忌之。皖  
太平守將英王陳玉成。勇悍善戰。擁兵十餘萬。  
皆積年著匪。忠武所統八千人。連破太湖宿松  
潛山桐城舒城。進至廬州之三河鎮。屯營畢。視  
兩面皆水。進退祇一路。欲移營而軍士多疲困。  
遂不果移。知玉成必將襲其後。飛書請官派軍  
接應。官無所主張。與幕僚議。皆云。廬庵用兵如  
神。無俟我援也。遂不發兵。及期。救不至。李知無  
幸。匪自後路人。始李軍堅守不戰。至是而不得  
不出於一戰矣。甫交綏。自辰至酉。殺賊萬餘人。  
玉成大懼。欲退。繼思李軍八千人。連破五城。計

亡。每破一城。必損精銳一二百人。實存當  
戰七千人。今苦戰一日。已死千人。所餘六千人  
耳。登高望之。見大隊皆入戰線。知營必空虛。遂  
以匪分二路截擊。營中火起。李前軍反顧。遂乏  
鬥志。左右勸之退。忠武怒曰。平生出兵。即拚不  
生還。吾方以鴉片之役。將士退避。遂使國威挫  
衄爲恥。寧死而效之耶。爰奮矛馳馬衝陣而死。  
清廷聞之。痛惜特甚。贈總督。予諡及祭葬。諭旨  
有願天再生申甫來世以輔予也之語。夫人某  
氏。嫺翰墨。具卓識。挽以聯云。馬革裹屍還。是男  
兒得意收場。惟憐室有雙親。瞑目尙餘難了事。  
鵲聲啼血盡。痛夫子招魂不返。更苦孤無六尺。  
腹心只賸未亡人。哀感激昂。情文兼至。誠佳聯。  
忠武既沒。勇毅繼起。多積戰功。仕至皖撫。

### 馮勇毅諒山之捷

光緒乙酉。中法失和。諒山之捷。以馮勇毅子材  
功爲最。馮字萃亭。粵之欽州人。向忠武榮之舊  
部也。初。法自越南進兵。勢甚銳。桂撫潘鼎新禦  
之不勝。提督滇人楊玉珂守諒山。甚力。累戰十  
餘日不退。卒死之。總兵陳嘉亦以善戰聞。一日。  
方臨陣督隊。與其弟偕。砲至。扶其弟使伏地。致  
己身轉不及避。傷背死。時左文襄督粵。檄馮守  
鎮南關。關內有東西二山。馮守東山。潘鼎新遣  
蘇元春守西山。馮知關不易守。亟於兩山間築  
長圍爲備。甫成而法軍果破關而入。馮與所部  
總兵粵人黃孝圻以冠擲地。並傾其餉銀十餘  
橐。列帳下。謂將士曰。能爲前敵者。以此賞之。有  
七人應募而出。携短刀團牌。踰長垣。下伏草間。

續有兵數百人隨之下。皆伏不動。法軍乘勝至。將攻長圍。伏驟起。已過鎗彈線。法軍不及放鎗。以鎗刺佩刀相接。馮軍携團牌掩護。進刀不能傷。法軍前隊立被殺數十人。易以馬隊衝之。馮軍以短刀斫馬足。人馬倒者相續。遂大敗。勇毅督大隊猛攻。蘇軍助之。法軍首尾不相顧。跪地乞降。盡斬之。嗣以和議。罷兵。馮之威名振中外。然自此戰勝後。各軍皆視外人爲易與。戒心漸失。而綠營寢成驕惰。甲午之敗。識者謂其機即兆於此焉。

茄

某甲善識別字。適與乙同膳。食茄。甲問於乙曰。茄字如何寫法。乙曰。艸爲首。下爲加。甲曰。是非萑葦溁之萑字乎。蓋悞加爲佳。而遂讀萑爲

茄。乙曰。悞矣。乃艸首下一加字。非佳字也。甲曰。然則爲非我求童蒙。童蒙求我之蒙字。蓋既誤加爲家。而又悞冢爲家。并悞蒙爲茄也。乙曰。又悞矣。乃艸首下從力從口。甲曰。然則即觀世音菩薩之菩字。蓋又悞力爲立。而遂讀菩爲茄。乙曰。非也。艸首下從力從口。並非從立從口。甲曰。是矣。此必爲苕之華之苕字。則又悞苕爲茄。而并悞刀爲力。乙曰。亦非也。艸首下力與口並書。甲曰。然。其爲臨財毋苟得。臨難毋苟免之苟字乎。則又悞苟爲茄。而并悞勺爲力。乙曰。否。艸首下力在左口在右。甲曰。然則爲爾有吉茄。誤吉茄。猷之茄字耳。至此而茄字雖已明白。但又誤分嘉字爲吉茄二字矣。如甲者。可謂善識別字之尤。